

戊申七月初版

明季南北遺聞

上海國學社印行

戊申七月初版

明季南北遺聞

上海國學社印行

序

嗚呼。明季之事。天與人難言哉。自三代以迄唐宋。繼世有天下者。莫不禍亂代起。以開中興。其間惟晉元宋高。偏安江左。他若夏少康。商武丁。周宣王。漢世祖。唐肅宗。凡邊亂內難。一皆削除之。光復舊物。告成太廟。享有祈年保民之譽。以垂久遠。明朝祖功宗德。較隆前代。而先皇帝以聖明在御。旰食宵衣。比之太康之尸位。仲壬之廢嫡。厲王之內嬖。哀平之外戚。惠帝之昏弱。明皇之淫蕩。徽宗之晏佚。舉無一端。謂宜治平立臻。而逆寇犯闕。身殉社稷。烈於七君。言天言人。都不可信。蓋自故輔烏程武陵輩。不能以堯舜之道事君。務拾申商督責唾餘。以煩苦天下。十六年間。三事九列。繩繩繼繼。半是持祿養交。唯諾成風。賄賂競尚。始而裁驛。繼而加派。繼而抽練。繼而郡邑以催科。

爲上考。庶司以搜括爲能事。繼而簧鼓細人。流言流說。以培克爲希。幸兼以高尚威嚴。獄訟繁興。民不堪命。而又錢法鈔法。一時並行。致海內若焦若焚。怨讟盈路。盜賊蜂起。勦不成。撫不成。雖有善者。末如之何。屈指當日。不乏名流。如品行高峻。卓出倫表之吳鄭。鹿友 玄嶽 閔通博雅。磊落千古之錢王。牧齋 豐斯 慷慨擔當。實心經世之洪盧王史。石齋 八公 淇持現間 奇情至性。孤行特立之黃蔣文姚。石齋 八公 淇持現間 乃至直言強諫。鐵面冰心。百折不回。輒軻顛躓之劉趙楊章。晉卿前之 機部魯齋 熊姜傅李。魚山如巖 右君灌谿 詹任毛魏。一庵 蔡之 芝田 倩石 成曹周葉諸公。寶慈履垣 仲馭渭山 而羣小必掣其肘。絆其足。毛舉鷲擊。俾任事之念。不勝其救過之念。跋前疐後。而憂患多。左方右圓。而才智。不過出。嘆於朝。入嘆於室。中宵徬徨。當饋而起。一旦勢成土崩瓦解。以祖宗櫛風沐雨之天下。輕輕斷送。

於衆小人。手宜乎有識者。憤激而言。謂今日無論李綱。難得。即求一大小人。若秦檜。亦不可得也。迨弘光南渡。時事日非。除聲色貨利之餘。無朝政自誥。命贈廕。而外無功能。真所謂清歌漏舟之中。痛飲頹屋之下。泄泄沓沓。於斯爲甚。若夫八閩兩粵。餉匱兵單。愈趨愈下。尤不足觀。譬之千金之子。家資蕩盡。四壁徒存。而又外侮交訌。爲之紀綱者。復從而陰耗之。其主人復不能憂勤節儉。欲以左支右吾。光前猷而復祖業。此實難已。試問誰秉國成。則貴陽桐城南安。吸脂吮髓。前後一轍。此與烏程武陵。又何以異。蓋若輩有小人之心。無小人之才。才能治天下。亦能亂天下。惟無才。止能亂天下。不能治天下。殆明季之謂與。即有一二正人君子。公忠體國。若姜高劉呂。祚許張吳。熊馬章金數輩。居之歷齋念臺儼若世培霞城非聽投紱去。則重得罪。

耳。曾有一人得安意行道者乎。而欲以致治保邦。又曷望焉。清朝入關。仲義勦賊。時朝議册封晉藩於江南。興滅繼絕。誠爲盛事。會聞金陵擁立。遂興南下之師。不二年間。摧枯拉朽。東南半壁。全入版圖。求如晉宋。亦不可得。凡此盡人事之不臧。與抑出於天數之有定。與頃者野史紛紜。愛憎失實。如王之明。假冒太子。而以爲真。左崑山迅掃羣奸。而稱爲叛。張司馬矢忠北進。而加以不韙之名。李太史倡議南遷。而昧其先幾之哲。乖訛顛倒。類不一端。茲就先達之緒論。合之邸報之流傳。稍爲詮次成帙。昔齊公仲氏。懼女醜而無歸。日譽女之美。且許以千金之裝。人曰。女姣而復贈以厚裝。必醜。卒不聘。申屠氏女美。懼其女之入於宮也。乃毀爲惡。亦卒不聘。夫美醜之不以毀譽掩。如此。余又何必曲舌強爲飾說乎。然則燕都之變。人耶。而寔天也。

金陵閩粵之失天耶。而卽人也。天人之際。余殆不能不三致意云。

明季南北遺聞 序

凡例

一野史從來不廢。是編悉紀明末遺事。其先帝朝事無關於鼎革者。茲不盡載。另有崇禎紀事一刻。大書而特書之。至新朝大政。洋洋纒纒。別載國史紀畧。以自附於矚誦警說之義。

一明運告終。實由流寇蹂躪海內。幾十餘年。自秦晉而蔓延楚豫。以及吳蜀燕京。茲特詳攷歲月。條貫而詳悉之。清朝入關。伸義復仇。往致史相公書有云。國家定鼎燕都。乃得之於闖賊。而非得之於明朝也。固已爲萬世之定案矣。

一江南浙東。八閩兩粵。俱不書帝書上。僅稱年號。以尊王也。其當日章奏。稱呼仍舊。倣前史例也。攷崇信錄云。年號是紀時事。帝號乃誦君德。觀於章奏書冊中。紀年年號。從不擡頭。可以想矣。卽

清朝封事亦多稱其年號。但斥之耳。

一集中叙載人物之賢否。言行之臧否。要皆攷據邸報。採擇見聞。不敢虛美隱惡。以重穢史之咎。

一殉難諸賢。在北都者。易名卹贈。炳耀千秋。其在東南殉節諸公。亦奉 清朝有詳訪確議之 旨。蓋聲其罪。未始不憫其心。殺其身。未嘗不高其義也。並應直書。以見癡忠。

一南渡事多未備。止記耳目所及。如浙事得之許子泱紀事。閩事本之家大人紀畧。粵事悉之瞿常熟家傳。暨華方若新書。摠俟後之君子攷覈論定云爾。

日本原版明季南北遺聞

目錄

第一卷

紀李賊倡亂本末始辛未四月迄甲申三月

第二卷

紀弘光南渡本末始甲申五月迄九月

第三卷

紀弘光南渡本末始甲申十月迄乙酉五月

第四卷

紀隆武永曆繼立本末始乙酉八月迄庚寅十二月

明季南北遺聞

明季南北遺聞 北都

江左鄒



李自成初名鴻基。陝西米脂縣人也。祖海。父守忠。世農頗饒。自於斷髮。與姪李過即一爲暴于鄉。娶妻有淫行。手刃之。以負債故。受過于艾同知。并殺艾。懼罪。逃入甘肅爲兵。以功陞把總。又殺王叅將。遂爲賊。初崇禎皇帝卽位。勵精圖治。軫恤民艱。憂國用不足。務在節省。於是給事中劉懋上疏。請裁驛遞。可歲省金錢數十餘萬。上喜。著爲令。有濫予者。罪不赦。部科監司多以此獲譴去。天下惴惴奉法。顧秦晉土瘠。無田可耕。又其民饒膂力。貧無賴者。藉水陸舟車。奔走自給。至是遂無所得食。未幾秦中疊饑。斗米千錢。民不聊生。草根樹皮。剝削殆盡。上命御史吳甡。賫銀十萬兩往賑。然不能救。又失驛站生計。遂相聚爲盜。給事中許國榮。御史姜思睿等。知其故。具言驛站不當罷。上皆不允。衆共切齒于懋呼其名。而詛咒之。圖其形。而叢射之。懋以是自恨死。棺至山東。莫肯爲輦。負

者。至委相旅舍。經年不得歸。已已。清兵薄畿。徵四方援兵。勤王保定兵首潰。餘亦多中路逃者。因與飢民合勢。嘯聚山澤。秦中鎮將守臣議蹙。賊于險據隘。殲之。可一鼓盡也。三邊總督楊鶴獨力主招撫議。賊出險。遂橫不可制。鶴以此被逮。下詔獄。上意必欲誅之。以欲用其子嗣昌。故貰其死。然首禍寔自鶴云。賊既蔓延秦晉間。又歲壬申。登萊兵變。因調關寧兵馬步二萬討平之。朝議欲乘戰勝。精甲渡河。進剿。兵部尙書張鳳翼家本山西。慮其驅賊入晉也。阻之。盡放遼兵出關。賊遂得渡河。而南。因入豫。入楚。入安廬。賊首之有名號者。在秦則稱紫金梁。上和滿天星。蝎子塊。老狗。狗。一字王。劉小山邢管隊。領兵王。整齊王。闌場天。姓劉過天星。張五南營八大王。八爪龍。姓徐西營八大王。張獻忠二隊八大王。不沾泥。混世王。曹操。亂世王。八隊闖將。姓張張飛。九條龍。五條龍。賀雙全。高總管等。二十四家。晉豫則稱英王。王鎮虎。朱溫。趙令軍。曹操。吳計。過天星。郝光混。天星。荆聯子。過江王。混世王。大膽王。征西王。福壽王。齊天王。密靈王。閻和尚。老狗。狗。上天。

龍出獵雁，黑心虎，樓山虎，新一字王，西營八大王，南營八大王，東營八大王，混天王，紫金梁，正天王，閩王，領兵王，老邢，四隊，六隊，八隊，闖場天，順義王等，三十營，各擁衆數萬，少者萬計，蹂躪直省無虛日。時李自成方依闖王高氏與劉良佐自結一隊，號闖將，名不大著。癸酉，賊在河南沿山州縣，無處不到。正月，副將芮琦戰死武安。二月，中軍曹鳴鸚陷沒趙寨。三月，賊入清化，游擊越效忠登屋擊賊，墮地死。遊擊陶希謙在武安，出禦賊硯水，自暮移營，賊乘之，落墮死。總兵左良玉馳救清化，賊方去，復馳武安，勝之於三井，獲賊首小秦王。總兵曹文詔自晉來援涉，勝于毛嶺。五月，賊盡至磁，衆十餘萬，長可五六十里。總兵鄧垲與良玉會兵彭城，尾至林縣之清池柳泉，擊敗之，殲其尖騎九天聖等八十一人。其分股犯衛輝者，巡撫玄嘿自乘城以却之。六月，參將湯九州領昌平兵至豫，時流賊爲鄧左周爾三家兵所追，方從林走輝。九州自涉來林，闖賊之中堅勝於馬鞍山，斬賊首混天王，賊從林奔懷濟。鄧左追擊大敗之，賊奔潰沿河。

從溫孟至武涉。遁入山。復回林縣。時湯九州駐兵水治。居安林磁武四邑之要路。八月。有陽邑鎮科泉。清涼山。九龍山。王凱寨。原康村。湖南七捷。斬獲賊首混天猴等。左有河村。柿黃山。八特三捷。俘斬新立一字王。殺盡王等。周有都里。馬鞍山二捷。是月。京營副將倪寵。王樸。以禁旅六千至彰德。九月。有原康營底涉縣三捷。斬獲飛天聖等。兵勢大振。賊棄妻子走北。奔五臺山。既而復回。京營尾於後。湯左扼於前。京營勝之於亢。候石坡牛尾。湯兵勝之於青店沙岡。賊勢窮迫。十一月。賀雙全。新虎等。因京營乞降。然焚掠如故。湯九州在林縣。連戰三日。勝於兩岔口。再勝於安陽夏村。又勝於旁坐寨清涼山。共擒斬四百餘級。左良玉勝之於早生。斬二百級。晉兵曹變蛟。亦勝之於涉縣。守備許志忠。孔道興等。併力進剿。賊前隊已連夜走濟源垣曲。遂以二十四日。乘冰渡河。二十六日。破澗池。又破盧氏。又破伊陽二縣。賊渡河後。殺掠更慘。初止左帥一軍尾後。雖有盧氏銀洞溝刀。環川柳泉之捷。而賊衆四掠。雒陽。新安。陝州。靈寶。閿鄉。盧氏。永

寧汝州魯山葉縣舞陽遂平確山信陽南陽裕州泌陽桐柏浙川新野內鄉等州縣賊無不至。十二月十九日賊至鄖城勢逼開歸。會日暮雨雪巡撫玄嘿起湯九州於床曰事急矣宜乘夜襲之。即晚勝之吳城鎮追殺五六十里殺賊盈野斬四百餘級。明日又追及於橫山鎮斬六百餘級皆殺賊強壯。是月二十日左帥有保安之捷。又有趙庄之捷。又有平上關黑山之捷。七年甲戌正月初一日巡按劉令譽督京營有牛蹄涔之捷。出其不意斬級踰千。得此三路大捷賊始狼狽走楚河南。乃寧蓋賊最畏曹文詔其標將曹變蛟更驍勇時爲之語曰軍中有一曹流賊聞之心膽搖次左良玉湯九州若京營兵賊甚輕之時賊大夥在秦勦撫未定諸督撫前後數十輩或被譴去或逮繫去或死西市或戰死逃死不可勝計。惟秦督洪承疇勦禦有方遂自秦撫進五省總督承疇廉勇精韜鈴率總兵曹文詔曹變蛟左良玉賀人龍等凡破賊於寧塞於西安於延北於西濠於莊浪斬賊渠神一魁等招降中斗星等每逐賊奔馳往還數千里毋

在官舍過門。不入。士卒感其義。爭爲效死。楊嗣昌在樞部。忌其才績。意弗善也。會賊在江北安廬者。以英山霍山爲窟穴。旣野掠黃麻間。又破隨州羅田。穎和廬霍相繼告陷。鳳陽無城可守。雖有總漕楊一鵬駐紮。兵不過二千餘。皆市人不習戰。賊至隨破。焚皇陵。燒享殿。一鵬逮斬。給事中許譽卿。四疏糾劾溫體仁。擬旨。淮撫不必移鎮。以致悞陵。給事中何楷。以一鵬爲輔臣。王應熊座師。并糾應熊。應熊竟以此罷相。指揮包文達。脇中流矢。揮刀陷陣。賊迫令卸甲降。文達怒罵。賊砍其左臂。斷頭而去。和州知州黎弘。慧學正康正。諫總管周廷儒。訓導趙世選。霍山教諭龔元祥。訓導姚允恭。死之。兵部尙書張鶴鳴。賊索金幣。入其室。見皆古玉及陶器。遂刃劈其頂。達踵。原任御史馬如蛟。與兄運尹如虬。諸生如虹。一門戰歿。原任副使盧謙。諸生韓光祖。葉漳等。俱死。惟江浦斗大孤城。知縣李維懃。登陴防禦。追賊鏖戰。奮臂大呼。所向辟易。賊衆宵遁。是時殺戮之慘。天地爲黑。有縛人之夫。與父而淫其妻。女然後殺之者。有驅人之父。淫其女以

爲戲而後殺之者。甚至裸孕婦於前。共卜其腹中男女。剖而驗之。以爲戲。一試不已。至再至三者。又甚至以大鍋煮油。擲孩子於內。觀其跳躍啼號。以爲樂者。又甚至綁人於地。生剗其腹。寔以米豆牽羣羊而爭飼之。取人之血和米麥爲粥。以餵馬。驢使之腹壯而能中敵者。所擄人子女百千。臨行不能多帶。盡殺而去。或殺人而間以蘆葦薪木堆城下。縱火焚之。令穢氣烟焰薰逼城上。守兵立仆。上震怒。勒限六月平賊。齋居武英便殿。減膳撤樂。青袍視事。以示行間文武甘苦與同之意。朝議命盧象昇爲總理。象昇初備兵天雄。寇興。馳行郡內。嚴檄州縣繕城治具。率衆往。遇賊數萬。象昇弗却。中一矢。額傷。又一矢。僕夫斃。馬下象昇提刀戰益疾。賊乘高臨。後兵至乃免。賊分黨趨城下。潛發兵攻滑。象昇知賊計。戒守城士勿動。選騎出。前伏草莽。賊至卒發。大敗之。斬級數千。賊相戒曰。此盧閻王。遇卽死。不可犯。象昇以是有能兵名。賊懼。南渡河。河以南所至殘燹。甲戌。鄆破。命象昇撫鄆。鄆大治。乙亥。命象昇撫楚。賊又懼。流河南。總兵祖寬於

緝陽等處。三戰三捷。斬級二千。軍聲大振。象昇遂晉兵部侍郎。總督七省。會乙亥歲杪。滁州攻圍甚急。知州劉大鞏。馳檄請救。疾走援。奮擊。賊大敗。象昇會諸將曰。兵貴神速。今賊氣已衰。失此不擊。長患安窮。趨兵乘其後。又大敗。賊遁承襄。象昇獨以數百騎入陣中。爲賊困。二日。賊不敢犯。象昇與諸將約曰。食盡道窮。留此死。擊不勝。亦死。吾當力衝之。乃率騎往。擊殺萬人。斷食道。越三日。投戈請降。其及之於滁。將盡勦無遺。願以淮督朱大典。莫爲堵截。復逸去。會丙子夏六月。休兵。象昇疾走秦關。與總督洪承疇議事。時秦中之賊方熾。豫中之賊又來。凡臨潼。邠州。渭南。韓城。華州等處。承疇隨地嚴兵阻賊。象昇又屢獲奇勝。釜魚阱獸。賊且暮可平。乃溫體仁忌功。象昇忽受命勤王。未幾改宜大總督。而以熊文燦代之。文燦惟迎合中朝爲事。一意招撫。賊勢復烈。蓋體仁以象昇爲南人。不習邊塞。改置重地。增其擔負。緩則斂之。急則殺之。此其積念也。後象昇果戰死松杏。承疇尋亦改督薊遼。時賊旣往來不定。豫中尤稱要衝。關陝以東。黃

河以南襄漢以北。延袤數千里。所在馳突。乙亥。巡撫玄嚜罷去。代之者陳必謙。必謙與象昇協力剿賊。部領諸將左良玉、陳永福、趙國柱等。斬興世王於邾縣。闖世王於白沙。整齊王於宜陽。掃地王於邾。豫患少息。已而赦詔到豫。必謙知其詐。欲令面縛詣軍門。副將王進忠勦賊無功。思以歿自効。單騎入賊營。爲賊所殺。必謙竟以此罷。賊又破盧氏。陷陝州。攻圍永寧。破冀庄、馮庄等寨。及岫峪等十三村。丙子。用經略侍郎王家禎巡撫河南。時宛南裕舞一帶。巨寇鴟、張、踞蟠龍山。負隅爲勢。不一年。家禎旋罷去。陞河北道常道立代之。蓋道立幼。在楊鶴、衙齋與嗣昌善。嗣昌時以木兵入閣也。上又憂賊不卽平。命內臣盧九德、劉元斌率禁旅出討。八月。抵河南。九德勤幹。諳練兵機。其把牌中軍黃得功、宋紀皆驍勇絕倫。官兵勦賊於眞陽縣之張家灣。追至光山。千總張國柱被圍。遊擊苗有才救之。而山下雪積坑深。方欲收兵。賊大隊齊發。呼囉囉爲號。四面合圍。官兵大敗。大畧劇賊人有副馬。疲則易之。矯捷如飛。官兵用步卒尾之。重趼而

至賊已逸去。喘息未定。他警又告。故將士不勝勞苦。終無成功。是年賊勢益熾。其在楚者。自秦翼明、楊世恩、應山一捷。斬級五百而後。旋遶麻黃。一股西犯德安。一股東趨江北。破英廬。圍安慶。副將程龍以火藥含笑自焚。守備陳於玉等俱戰歿。十月入舒城。參將張一龍勝之於咎家岡。獲其頭目搖天動等。副將孫應元勝之於烏紗山。斬五十餘級。太監劉斌率京營兵鏖戰竟日。追殺七十餘里。號哭震天。殺賊五百四十二級。賊遁入山。而秦撫孫傳庭破殺闖王高氏。自成入四川。十月初四日。冲梨樹壩。日等關。副將孔全斌等遁。於是破寧羌。攻廣元。逆宗朱廷一者。時爲參軍。株守保寧。坐視不救。遂直犯成都。蜀撫王維章聽其突入。不能扼禦。自成往來階徽間。維章逮問伏法。戊寅。巡撫常道立奏賊犯鄧州。焚毀周王八塋。總理熊文燦報賊困英山。合九路之兵會勦。賊從德黃一路潛遁。楚撫俞應桂逮問。豫撫常道立招撫闖場天等。闖場天本名劉國能。性至孝。就撫。乃奉其母命也。晉撫宋賢奏混十萬等賊乘虛窺渡。攻剌五塔。塔

等寨。攻圍陝州等處。官兵禦却之。賊拔營遠遁。二月，官兵三戰三捷。敗賊於鎮平縣。生擒草上飛、獨脚虎等。斬扒天虎等四人。賊渡河間光山等處。結連曹操及托天王、整世王、混世王、十天王、紫微星、過天星、飛虎、八家大賊。來商城固始界。欲上穎霍等處。爲度暑計。太監盧九德分佈官兵迎擊。大敗賊於山石橋。擒斬抵地虎、黑旋風等。三月，巡道張天經又敗賊於黃福店。斬獲無算。招降賊首飛天師等。五月，總兵左光先又三敗賊於大寨地方。六月，陳永福又大敗之於饒良鎮。嗣是官兵又敗之於宜陽、連庄、雍家庄、林家莊等處。左良玉又大敗之於高坡。混十萬本名倭世範帶傷遁。妻子囚執入省。混十萬亦旋降。九月，內臣盧九德扼之於襄。撫臣常道立擊之於鄧。監軍張大經、總兵劉澤清、左良玉、張任學擊之於襄。承隨棗汝許。十月，張任學又敗之於高莊。賊南北無路。轉戰敗逃。凡曹操、攝裏眼、托天王、過天星等賊。在豫在楚者。無不分頭鼠竄。已卯三月，漕撫中軍劉良佐有光山之捷。安廬巡道湯開遠有舒城三捷。賊漸西奔。張獻忠、曹

操因入房竹山中。獻忠，榆林人，初爲小賊，號黃虎。後爲賊帥，稱八大王。假官兵旗，襲南陽。屯南關。左良玉適至，疑而召之。獻忠窘逸去。良玉追及，兩馬相望，一箭中其眉心，一箭釘其中指於弓。靶獻倉皇間，良玉舉刀劈其面，血流被甲。孫可望力前格之，得免。逃至麻城。左帥追勦之。一晝夜行七百里。至穀城。戊寅正月，初九夜破之。出示民曰：本營志在匡亂，已逐闖兵遠遁。本營釋甲歸朝，乃拘耆老具結，遣可望以碧玉長尺餘者二方，圓徑寸珠二枚，賄文燦請降。文燦許焉。以僉事張大經監其軍。文燦庸鄙無能，駐節襄陽。於後圃種蔬，日用數十人灌漑。時旱，郡邑申文祈雨。文燦批文云：罽蔬，萬茂禾苗，何以獨枯？不過奸民爲適根地耳。其設施如此。左良玉謀於巡按林銘球，巡道王瑞旃，欲誘執獻。文燦曰：殺降不祥，力庇之。乃移其營於城內。獻恃文燦益無忌，私練士卒，造軍器，穀城諸生徐以顯一見如故，教以孫吳兵法。又乞職銜，索月餉。且請灑陝虛靈關五州縣屯馬步兵六千。己卯春，獻忠叛形愈著。良玉請討之。文燦故彰露其事，使

獻知之。強留良玉飲餞稽延時日。獻從容盡運兵械入房山。文燦始催出兵。則獻已叛矣。是時文燦招撫十三家賊。蜂屯蟻聚中州一帶。旋撫旋叛。巡按徐一茫謂可勦之。機會與能勦之物力都從撫裏錯過。良不誣也。穀城令阮之鈿。瀝血書絕命詞。死之。良玉聞變曰。經畧縱虎負嵎。使我撻之不去。必以逗遛罪我。令旗至。卽冒暑進兵。遇伏大敗。良玉列其狀。文燦死西市。命嗣昌代之。上寵餞甚至。親賦鏡歌二首贈行。御史張肯堂請著爲令。有創爲撫說者。議出。編氓行伍以奸細論。議出道將紳衿以通賊論。議出。督撫鎮帥以悞國論。疏入。嗣昌弗善也。嗣昌首倡聚斂。一議加勦餉三百萬兩。又加練餉七百三十萬餘兩。合舊派每年加二千三百萬。以致民窮盜起。至是力以滅賊自任。賊初聞嗣昌出。頗心怖。及嗣昌抵任。踵襲文燦招撫故智。謀以郟事委鄖撫袁繼咸。楚事委楚撫宋一鶴。一鶴貪懦巧諂。以嗣昌父名鶴。投謁自署其名曰一鳥。楚人爭傳笑之。嗣昌對守年餘。一籌莫展。自撤白虎之險。縱賊入川。賊勢益張。不可收拾。嗣昌

妄聽楊卓然之說。謂獻賊難圖。革左易撫。輒思舍難就易。檄左良玉趨皖。駕言川中零賊。不足復煩大兵。軍中咸知失計。良玉探識其奸。率兵竟去。連發十九檄。追之不返。賊復出。無當關者矣。且賊由西北。陸走襄陽。而嗣昌由西南。水走夷陵。歧路相避。猶飾稱鞭長不及。甚至地方失事。匿不上聞。而又虛設級。動云寇不足慮。瀘州知州蘇瓊等死於賊。嗣昌復砍其頭。充級報功。羣賊愈無所憚。庚辰六月。左良玉遣降將劉國能。圍獻於瑪瑙山。獻食盡。分兵四出抄糧。不得糧歸者。盡殺之。未歸者。請嗣昌降。良玉使國能將之前行。詐稱糧至。獻開營。延入國能。衆掃其營壘。擒其妻孥。與徐以顯、潘獨熬等。送襄陽獄。獻忠攀藤越嶺逃去。襄陽知府王承曾。素縱酒漁色。見獻忠妾。悅之。故疎其防。嗣昌檄至。獻邀於路。取檄。遣賊僞爲公差。夜叩襄陽城門。巡道張克儉。見符驗。延之入。時辛巳二月初五日也。漏四下。賊攻襄王府。焚端禮門。尋執襄王殺之。破獄。出以顯、獨熬等。獨熬者。應山諸生。富而吝。縣令婪其財。使人訐其不法。熬憤甚。越獄投

賊獻之文移。皆出其手。署襄陽事。李天覺城破。北面叩首。置印於案。自縊。推官
鄺曰。廣被執。大罵不屈死之。已而破隨州。知州徐世淳埋印。署後勒馬巷。戰矢
貫於頤。刀屬於頰。眼鼻橫斷。墮馬。右手握印箱。左手掣佩刀。賊鉞刀交下。陷胸
穴。股以死。子肇梁亦遇害。嗣昌在荆。慙憤縊死。廷臣交章論劾。上下其議。禮部
侍郎蔣德璟。謂其奸欺悞國。請用嘉靖中仇鸞例。斷棺戮屍。然上竟不罪嗣昌
也。嗣昌之在蜀也。安坐順慶公署。題扁自旌。大書鹽梅上將。迨瀘州破後。連陷
數邑。嗣昌猶在醉夢。命多備索子。綁賊蜀中。爭傳笑之。上以襄陽破。故逮郎撫
袁繼成。繼成立朝。負直聲。督學山西。備兵淮陽。武昌所至。以清惠稱。吏民歌思
之。至是合辭叩關。繼成亦出。嗣昌手書。明已無罪。尋察其枉。赦之。方獻與曹操
九股之在房竹山中也。李自成往依焉。獻謀殺自成。自成覺而逃去。入蜀。曹操
者。本羅汝才。與李自成同依高氏。高被擒。汝才走楚。已卯。自成自川潛渡入豫。
取洛陽。殺福王。內官崔升甫十三歲。勸福王寧死。勿屈抱王。不去。并見害。又破

永寧殺萬安王事聞。上震悼。兵科張縉彥奏福王身死社稷。守國大義。日月爭光。葬祭宜厚。從之。吏科章正宸奏闖賊從四川來。兵部尙書陳新甲急奏賊自秦來。不自川來。蓋嗣昌方奏扼賊於川。言從川來。則責在嗣昌也。又破葉縣。降將劉國能守葉。自刎死。其妻先死。其子方八歲。闖賊入城。抱置膝上。欲收養之。不從。自解所帶小刀。亦刎死。自成既入洛。撰九問九勸諸僞萬號召羣盜。勾引饑民。遂爲闖王。辛巳。自成獨雄一部。汝才改稱曹營。自成進圍汴梁。總兵陳永福從城上射自成。中其左目。幾死。督臣丁啟睿率諸將左良玉。虎大威等集兵朱仙鎮。與自成戰。全師皆潰。六月。賊曹分兵東南下。敗官軍於棗陽。復回豫。破南陽。殺總兵猛如虎。與官兵戰於鄆城。賊衆折傷。適奏撫汪喬年。又敗於襄城。喬年死之。賊資其甲馬火砲。乘勢破歸德。復圍汴。官軍敗績於水坡。賊勢張甚。巡撫高名衡推官黃澍固守不下。壬午五月。自成遂決河灌汴。城中諸貴官欲爲自脫計。亦繫堤引水。汴梁遂陷。名衡與澍等乘舟潰圍出走。餘淹沒死者數

十萬衆。上念防守勞苦。不深罪。但罷名衡官而已。蘄黃之寇復興。闞合諸渠帥。皆戴闞。王革則賀一龍。老獬。獬則馬守應。胡闞則蘭養成。爭世王賀錦。治世王劉希堯。皆爲闞偏裨。及破襄陽。下荊州。合兵鄖陽。闞令獬守夷陵。以犯禮常。革趨德安。以窺黃麻。十二月。陷承天。賊遣僞將王克生。決顯陵求寶。僞陽五知州張聯奎。多備鋏鋤。獻策求歡。賊方舉事。欸風雷大作。晝晦。聯奎見金甲將手持金瓜。當頂一擊。卽惜迷跌。地口鼻流血。一夜而死。聯奎宜城諸生。其妻何氏。固以貌都爲賊所執。守節不從。慷慨遇難者也。克生抓去。不知所在。衆賊驚散。闞大懼。遂不敢動。曹賊羅汝才聞之。以天命未改。潛謀歸順。欲殺自成。獻功。尋以印馬分營。起自成疑。癸未三月十日。自成設酒縛革。明日猝至曹營。斬羅羅部將楊承祖。素驍勇。率衆盡走鄖陽。投守臣徐起元。起元守鄖數年。處強敵之間。竟保殘疆無恙。皆羅兵力也。獬在禮聞變。闞調其兵回襄。不從。闞既廣收部曲。設僞號。自稱倡義大元帥。爲一品。權將軍。二品。制將軍。三品。果毅。四品。威武。五

品皆將軍，七品掌旅，八品部總，九品噴總。所授將帥田見秀、劉宗敏、賀錦、張鼎、黨守素、辛思宗、客可成、季友、任繼忠、吳光義、劉芳亮、劉希堯、李過自成等共兵二百三十餘隊。總計馬步兵六百餘萬。每隊立一標，旂行營望之而走。標營用白旗，纛皆用黑。左右前後分用黑白紅黃色。而纛隨之。自壬午年夏破荊，初改防禦使，府尹州牧，縣尹至癸未正月，欽天監博士楊永裕投闖，更設六政府侍郎。郎中從事諸官屬，侍郎則喻上猷、蕭應坤、楊永裕、郎中徐丘、王家柱、鄧岩忠、從事顧君恩、郭附龍、傅朝升、防禦則孟長庚、陳盡、季之綱、吳大鴈、黃閣、金有章、府尹則張虞機、姚胤錫、牛銓、劉蘇、鄧璉、劉茂先。又使任光榮守荊，蘭養成守夷陵。王文耀守禮，白旺守安陸，葉雲林守荊門，謝應龍守漢川，馬世大守景陵。高一功守信陽，周鳳梧守禹州。兵鋒所至，人心惶惶，皆棄城奔走。大江南北人無固志。獻忠因得乘機攻取。先是壬午六月破黃安，十二月破黃梅。癸未正月破荊承。荆王播遷，道臣張鳳翥、鍾祥知縣蕭漢死之。三月，蕪水鄉宦周之任勾賊。

破城。道臣許文岐死之。已而陷黃州。黃陂鄉宦歐陽玖迎降。惟樊維城殉節。維城固孝介。公玉衡。侄其父玉衡。以御史抗言國本被謫者也。貢生馮雲路。力學著書。精禪理。徵辟不就。賊慕其名。強起之。雲路不屈而死。其門人諸生汪陞。延亦死。諸生易爲瑚。父道暹。名重海內。前已與次子爲璉。罵賊死。至是爲瑚亦死。之四月。破麻城。從賊大逆。則劣生周文江居首。文江爲賊兵部尙書。有原任錦衣衛遣戍劉僑。托文江進二美妾。併金銀器皿玉杯古玩數萬金於賊。賊用僑爲錦衣衛都督。教諭蕭頌聖自殺。賊從鴨蛋洲渡武昌縣。知縣鄒逢吉死之。五月。破武昌。殺楚王。驅平民三十餘萬。溺之江中。故輔臣賀逢聖。朝服投江死。門生大冶諸生尹如翁。從之。楚府長史徐學顏。方署江夏縣。與賊格鬪。爲所支解。都司朱士哲。戟手罵賊。爲賊斷手而死。嘗武衡桂。在在告陷。衡陽知縣張明翼。罵賊不屈。縛擲中流。獻忠大肆殺戮。積屍浮江。江水爲赤。橫屍之慘。黃巢後未有也。八月。破岳州。復陷長沙。巡按御史劉熙祚。罵賊不屈。至血面刳腹。橫曳倒。

襟以死。長沙推官蔡道憲，殉義最烈。而江西袁吉一帶，面面與楚相通，賊從萍鄉、萬載、永新三路突犯。吉安、安福、廬陵、吉水俱破。後由湖南復入川。據險設官，僭大號，改元義武。置左右丞相，以顯爲右丞相。潘獨鰲爲中書舍人。築宮室臺觀，置酒自娛，不復出。上命江鳳黔、粵各督及鄖、皖、江、沅各撫，合兵勦賊。方獻忠、壬午之破武昌也，左良玉避其鋒，擁兵九江不敢逼。及獻既入蜀，良玉畧定武昌、漣陵、長沙、湘潭、湘陰并湖南一帶。又復岳州、監利、石首、上安、德安、隨州等處。總督呂大器又復袁州、萍鄉、萬載、吉安、廬陵、吉水、永新、太和、安福等處。大器沉毅知兵，方入援時，路過峽江城，門四閉，聞是官兵，反行遮殺。詒以八王兵到，開門出迎，手持縣印，口稱千歲。備有大馬二十五匹，糧草無數。新舊知縣俱已拿下。聽候發落。大器立取奸民梟示之。次第恢復時，自成已據全洛，直窺陝西。總督孫傳庭故將家子，然性怯懦，不知兵，好大言。九邊精銳悉隸麾下。又據潼關之險，自成欲誘致之。每戰輒匿精銳，驅雞民當前。因是多所斬獲，傳庭志

益驕。屢疏奏捷。且上言有自賊中逃回者。言賊聞臣名皆驚潰。上信之。因召對羣臣。出傳庭疏示衆。兵部侍郎張鳳翔獨言賊素狡多詐。示弱不可信。且傳庭所統皆良將勁兵。不如爲陛下留此家。當上日攝之。羣臣窺上意。爭請命傳庭進勦。未幾果覆師。乃削傳庭職。充爲事官。扼守潼關。加白廣恩陝西總兵官。提兵援勦。進士程源疏言殲大寇必圖大舉。合數十萬之衆。八面而齊攻之。誰應援誰擊寔誰牽制誰批腹着着照應使之疲於奔命救不暇然後可一鼓成擒。乞勅傳庭憑關固守勿事浪戰。書奏不省。十月初六日傳庭開關延敵。賊伏精銳關前。引傳庭出。遂奪關入。三秦頓失。改西安爲長安府。十一月考校州縣生員。一等與六政府屬。二等與州縣。三等與佐貳。是月攻榆林不利。再攻乃剋。又攻慶陽亦剋。一時死職者。巡撫馮師孔。按察使黃綱。長安知縣吳從義。渭南知縣楊暄。蒲城知縣朱一統。商州巡道黃世清。慶陽守道段復興。慶陽知府董璣。榆林守道都任合門。雉經中部知縣朱新達。自知城守不支。先令妻妾縊。一

妾尙未配。合新達叱令去。妾不可垂泣而縊。然後新達自盡。原任總兵尤世威舉家百口付之烈焰。身衝鋒刃。戰死街心。原任總兵侯世祿。侯拱極。王學書。王世欽。王世國。李昌期。原任副將翟文。常懷德。李登龍。張發。楊明。原任游擊孫貴。龍養崑。原任守備白慎衡。全家絞。現任游擊傅德。惠憲。潘國臣。李國奇。晏維新。陳二典。劉芳馨。劉廷杰。文侯國。現任守備尤勉。惠漸。賀天雷。楊以偉。掌印指揮李文焜。皆不屈死。而鄉紳死難。則原任吏部尙書南師仲。禮部主事南居業。山東巡案御史王道純。誥封副都御史朱賞德。宗室舉人朱誼泉。原任太常少卿麻僖。原任大同巡撫焦源溥。以罵賊斷舌死。原任宣府巡撫焦源清。以不受僞職死。原任磁州巡道祝萬齡。深衣大帶。至關中書院。斯道中天閣下。哭拜。宣聖從容自經死。朝議以兵部右侍郎俞應桂爲總督。而命御史霍達監其軍。達秦人也。夙負才畧。習知地利土著。故用之。十一月初三日。上召對。諭以有真。勦然後有真。撫有好。將自有好。兵有好。有司自有好。百姓在爾寔心爲之。命達作速。

前去料理。遼痛哭敷陳。言西安若在。臣不以惜死報皇上。比至則僞官充斥。赴任無地。脫是時中樞稍知兵。當賊困榆關。勿狃小喜。預請濟師。爲犄角。可令賊奪氣去。卽不然而堅壁死守。勤王兵集。賊亦鳥奔獸散。乃一籌莫展。束手待斃。迨甲申春正月。大司馬張縉彥方奉召至。雖拮据綢繆。而賊已由秦越晉直灌畿南。勢如破竹。莫有當關者矣。元日大風。震屋揚沙。咫尺不見。時滿州建國號曰大清。改元順治。而賊僭位西安。妄稱大順。年號永昌。恣掠河東。河津稷山。灤河絳州一帶。初三日。上特召左中允李明睿。陸見明睿。南昌人公忠。練達。以總憲李邦華。總督呂大器。特薦。召起田間。明睿初欲勸上西遷。長安一以親征。挫賊之鋒。一以就甘肅。寧夏之士馬。一以就咸陽之王氣。蓋咸陽爲古帝王共建之都。四塞之固。天下共聞。以下令於諸侯。猶居高屋之上。建瓴水也。此誠上策。比聞賊入關。念只有南遷一策。可以圖存。轉危爲安。至是召對德政殿。上問禦寇急策。明睿請屏左右。密陳趨近御案。與御衣接。言臣自蒙召以來。探聽賊

信頗惡。今日近逼畿甸。此誠危急存亡之秋。皇上不可不長慮却顧。只有南遷一策。可緩目前之急。徐圖征勦之功。上曰。此事重大。未可易言。以手指天言。上邊未知如何。明睿曰。惟命不於常。善則得之。不善則失之。天命微密。全在人事。人定勝天。皇上此舉。正合天心。差之毫釐。謬以千里。知幾其神。况事勢已至此極。詎可輕忽因循。一不速決。異日有噬臍之憂。當局者迷。旁觀者清。皇上可內斷之聖心。外度之時勢。不可一刻遲延者也。若築舍道旁。三年不成。此事。后雖欲爲。有不及爲者矣。言之痛切。上四顧無人。云。此事我已久欲行。因無人贊襄。故遲至今。汝意與朕合。此意決矣。但外邊諸臣不從。奈何。爾且密之。密之上。復問中途接濟。睿奏沿途接濟。固不可少。然不如四路設兵。四路者。東。山。東。西。河南。此旱路也。登萊海船。通州運河。此水路也。然皇上却應從東小路。輕車南行。抵淮上。二十日。文王柔順。孔子微服。此之謂也。上曰。然此事重大。不可輕洩。洩則罪坐汝。睿奏臣謀之。臣敢洩之乎。但祈皇上聖斷。皇上但出門一步。龍騰。

虜躍不旋踵。而天下運之掌上。若兀坐北京。堅守危城。無益也。上曰。朕知道了。隨退還宮。賜宴於文昭閣。日午。上又召對內殿。睿極陳枚卜考選之弊。請著爲令。不立邊功。不許枚卜。不立邊功。不許考選。又言兵餉缺乏。民窮財盡。目前只有速發內帑。足濟燃眉。上言內帑如洗。一毫無措。睿奏祖宗二百年來積蓄。度不至是。上曰。其寔無有。命出外賜茶。未幾夜漏初傳。上又召睿進內。近御案間所奏事。卽欲行之。誰可接濟。途間用何等官員。領兵措餉。駐紮何等地方。睿奏濟寧淮安。俱緊要地方。不可不設官。須擇重臣領兵領餉。皇上雖間道微行。此兩處扼要。不可不豫爲防。又問是何等官銜。睿奏須戶兵二部堂上官。上曰。然此時兵俱在關門。大將俱在關邊。調遣甚難。奈何。睿奏近京八府。尚可招募。皇上此行。京城尙須人料理。關門兵不可盡撤。各邊大將不可輕調。惟有在內公侯伯及內閣六部文武大臣。皇上不妨召至御前。面試其才能。推轂而遣之。上曰。然睿復奏內帑不可不發。除皇上服御外。一臺俱是長物。當發出犒賞軍士。

萬一行至中途。賞賜不足。區處甚難。留之大內。不過朽蠹。先時發出一錢。可當二錢之用。急時與人萬錢。不抵一錢之費。上又曰。然戶部也。着措置。睿復奏。靠不得外邊。如今三空四盡。戶部決難湊手。乞皇上自爲宗廟社稷計。決而行之。無待臨渴掘井也。上皆領之。須臾漏下二鼓。命睿出宮。大學士李建泰。自言西人。知賊中事。請督兵。眞保以扼賊衝。上壯之。命爲督師。擇吉二十六日寅時。告太廟。卯時行授鉞禮。殿梁響聲大作。如摧折然。巳時。駕登正陽門樓。親餞官軍。旗旛十餘萬。自午門外排至正陽門外。旌旗金鼓甚盛。文武百官。聞召俱至。上獻諭。建泰再三曰。先生此去。如朕親行。賜坐賜宴。列席十九。文東武西。御席居中。御用金臺爵。皆嵌木寶石。是累朝重器。諸臣則皆金杯也。上復親遞建泰三杯。卽以三賜。腸之復出。御撰手勅。獎諭親臨。正陽用寶。以賜內璫。爲掛紅簪花。鼓樂導尙方劍而出。建泰甫出宣武門。輿頓忽折。是日諸臣又公餞於護國寺。建泰意氣英上。言方入寺時。視其印綬。忽發大如斗。同官相與賀曰。此指日成。

功取金印如斗兆也。比聞賊信洶洶，建泰益遲遲其行。日止三十里。至涿州營兵三千逃回。過東光。兵不戢，民閉城門。建泰怒，留攻三日克之。進退無措。惟遼巡畿內而已。賊移檄遠近有云：君非甚黷，孤立而煬蔽恒多。臣盡行私比黨而公忠絕少。甚至賄通官府，朝廷之威福日移。利入戚紳，閭左之脂膏盡竭。又云：公侯皆貪肉紉袴，而倚爲心腹。宦官悉齷糠犬豚，而借其耳目。獄囚纍纍，士無報禮之思。征歛重重，民有偕亡之恨。人讀之無不扼腕。先是賊破榆關，長河二千五百里之防，晉獨當之。賊衆眈眈，窺渡。巡撫蔡懋德南北策應，大慶風陵兩挫賊鋒，尋以保德州告急還省。巡案御史汪宗友特糾其懦，以郭景昌代之。未至，副將陳尙智投賊爲前驅。總督俞應桂畏賊甚，遲迴河上，一無所爲。二十九日，賊從沙渦竟渡。三晉遂成破竹之勢，旣陷平陽，直困太原。賊馬步號五十萬，懋德誓衆死守，登陴拒敵。矢石火藥傷賊甚衆，裨將朱孔訓、牛勇力戰死之。已而城東南角樓砲裂焚毀，風沙陡作，對面莫辨。守門將張雄爲賊內應，城遂陷。

時二月十五日也。懋德繕遺疏。授贊畫知縣賈士璋。遂自刎。爲衆所奪。中軍應時盛扶上馬。欲衛出城。懋德曰。吾封疆之臣。應死封疆。汝輩自去。豈欲陷吾不忠乎。遂至書院三立祠。惟時盛相隨。懋德南向自縊。軀輕氣未絕。時盛解鍬甲覆其身。候氣絕。亦東向自勒死。蓋時盛係遼諸生。爲懋德識拔。隸麾下。見革遺疏。卽歸寓。殺其妻妾。與十四歲子期以死殉。布政趙建極。巡案陳純德等。同死四十六人。十六日。賊到忻州。進攻代州。五臺知縣投降。地方官有載牛酒以迎者。有備子女以獻者。上集府部九卿翰林科道等官。會議禦寇措餉長策。令各書單進呈。內言措餉如贖罪。勸輸及勦賊人等。多貯本色。近海州縣。宜輸本色。裁冗將。急屯墾。鹽鑄。海運。言勦寇如鼓勵土寨。攻潼關。收拾技勇。令畿內州縣各自扼守。徵遺逸以收人才。做鎮藩以省兵費。皆切寔可用。踰日又召對。上手摠憲李邦華密疏。內云。輔臣知而未敢言。其試問之上。問何事。陳演對中允李明睿疏。少詹項煜議單。先是邦華與明睿私議南遷。上親行與東宮孰便。明睿

曰。太子少不更事。稟命則不威。專命則不敬。不如皇上親行爲便。於召對後。卽繼以疏。大畧謂今日所最急者。無如親征一事。京營甲兵。不下數十萬。近畿召募。可得數十萬。但得聖駕一出。四方忠臣義士。英雄豪傑。必有聞風嚮應者。昔太祖高皇帝。不嘗戰於鄱陽乎。成祖文皇帝。不嘗戰於漠北乎。世宗肅皇帝。不嘗幸承天乎。祖宗勦業艱難。櫛風沐雨。披荆棘。斬草莽。皇上欲安坐而享之乎。此何時也。而爲此迂濶不切之論乎。黃帝曰。日中見彗。操刀必割。言貴時也。時者難得而易失者也。山東諸王府。皆有宮殿。聖駕不妨暫駐蹕焉。待大兵雲集。勤王之師畢至。然後徐議西征。賊聞天子自來神武。先已伐謀。勢必倒戈相向。而又運河設船。登萊跨海。山東河南。兩路並進。切近鳳陽。祖陵在焉。皇上又可駐蹕。夫親征之舉。以號召忠義。皇上倡之。不必皇上自爲之也。南京尙有兵部尙書史可法。操江誠意伯劉孔昭。此皆忠良。曉暢軍務。可寄以大事。皇上不妨召而與之謀。事無大小。悉以諮之。必能摧陷廓清。建此中興大業。臣又聞居庸

一帶無兵把守。昌平一路無人控扼。奸人從旁窺伺。中官妄意綢繆。實非完善一策。伏乞卽日調度諸將。從皇陵山外繞鞏華城。俱宿重兵。命東宮居守。入則監國。出則撫軍。此皇太子之職。皇上吉日啟行。留相臣魏藻德。方岳貢。護衛東宮。輔導起居。料理居守兵事。三輔重地。皇上自爲督率。六飛親駕。萬姓雷動。兵士氣鼓。軍中皆呼萬歲。真定以東。順天以西。可無慮賊氛之充斥矣。不然日逐一日。優柔不斷。天下大事。尙可爲哉。疏入。上深許之。下部速議。而兵科給事中光時亨。首參爲邪說。言不殺明睿。不足以安人心。睿復上疏言。臣勸皇上親征。非臆說也。古人已行之矣。古人用兵。有爲弔民伐罪而出者。湯武是也。有爲復仇雪耻而出者。光武是也。有爲爰整徂旅以遏徂旅而出者。文王是也。有爲蚩尤逆命而出者。黃帝戰于涿鹿是也。此皆聖帝明王。與英君誼辟。不忍天下之陸危。冒白刃。犯鋒鏑。以身先士卒。非好之也。有所大不得已也。皇上試思昔之開天闢地者。無如漢高祖。唐太宗。宋太祖。有一不從戰爭。撻伐中。磨礪而出者。

乎我朝開天闢地者無如高皇帝有一不從衝鋒陷陣而成者乎若使鄴陽之戰稍懈或命將出師而不親歷戰場將見僞漢立奪南昌而東南半壁之大事去矣皇上一言一動無不法祖而謂今日之舉有拂於高皇帝之心乎且今日臣之進言爲親征也而諸臣妄意以爲南遷就使皇上發策南遷此亦救時急着易曰利用爲依遷因書經盤庚一篇皆言遷國之事唐室再遷再復宋室一遷南渡傳國一百五十年若唐宋不遷當時已早繫組北轅又何有於靈武武林之恢復又何有於百年百五十年之曆數哉上時簡閱嘿然卽召光時亨入面詰曰一樣邪說却只參李明睿何也顯是朋黨又曰光時亨阻朕南行本應處斬姑饒這遭然而南遷之議寢矣事介呼吸一失莫道分勅太監高起潛等十人監制寧前通津各鎮兵部尙書張縉彥疏言今日糧餉中斷士馬虧折督撫各官危担欲卸重責欲分若一時而添內臣十員不惟物力不繼有失體統抑且事權分掣大悞封疆不聽又遣太監王坤同給事中馬嘉植韓如愈辜朝

荐往直浙閩廣督餉。戶部尙書倪元璐、兵部侍郎金之俊等合疏諫止，亦不聽。三月朔，巳丑，昌平兵變。京師戒嚴。上傳勦賊科道分守九門。辛卯，出兵部尙書張國維於獄，命往浙直督理兵餉，加魏藻德兵部尙書、天津調兵。方岳貢戶部尙書、濟寧督餉，不果行。壬辰，欽天監奏帝星下移，詔加修省。大學士蔣德璟予告回籍。癸巳，發內帑十萬，遣太監杜之秩、總兵官唐通、協守居庸關、封疆重犯俱許贖贖。又加太康伯張國紀、嘉定伯周奎、侯爵各蠲萬金。太監王永祚、曹化淳、蠲至三萬五萬兩，特賜建坊廕子，以示優異。又設黃綾冊，募百官蠲助。有以衛門分任者，有以省直彙集者，大小不遺一人。甲午，封唐通、定西伯、吳三桂、平西伯、黃得功、靖南伯、左良玉、寧南伯、劉澤清、東平伯。乙未，賊陷大同。巡撫衛景瑗死之。丙申，陷寧武。總兵周遇吉死之。遇吉夫婦臨陣殲賊無數。賊誘降不從，及力盡，全家赴火，賊屠其城。是日，隨至宣府，人無固志。巡撫朱之馮自殺。總兵姜勳降。丁酉，陷陽和。己亥，至居庸。杜之秩、唐通降。巡撫何謙遁。隨破昌平。總兵

李守錡自殺。辛丑。兵部尙書張縉彥議刻期調勤王兵。壬寅。頒罪已詔。大畧云。朕爲民父。不得而羽翼之。民爲朕子。不得而襁褓之。坐令秦豫丘墟。江楚腥穢。貽耻宗社。負疚黔黎。罪非朕躬。誰任其責。所以使民罹鋒鏑。冒水火。血流成壑。骸積成山者。皆朕之過也。使民輸芻輓粟。居送行齎。加賦急無藝之征。預支有稱貸之苦者。又朕之過也。使民室如懸磬。田盡汗萊。望烟屋而無門。號冷風而絕命者。又朕之過也。使民日月告凶。旱潦荐至。師旅頻仍。疫癘爲殃。上干天地之和。下叢室家之怨者。又朕之過也。至於任大臣而不法。用小臣而不廉。言官首鼠而議不清。武將驕懦而功不舉。皆由朕撫馭失道。誠感未孚。終夜以思。踴躍無地。用是大告天下。痛加剋艾。要在惜人才。以培元氣。守舊制。以息煩囂。行不忍人之政。以收人心。蠲額外之科。以養民力。念用兵征餉。原非得已。各撫案官。亟飭有司。多方勸輸。無失撫字。倘有擅加耗羨。矇混私征。又濫罰淫刑。致民不堪命者。立行拿問。其有流亡來歸。除盡豁逋賦。仍加安插賑濟。毋致失所。至

於文武罪廢才果堪用。着吏兵部確核推舉。若艸澤豪傑之士。有能恢復一郡一邑者。便與分官世襲。卽陷沒脇從之流。有能反正來歸者。准與赦罪立功。若能擒斬闖猷。仍予通侯之賞。起復太監曹化淳守城。又命收葬魏忠賢骸骨。時日色連旬無光。是夜風沙刮天。癸卯。賊權將軍發僞牌。定於十八日入城。至幽州會同館繳。都人駭之。甲辰。日晡。賊犯十二陵。焚享廟。伐松柏。是夜賊自沙河直犯平子門。乙巳。出巡撫董象恒。曾纓。鄭二陽。等於獄。時城守悉宦官爲政。大司馬張縉彥面奏請添總督。添科道。又開薦科臣龔鼎孳。道臣周元亮等。命不下。太監王德化暗調杜勳上城。縉彥劾之。上手勅兵部尙書親往驗視。及縉彥到而德化又暗縋下矣。城上虛實盡被敵窺。賊衣黃甲。四面如黃雲蔽野。炮聲轟轟不絕。守牌軍皆貴近家。詭名冒糧。臨時倩窮人代役。僅給黃錢五十文。雖外城二堵置一卒。內城五堵置一卒。率飢疲不堪任。丙午。早大雨。賊攻西直不克。攻彰義門。門忽啓。德勝平子二門亦隨破。或云太監曹化淳內應。或云王相堯官軍悉烏獸散。

賊遂薄內城。城上砲雖林立。不過乾嚮。是日上又召對。嘆息與閣臣言。不如大家。在奉先殿完事。更餘召太監王承恩入。整內員爲出下計。又傳硃諭至內閣。命成國提督內外諸軍。夾輔東宮。已而微服欲奪門出。不得。望見正陽門城上懸白籠燈三碗。知大事已去。卽刻還宮。白籠燈者。自一至三。以表寇信之緩急也。上乃先殺公主。或云死未次殺袁妃。周后返坤寧宮。自盡上。然後走煤山。縊死。外人喧傳以爲駕已出也。十九日丁未。黎明內門大開。宮人狂走。錦衣衛方僉牌禁訛言。而城中坑廁俱賊矣。京城壁立千仞。賊砍楊樹爲雲梯。漏下五鼓。使孩兒軍從東北蹂升以上。孩兒軍者。賊中年少童子。習殺掠。閔不畏死者也。城中火起。順成齊化東直諸門。一時俱開。日午。自成擁百餘騎。直入紫金城。僞軍師宋獻策。永城人。長不滿三尺。軍中呼爲宋孩兒。僞內閣牛金星。河南人。乙卯孝廉。僞將軍主者爲劉宗敏。李牟。副則田化龍。李岩等。分將各兵。百姓操香伏迎。門俱粘順民字。賊兵恣行殺掠。婦女淫污死者。并洿梁屋皆滿。賊懸萬金賞購。

先帝未幾得太子諸王。幽宗敏營中。內庫尙存。鎮庫金銀無數。掌書宮人杜氏。陳氏竇氏爲賊所錄。明日賊出示安民。午刻得先帝凶問。縊於煤山之紅閣。紅閣者。先帝爲內操特建者也。司禮太監王之心跪帝膝前。引帶扼脰同死。所御玄色纓邊白綿紬背心。有御筆血詔云。朕在位十七年。薄德匪躬。上邀天罪。至虜入內地四次。逆賊直逼京師。諸臣誤朕也。朕無顏見祖宗於地下。將髮覆面而死。任賊分裂朕尸。勿傷我百姓一人。初燕都之遷鼎也。大內有密室。劉誠意留秘記。鑰鑰甚固。相誠非大變勿啟。癸未秋。清兵圍城。上啟視室中惟一櫃。發之得繪圖三軸。第一圖繪文武百官數千。俱手執朝服。披髮亂走上詰問。內臣答曰。或恐官多法亂。第二圖繪兵將倒戈棄甲。窮民負襁奔走狀。上又問。內臣答云。想軍民皆叛也。上勃然變色。再展第三圖。圖像酷肖聖容。身穿白背心。右足跣。左足有襪履。披髮中懸。於今日分毫不爽。賊命以雙扉昇帝后於東華門側。歛以柳棺。覆以篷廠。莫有敢往哭者。賊命百官次早覓朝。又拘各衙門長。

班報名先後死節最著者。刑部侍郎孟兆祥死正陽門下。子進士章明闔家自殺。大學士范景文先不食三日。城陷號泣投井死。戶部尚書倪元璐紗續絳衣以酒奠。漢壽亭侯南面坐自縊死。翰林院簡討汪偉貽書戒子以忠孝。引鄉先輩趙昂發夫婦爲比。大書壁上。身不可辱。志不可降。夫妻同殉。節義成雙。同妻耿氏正位就縊死。吏部員外許直賦詩六章。有愿侍吾皇。過諸帝。祈哀仍使國威揚。丹心采雪。生前恨青簡。空留死後聲之句。冠服自縊死。左都御史李邦華聞變拜闕。自題壁曰。堂堂丈夫。聖賢爲徒。忠孝大節之死。靡他。走文丞相祠自縊死。左諭德劉理順題壁有云。成仁取義。孔孟所傳。文信踐之。吾何不然。科名既占。豈肯苟全。三忠祠內。無愧前賢。與妻萬氏。妾李氏。及僕四人俱縊死。兵部主事金鉉。易麻素加冠袍。躍入皇城御河死。母章氏。妾王氏。弟琮。同時赴井死。大理卿凌義渠。慟哭觸柱。血淋漓沾袖。盡焚所著書。易緋衣。設香案。再拜自縊死。遺命惟曰。死後書我。柩云。死節孤臣。凌義渠之柩如是而已。兵部主事成德。

貽書諭德馬世奇。相約死難。以慷慨從容二義爲質。操鷄哭奠梓宮前。叩首觸階死。母張氏亦自縊。左諭德周鳳翔。同二妾自經死。賦絕命詩有云。碧血九原。依聖主。白頭雙老望。忠魂太常少卿吳麟徵。走三元祠。索酒痛飲。絕筆以身居諫垣。不能匡國法。應褫服殮時。用角巾青衫。覆以單衾。墊以布席。棺宜速歸。爲言。又寄弟麟瑞書。則憂江南有事。寄從弟書。則明生平欲學文山之志。寄諸子。則教以讀書明理。遂投繯死。右諭德馬世奇。沐浴衣冠。捧所署司經局印。北面再拜。付僕間赴行在。復南面拜母。與二妾朱氏李氏同盡。其未死前。答兵部成德書。以吾輩舍一死。更無別法。吾不爲其難。誰爲其難者。御史王章與光時亨巡城。賊奄至。叱下馬。時亨降。章不屈。賊砍三刀。墮城下死。戎政侍郎王家彥。督守安定門。門破。以不得追隨。乘輿觸死。輦前爲恨。走民間空屋縊死。副都御史施邦曜。太僕寺丞申佳胤。刑科都給事中吳甘來。御史陳良謨。俱自縊死。甘來先期托子與友。賦詩有云。君臣義命乾坤晚。狐鼠干戈風雨秋。邦曜賦詩有云。

慚無半策匡時難。惟有微軀報聖恩。良謨妻時氏從之。勳戚則新樂侯劉文炳。擇一大井合男女十六人盡投其中。縱火焚宅。慷慨躍入就義最烈。惠安伯張慶臻盡散財物於親戚。致酒團飲。四面積薪。全家共焚。東宮侍衛周鏡。母妻一門俱殉。駙馬都尉鞏永固。子女數人悉繫。公主柩前縱火焚宅。大書世受國恩。身不可辱八字。然後就縊。他若中書舍人宋天顯。賊迫書僞詔。天顯擲筆謾罵。觸階死。衛經歷施溥。仰藥死。毛維張。拷掠死。順天府學教官五人同縊。明倫堂上工部郎中李逢申。主事王鍾彥。順天府推官劉有瀾。光祿署丞于騰蛟。副兵馬指揮姚成。錦衣衛指揮李若璉。街道房千戶高文采。英國公張世澤。清平伯吳遵周。陽武伯薛濂。博平侯郭振明。永寧伯王長錫。彰武侯楊某。太監王承恩。王之俊。俱死之。而江米巷口有傳神者。夫婦同縊。又有童生周姓。憤激搥胸。嘔血數升。一慟而絕。布衣湯文瓊。自刎死。生員曹文曜。居民田氏。李小槐。閤門俱死。文瓊書其身曰。位非文丞相之位。心存文丞相之心。識者哀之。在外則蘇州。

諸生許琰聞變痛哭絕粒不食號呼先帝以卒襄城伯李國楨請勿犯陵寢改殯先帝后勿害太子二王三事賊並諾乃易他棺葬以帝祭以王數日後葬於田貴妃墓之斜。惟國楨一人往送國楨隨自殺各官皆責助餉極刑榜掠陳演獻至銀三萬兩金三千兩珠三斗丘瑜初被執即自縊爲賊救醒後服冰片死其未執前卽書絕命詞有云百歲春光強過半匡時力短媿鳴珂詩書萬卷都無用惟有先賢正氣歌又諄諄勉子之敦以忠孝有到處青山可埋吾骨何必故鄉等語方岳貢魏藻德俱被刑藻德自勒死岳貢不食死其餘或用或逃或刑姓氏未詳兵將充塞街巷恣意淫掠惟殉難諸臣門賊令不許騷擾盡放贖城罪囚是時畿內各屬望風歸順惟保定猶誓死拒戰至四面環攻力竭不支二十四日方陷一時在事諸臣則有甫到未任知府何復親放藥礮被火燒死同知邵宗立卽時投縊太監方正化城頭殺死鄉紳則光祿少卿張羅彥自縊進士張羅俊罵賊被殺武進士張羅輔城破巷戰手刃數人而死以及婦女幼

子張氏一門死者二十餘人。御史金毓嗣分守西門。奮拳擊賊。投井。妻王氏自縊。侄振孫爲賊支解。子嬰。媳陳氏。與其祖母張氏。母楊氏。嫂常氏。俱投井死。都指揮劉忠嗣。罵不絕口。身被數鎗。立死不屈。舉人張爾輩。抗賊被殺。高涇被執。殺死水中。河間知府方文耀亦死。明朝制度。賊任意紛更。閣改天祐等名。六部尙書爲政府。翰林院爲弘文館。文選司爲文諭院。御史爲直指。給事中爲諫議。主事爲從政。布政爲統會。巡撫爲節度使。按察爲防禦使。尙寶爲尙契司。太僕寺爲驗馬寺。通政使爲知政使。中書爲書寫房。府爲尹。州爲牧。縣爲令。武臣守備爲守領。把總爲守旅。公服領尙方。以雲爲級。一品雲一。二品雲二。乃至九品。雲悉如之。帶用犀銀角三等。廢輿乘馬。大篆曰符。小篆曰契。先鑄永昌錢。字不成文。又鑄九璽不成。每陞御座。輒目眩頭暈。見白衣人數丈長者前立。四月三六九日。官民三次勸進。其文有云。比堯舜而多武功。邁湯武而無慚德。賊命毀太廟神主。遷太祖神主於歷代帝王廟中。擇二十九日。登極受朝賀。庶吉士魏

學濂死之。濂固忠節公大中之子。孝子學伊弟也。先是濂遣間使走洛城。聯絡義旅。冀得一當翼輔皇嗣。既聞太子二王俱爲賊得。知事不可爲。遂就縊。其絕命詞有云。忠孝千古事。於我只家風。一死輕鴻毛。臨難須從容。有血。麗。微。軀。官。卑。非。侍。中。有。舌。且。存。之。并。遜。常。山。公。因。約。同。志。友。延。頸。受。霜。鋒。不。能。張。空。拳。與。彼。爭。雌。雄。不。能。奉。龍。種。再。造。成。奇。功。死。且。有。餘。罪。何。敢。言。丹。忠。所。痛。母。垂。白。七十。仍。尸。饗。未。葬。凡。五。喪。留。與。子。侄。封。人。生。誰。百。年。壽。夭。死。所。同。我。比。兄。與。弟。我。年。獨。爲。豐。高。堂。無。復。悲。譬。不。生。阿。儂。辭。母。却。就。父。生。死。猶。西。東。骸。骨。雖。不。歸。卽。瘞。此。詩。筒。基。木。有。拱。時。清。韻。入。楸。松。是。時。吳。三。桂。率。兵。入。關。報。至。軍。民。鼎。沸。蓋。三。桂。以。征。遼。前。鋒。將。軍。宿。重。兵。於。寧。遠。城。計。其。部。下。原。有。寧。遠。精。兵。四。萬。遼。民。七。八。萬。皆。耐。搏。戰。而。彘。丁。數。千。尤。爲。雄。悍。賊。素。畏。之。先。是。朝。議。撤。寧。遠。守。關。門。三。桂。與。薊。督。王。永。吉。遼。撫。黎。玉。田。大。司。馬。張。縉。彥。主。之。謂。寧。遠。孤。懸。二。百。里。外。四。面。阻。敵。防。禦。極。難。且。寇。氛。日。迫。三。輔。震。驚。宜。撤。寧。遠。入。守。關。門。挑。選。銳。士。西。

行。遇寇。卽京師猝驚。關門之援。旦夕可至。上下其議。給事中吳麟徵言。撤之便。一時廷論羣嘩。諸閣臣尤相左。其言三桂之調不調。視寧遠之棄不棄。無故棄地三百里。臣等不敢任其咎。事遂寢。迨寇患急。朝廷悔之。屢下旨。撤督臣永吉。以三月初旬出關。徙寧遠五十萬衆。日行數十里。十六日入關。二十日抵豐潤。京師陷矣。三桂聞變。憤甚。頓兵山海。走清朝乞師。許之。四月初。賊命三桂父驥作書招桂。賚銀四萬兩。遣唐通牒之。別以賊兵二萬守邊。三桂佯受其金。而不意。盡行砍殺。賊將負重傷逃歸。三桂致書絕父云。兒以父蔭。熟聞義訓。得待罪戎行。日夜勵志。冀得一當。以酌聖眷。屬邊警方急。寧遠巨鎮。爲國門戶。淪陷幾盡。兒方力圖恢復。以爲李賊猖獗。不久卽當撲滅。恐往復道路。兩失事機。故爾暫稽時日。不意我國無人。望風而靡。吾父督理御營。勢非小弱。巍巍萬雉。何至一二日內。便已失墮。使兒捲甲赴闕。事已後期。可悲可恨。側聞聖主晏駕。臣民慘辱。不勝眦裂。猶意吾父素負忠義。大勢雖去。猶當奮挺一擊。誓不俱生。

杏則刎頸闕下以殉國難。使兒縞素號恫。仗甲復仇。不濟則以死繼之。豈非忠孝。媿美乎。何乃隱忍偷生。訓以非義。既無孝。寬禦寇之才。復媿平原罵賊之勇。父既不能爲忠。臣兒亦安能爲孝。子乎。兒與父訣。請自今日。父不早圖。賊雖置父鼎俎。旁以誘三桂。不顧也。自成怒。即於十三日率兵往戰。盡戮吳驥家口三十餘人。三桂痛哭誓師。令其兵皆薙髮。刻期勦賊。軍聲大振。賊戰敗於一片石。二十六日。狼狽還京。誅陳演。及成國。定國。諸勳戚。二十八日。悉銳西行。輜重無算。或曰。太子二王。挾之俱出。二十九日。焚宮殿。後隊亦盡去。又三年。自成病死。羅公山。其侄一隻虎。以帝禮葬之。即率衆降於何騰蛟。先是陝西參政都任。憤李賊所至掘陵塚。甫蒞延安。即拘李氏宗。而詰自成父母骸骨何在。初噤不吐。則大呼。吾將盡掘李姓墓。始有報者。發視則膚色如生。骨且有肉。乃刃剗而糞。溺之。快哉。五月初一日。傳言太子即位。百官迎候於朝陽門外。比初三日。駕至。則清朝攝政王也。王登武英殿受朝賀。問漢官何人最賢。衆舉李明睿對。命

爲禮部左侍郎。明睿以病辭。王曰。爾朝皇帝尙未收歛。明日卽欲令京城官民人等哭臨。無神主何以哭臨。無謚號何以題神主。明睿聞言大慟。王義之卽命議謚於朝房。謚先帝爲懷宗。端皇帝。周皇后爲烈皇后。安奉神主於帝王廟。初六至初八三日。萬姓哀號如喪考妣。尋命造陵。衆以田皇妃墳弘厰壯麗。明睿經營相度。厝先帝於中台。周皇后居左。田皇妃居右。不十日竣事。王出示京城。令官民除服剃頭。衣冠悉遵清朝之制。自是京城內外盡皆羅髮。清朝建都於燕云。

明季南北遺聞

日本
原 版
明季南北遺聞南都

江左鄒 漪流綺輯

崇禎十七年三月。賊李自成逼京師。南京兵部尙書史可法。督兵勤王。四月十日。聞京師陷。先帝殉社稷。南京府部科道等官。會議推戴討賊。時惠王桂王道遠難至。潞王福王周世孫各避賊。舟次淮安。潞王人望所屬。倫序稍疎。鳳陽總督馬士英移書可法。及署禮部兵部侍郎呂大器等。請奉福王爲帝。可法大器持不可。二十七日。右都御史張愼言。戶部尙書高弘圖。詹事府詹事姜曰廣。吏科給事中李沾。河南道御史郭維經。誠意伯劉孔昭。司禮太監韓贊周等。復集朝內會議。獨大器後至。議不決。孔昭沾贊周力持之。遂以福王告廟。五月初一日。王入京。以內守備府爲行宮。各官朝見。靈璧侯湯國祚。奏戶部斬餉語過激。大器以非對君禮呵之。御史祁彪佳奏綱紀法度爲國之本。李沾等言朝班宜肅。彪佳又言宜早頒大號。敬天法祖諸事。允之。各官退議。宜先監國。後登

極。孔昭請卽正位。彪佳言。監國名極正。益彰賢德。且示謙讓。使海內知無因以得位之心。俟發喪。擇吉登大寶。布告天下。爲當禮部。魏國皆然之。乃定。以初四日監國。十五日卽位。改元弘光。召可法。弘圖。士英入閣辦事。又用姜曰廣。王鐸。俱爲大學士。改慎言吏部尙書。士英掌兵部。弘圖掌戶部事。可法請督師。江北。士英專國。陞大器。吏部左侍郎。沾太常寺少卿。維經應天府丞。進督周司禮監兼筆。餘各加恩有差。起徐石麟。都察院左都御史。張國維。兵部尙書。協理戎政。周堪。廣戶部尙書。顧錫疇。禮部尙書。黃道周。何楷。張有譽。王心一。何應瑞。高倬。解學龍。賀世壽。爲各部侍郎。劉士禎。侯峒曾。鄭瑄。許譽。卿爲各寺卿。而一時人望。建言。科道。章正宸。熊開元。姜琛。莊鰲。獻袁愷。馬兆羲。楊時化。詹爾選。李模。張璫。鄭友玄。喬可聘。李曰輔。李長春等。原官起用。徐汧。曹勳。吳偉業。俱以少詹兼侍讀學士。名賢濟濟。布列朝端。于是設立屏藩。陞左懋第。僉都御史。巡撫應安。田仰。僉都御史。巡撫淮楊。調總兵官鄭鴻逵。黃蜚。鎮守鎮江。鄭彩。分管水師。吳。

志葵駐防吳淞。黃斌卿駐防上江。勅御史祁彪佳等分行安撫江浙。設淮楊徐泗鳳壽滁和四鎮。以總兵官劉澤清轄淮海。駐淮北海。邵沛賁十一州縣隸之。經理山東。一帶總兵官高傑。轄徐泗。駐泗水。徐泗宿毫豐碭十四州縣隸之。經理開歸一帶總兵官劉良佐。轄鳳壽。駐臨淮。壽潁等九州縣隸之。經理陳杞一帶。靖南伯黃得功。轄滁和。駐廬州。廬巢無爲十一州縣隸之。經理光固一帶。每鎮額兵三萬人。本色米二十萬。折色銀四十萬。悉聽各屬自行徵取。黃得功。侯爵。封傑興平伯。澤清。東平伯。良佐。廣昌伯。得功。素忠勇。建功。河北。與寧。南伯。左良玉。先得封。良玉。恢復湖廣。并晉侯爵。傑。降賊也。有驍勇名。稱翻山。鷓舊與闖賊同夥。闖掠得邢氏。以其貌美。嬖之。屬傑。護內營。傑與氏通。挈之來降。陝督洪承疇。撫御有恩。能得其用。及孫傳庭繼任。令傑與白廣恩爲前鋒。二將各不相下。遂潰。潼關不守。傑由山西河北。率兵南下。大肆劫掠。抵揚州。揚人罷市。登陣死守。傑攻之。多殺掠。淮撫黃家瑞。守道馬鳴騷。集衆議事。進士鄭元勳與傑善。

爲言當事請放高兵入城。衆譁甚。指元勳爲高黨。謂不殺元勳。城不可守。遂段斬之城樓。傑恨。攻益力。可法曲解之。久之。始移駐瓜州。去。良佐開鎮臨淮。士民不服。互許得功。薄廬。又提兵與傑爭淮揚。戰不勝。以太僕少卿萬元吉監江北軍。解之。元吉貽得功書。期共戮力。王室得功自明。無他欲。聯絡各鎮。鼓勇殺賊。元吉以得功書馳示傑等。始罷兵。隸傑可法標下。爲前鋒總兵官。吏部尙書張慎言薦用。原任大學士吳甡。吏部尙書鄭三俊。詔赦甡罪。陛見三俊。候另議。二十三日。早朝。劉孔昭約諸勳臣。呼大小九卿。科道於廷。大罵慎言欲逐之。去。謂雪奸除兇。防江防河。舉朝臣子。全副精神。宜注於此。乃今日講推官。明日講陞官。不及武臣。結黨行私。所薦吳甡。有悖成憲。又言慎言原有二心。告廟定策。阻難奸辨。不可不誅。慎言立班不辨。御史王孫蕃許孔昭。先帝裁文操江。歸武操江。亦未見作何事業。且吏部職司用人。除推官陞官外。別無職掌。喧爭殿上。高弘圖言家臣自有本末。何遽殿爭。明日孔昭補疏糾參。慎言具疏求去。李沾又

言孔昭擁戴有功。文臣啟事屢登。武臣封爵未定。所以有殿上之爭。兩解之。於是高弘圖、姜曰廣相繼乞休。言文武官各有職掌。卽文臣中各部不得奪吏部之權。今用人乃慎言事。孔昭一手握定。非其所私。卽謂之姦。臣等皆贅具矣。慎言薦甦。勛臣知爲不可。臣不能知。票擬實出。臣手。又三俊清剛。係五朝人望。臣終以爲不可。不用。是臣罪不減。慎言。窃念朝廷之尊。尊於李勉。天子之貴。貴以叔孫。臣忝輔弼。坐視宸陛。幾若訟庭。愧死無地。請賜罷斥。各奉諭命。六月命禮部鑄國璽。以金代之。史可法、馬士英各奏吳三桂殺賊功。封三桂薊國公。世襲。遣海運中書沈廷揚。運米十萬石。銀五萬兩。濟其軍。召原任都督陳洪範。陸見。遣同兵部主事馬紹愉。贛國書使燕。應天巡撫左懋第。以母變。請北行。加洪範。太子太傅。懋第兵部侍郎。經理河北。聯絡關東。紹愉太僕少卿。給路費銀三萬兩。以往。而命僉都御史程世昌。巡撫應天。時山東河北殺僞響應。德州諸生謝陞。與原任遼撫黎玉田。御史盧世灌。貢生馬元。駮等。殺僞防禦使閻傑等十八。

人。奉宗室朱帥欽權稱濟王。淮楊漕撫路振飛。巡撫王燮。擒原任河南參議僞官呂弼周。王富。率士民射殺之。又擒僞官胡來賀。宋自成。李魁春。沉之河。又擒癸未進士僞官武僚解京。宿遷百姓。又擒僞將董學禮殺之。濟寧都司李允和。殺僞官劉溶。尹宗衡。張間行。傅龍等九人。囚原任兗西道副使叛官王世英。解京獻俘。開封府推官陳潛夫。策勇李遇知。劉洪起等。各殺僞官南附。原任河南勸農兵部尙書丁啓睿。命參將丁啓光。俘獻僞官陳奇。賈士俊。尙國俊。許承蔭。孫澄。范雋。郭經邦等七人。陛見。青州府衡藩。率諸生驅殺僞官。請徙內地。四川巡案御史劉之渤。奏報合江仁懷。擒殺賊楊騰鳳。張見陽等。擢燮僉都御史。巡撫山東。丘磊充山東總兵官。加謝陞少師。兼太子太師。玉田兵部尙書。世灌工部侍郎。時訛傳德王起義。以謝陞爲謝陞也。改潛夫江西道御史。巡按河南。敗睿以原官爲河南安撫。賜遇知洪起總兵官。勅之渤下部紀錄。振飛尋爲馬士英論罷。燮初任祥符令。三守危城。才識胆力。無不超絕。其在淮極著勞績。與振

飛鼓舞官民。殺僞使。碎僞牌。賊騎逼河上。躑躅不敢前。民間義兵。集至一二十萬。聲勢之壯。有若長城。人共倚之。士英奏薦欽案阮大鍼。以知兵。賜冠帶。陞見舉朝大駭。高弘圖請下九卿會議。士英曰。會議則大鍼必不得用。弘圖曰。臣非阻大鍼。舊制京堂必會議。乃於大鍼更光明。士英曰。臣非受其賄。何所不光明。弘圖曰。何必言受賄。一付廷議。國人皆曰賢。然後用之耳。弘圖出。即乞休。士英復爲大鍼奏辨。言魏忠賢之逆。非闖賊可比。且攻弘圖曰。廣諸人護持局面。謂於所愛而登之天者。卽曰先皇帝原無成心也。於所忌而錮之淵者。卽曰先皇帝定案不可翻也。欺罔莫甚。曰廣奏言。臣前見文武紛競。旣慚無術調和。近見欽案掀翻。又愧無能豫寢。遂使先帝十七年之定力。頓付逝波。陛下數日前之明詔。竟同覆雨。梓宮未冷。增龍馭之凄凉。制墨未乾。駭四方之觀聽。惜哉維新。遂有此舉。臣所惜者。朝廷之典章。所畏者。千秋之清議而已。郭維經奏言。案成先帝之手。今實錄將修。若將此案抹殺。不書。則赫赫英靈。恐有餘恫。非陛下所

以待先帝若書之。而與今日起用大鉞對照。則顯顯令旨未免少愆。并非輔臣所以愛陛下也。惟願陛下愛祖宗之法。因愛先帝并愛先帝之絲綸。呂大器奏言先帝血食未寒。爰書凜若日星。而士英悍然不顧。請用大鉞。不惟視吏部如芻狗。抑且視陛下爲弁髦。給事中羅萬象奏言輔臣薦用大鉞。或以愧世之無知兵者。然而大鉞實未知兵。恐燕子箋春燈謎未見枕上之陰符。而袖中之黃石也。伏望許其陛見。以成輔臣吐握之意。禁其復用以杜邪人覬覦之端。御史詹兆恒疏言欽案諸人久圖翻局。幸先帝神明內斷。確不可移。陛下蹕御龍江。痛心先帝異變。與諸臣抱頭號哭。百姓聞之。莫不洒血捶胸。愿思一報。近聞燕齊之間。士紳皆白衣冠。籲先帝而呼天。驅殺僞官。各守險隘。此誠先帝德澤在人。國憤非常。有以激發其忠義耳。今梓宮夜雨。一杯未乾。太子諸王六尺安在。國仇未復。而忽召見大鉞。還以冠帶。豈不上傷在天之靈。下短忠義之氣。懷遠侯常延齡。太僕少卿萬元吉。御史陳良弼。王孫蕃。左光先。兵部郎中尹民興等。

皆連疏糾不聽。大鉞召對稱旨。復具陳聯絡控扼進取接應勦賊四着。又陳長江兩合三要十四隙。竟用爲江防兵部侍郎。吏部尙書張愼言。工部尙書程註。乞休去。贈愼言子舉人履。旋爲御史。履旋以闖賊拷銀義不受辱。胎書愼言。謂與其虧體以辱親。不如殺身以明志。投唾而死者也。陞何應瑞工部尙書。徐石麟吏書尙書。召劉宗周爲都察院左都御史。宗周屢疏論時事。不署銜。稱草莽孤臣。首言大鉞進退關係江左興亡。又言討賊之法。一曰據形勝。江左非偏安之業。請進而圖江北。今淮鳳等處各立重鎮。尤當重在鳳陽。而駐以陛下親征之師。東扼徐淮。北控豫州。西顧荆襄。而南去金陵亦不遠。以此漸恢漸進。秦晉燕齊當必響應。兼開一面之網。聽其殺賊自效。賊勢益孤。賊黨自盡矣。一曰重藩屏。地方之見賊而逃也。總由督撫非才。卽如淮揚數百里之間。有兩節鉞。而不能禦亂。卒之南下。至淮北一塊土。拱手而授之賊。尤可恨者。路振飛坐守淮城。久以家眷浮舟於遠地。是倡逃之實也。於是鎮臣劉澤清高傑。遂相率有家。

屬寄江南之說。尤而效之。又何誅焉。案軍法臨陣脫逃者斬。臣謂一撫二鎮皆
可斬也。一曰慎爵賞。今天下兵事不競極矣。將悍兵驕。已非一日。今請陛下親
征所至。亟問士卒甘苦而身與共之。乃得漸資騰飽。徐張撻伐。一面分別各帥
之封賞。孰應孰濫。輕則量收。重則并奪。軍功既核。軍法益伸。左之右之。無不用
命。夫以左帥恢復焉。而封高劉。敗逃也。而亦封。又誰爲不封者。武臣既濫。文臣
隨之外廷。既濫中璫。從之臣恐。天下聞而解體也。一曰覈舊官。燕京既破。有受
僞官而逃者。有在封守而逃者。有在使命而逃者。於法皆在不赦。急宜分別定
罪。而至於僞命南下。徘徊於順逆之間者。實煩有徒。尤當顯示誅絕。行此數者。
討賊復仇。法畧具是。若夫邦本之計。貪官當逮。酷吏當誅。循良卓異。當破格旌
異。則有安撫之役在。而臣更有不忍言者。當此國破君亡之際。普天臣子。皆當
致死。幸而不死。反膺陞級。能無益增天譴。除濫典不宜概行外。此后一切大小
銓除。仍請暫稱行在。少存臣子負罪引慝之誠。又疏言賊兵入秦。踰晉。直逼京

師大江以南。固晏然無恙也。而二三督撫。曾不聞遣一人一騎北進。以壯聲援。賊遂得長驅犯闕。坐視君父危亡而不之救。則封疆諸臣之坐誅者。一既而大行之凶聞確矣。敷天痛憤。奮戈而起。決一戰以贖前愆。又當不俟朝食而方且仰聲息於南中。爭言固圉之策。卸兵權於閩外。首圖定策之功。督撫諸臣。仍復安坐地方。不移一步。則封疆諸臣之坐誅者。二然猶或曰。事無稟承。迨新朝既立。自應立遣北伐之師。不然而亟馳一介。使賫蠟丸。問道北進。或檄燕中父老。或起塞上舜王。共激仇恥。哭九廟之靈。奉安梓宮。兼訪諸皇子的耗。苟効包胥之義。雖逆賊未始無良心。而諸臣計不出此也。又不然而亟起閩帥鄭芝龍。以海師直搗燕都。令九邊督鎮。卷甲啣枚。出其不意。事或可幾。而諸臣又不出此也。紛紛制作。盡屬體面。天假之靈。僅令吳鎮諸臣。一奏燕京之捷。將置我南中面目於何地。則舉朝謀國不忠之坐誅者。三而更有難解者。先帝升遐。頒行喪詔。何等大典。而遲滯日久。距今月餘。未至臣鄉。在浙如此。遠省可知。時移事換。

舛謬錯出。卽成服。祇成名色。是先帝終無服於天下也。則今日典禮諸臣之坐誅者。四至罪廢諸臣。量從昭雪。自應援先帝遺詔而及之。乃一概竟用新恩。卽先帝誅璫鐵案。前後詔書蒙混。勢必彪虎之類。盡從平反而後已。君父一也。三年無改之謂何。嗟乎已矣。先帝十七年之憂勤。念念可以對皇天而泣。后土一身殉社稷。權古今未有之慘。而貪報於臣工。乃如此之薄。仰惟陛下再發哀痛之詔。立與問罪之師。請自中外諸臣之不職者始。澤清傑等公疏糾宗周稱草莽孤臣。有不臣之心。請加重僇。又糾宗周勸上親征。以動搖帝祚。奪諸將封以激變軍心。不仁不智。獲罪名教。黃得功又疏辨實不與聞。馬士英陰尼之。不得止。私光諭憲臣。平日以議論取重。蓋刺之也。史可法以廷臣論是非。疆臣論功罪。兩解之。起錢謙益。陳子壯。轉黃道周。各禮部尙書。兼翰林院學士。補華允誠。吏部員外。夏允彝。吏部主事。允彝盡以家產籍於官。以助兵餉討賊。授黃文煥。楊廷麟。翰林院編修。文煥以道周建言被杖。牽累革問。廷麟因忤嗣昌。降調。

軍前贊畫者也。御史李模疏言：今日諸臣能刻刻自認先帝之罪，臣方能紀常勸。而爵爲陛下之功。臣夫擁立之事，皇上不以得位爲利，諸臣何敢以定策爲名。而甚至輕加鎮將於義未安。鎮將事先帝，未聞效桑榆之收事陛下。未聞汗馬之績。按其罪亦在戴罪之科。倘謂勸進有章，足當夾輔，抑以勉勗敵愾，無嫌盜稱。然而名實之辨，何容輕假。願陛下勅諭諸大臣立志以倡率中外，力圖贖罪。勿但炫功，必大慰先帝殉國之靈。庶堪膺陛下延世之賞。一概勛爵俱應辭免。以明臣誼。至絲綸有體，勿因大僚而過繁。拜下宜嚴，勿因泰交而稍越。繁纓可惜，勿因近侍而稍寬。太僕少卿萬元吉，疏言：主術無過寬嚴。道在兼濟，官常無過任議。義貴相資。先皇帝初蒞海宇，懲逆鑑用事，斲削元氣，委任臣工。力行寬大，諸臣阻之。爭意見之。玄黃畧綢繆之柔土，虜入郊圻，束手無策。先帝震怒，一時宵壬，遂乘間抵隙，中以用嚴之說。凡告密廷杖，加派抽練，新法備行。使在朝者不暇救過，在野者無復聊生。然後號稱振作，乃中外不寧，國家多故。十餘

年來小人用嚴之效彰彰如是。先帝悔之。於是更崇寬大。悉反前規。天下以爲太平可致。諸臣復思競賄賂。恣欺蒙。每趨愈下。再撻聖怒。誅殺方興。宗社繼沒。蓋諸臣之孽。每乘於先帝之寬。而先帝之嚴。亦每激於諸臣之玩。則以寬嚴之用。偶偏也。昨歲孫傳庭擁兵關中。識者俱以爲不宜輕出。出則必敗。然已有返撓議之者矣。賊既渡河。臣卽謂急檄關軍吳三桂。俾隨路迎擊。可以勝賊。先帝召對。亦曾及此。然已有蹙地議之者矣。及賊勢薰灼。廷臣勸南遷。勸出儲監國。南都語不擇音。亦權宜應爾。然已有邪妄議之者矣。由事後而觀。咸追恨違者之悞。國設事。幸不敗。必共服議者之守經。天下事無全害。亦無全利。大率類是。當局者心忤無全利之害。誰敢違衆獨行。旁觀者偏見無全害之利。必欲強人從我。私意徒滋。實着未講。國事因之大壞。莫救。則以任議之途大畸也。又疏言賊今被創入秦。挑精選銳。垂涎東南。轉盼秋深。出商漢則徑抵襄承。出豫宋則直窺江北。兩處兵民積怒深怨。於斯時民必爭迎賊以報兵。兵更退疑民而進。

畏賊。恐將士之在上游者。却而趨下。在北岸者。急而渡南。金陵重地。武備單弱。何以當此。臣竊窺人情。類皆積薪厝火。安寢其上。居功者。思爲史冊之矯。誣見才者。不顧公論之注射。舌戰徒紛。實備不講。一旦有急。不識置陛下於何地。得毋令三桂竊笑江左諸人。功非功。而非才乎。吏科馬嘉植疏陳立國本事。一改葬梓宮。一迎養國母。一訪求東宮二王。一祭告燕山陵寢。末言今日在君父力自貶損。尊養原非樂受。在臣子痛加悔艾。富貴豈所相期。茅茨雖陋。可勿剪也。有以勞人費財導者。勿聽。經武以外。可概節也。有以處優晏衍進者。勿聽。刑部侍郎賀世壽疏言刑賞宜慎。如吳三桂奮勇血戰。李郭同功。拜爵方無愧色。若夫口頭報國。豈其遂是干城。河上擁兵。曷不以之敵愾。恩數已盈。勳名不立。冒濫莫甚。疏上。俱報聞而已。釋高墻罪宗七十五案。凡三百四十一名爲庶人。遣太監王肇基督催閩浙金花銀兩。肇基原名坤。卽崇禎朝肆惡淮揚者。大學士高弘圖等諫止之。上先帝尊號曰思宗烈皇帝。周皇后曰孝節皇后。忻城伯

趙之龍。言思非美字。尋易爲毅。宗烈皇帝。尊建文君爲惠宗。讓皇帝。景帝爲代宗。景皇帝。復懿文太子爲興宗。孝康皇帝。尊皇考福恭王爲恭皇帝。尋改爲孝皇帝。立崇廟。允禮部尙書顧錫疇議。削溫體仁文忠諡。尋復之。予大學士文震孟諡文肅。劉一璟諡文端。賀逢聖諡文忠。禮部侍郎羅喻義諡文介。詹事姚希孟諡文毅。兵部尙書呂維祺諡忠節。山西巡撫蔡懋德諡忠襄。隨州知州王燾諡忠愍。懋德諡尋奪之。湖廣巡案御史黃澍。同承天守備太監何志孔。入朝求召對。旣入。樹面糾馬士英奸貪不法。淚與語下。志孔復前佐澍。言其無上諸事。士英稱疾出直。而以金幣餽福邸舊閹。田成張執中等。兩閹向弘光曰。主上非馬公不得立。茲逐馬公。天下皆議主上背恩矣。且馬公在閣。諸事不煩主上。可以優閒自在。馬公去。誰復有念主上者。弘光嘿然。卽賜諭留。澍復連上十疏。稱自古未有奸臣在朝。而將帥能成功於外者。必陛下內秉精明。外採輿論。國人皆曰可殺。則殺之。母因一時之才情。博辨誤信小人。使黨羽旣盛。禍患驟至。又

云正人君子。乞陛下。下師事數人。以樹儀表。使輦轂之下。貪污結舌。邪佞閉氣。無所容其樹黨。庇奸之私。而後討國門以外之賊。無難。又云。自魏璫窺竊神器以來。實釀今禍。附逆之人。與薦逆之人。皆有賊心。乞陛下。下懸諸日月。以除魍魎。弘光屢諭趙樹。赴楚乃去。先是六月初二日。清朝傳檄至濟寧。一固山額真石爲傳奉事。奉攝政王令旨。各調兵馬前往山東等處。所過地方官民。出郭迎接。違者以抗師治罪。一平西王吳爲安撫殘黎事。稱攝政王。簡選虎賁數十萬南下。牌仰山東等處。速速投誠等情。至是七月初二日。又有部文索取冊籍。時山東服款。盧世漉降。李建泰謝陞。馮銓皆爲清朝。內院大學士。濟王走死。而畿輔重地。兵民不輯。鎮將于永綬駐鎮江。會與浙兵鬪。殺浙營守備李大開。中矢死之。邊兵焚民居數十里。邊兵有云。四鎮以殺搶封伯。吾輩何憚不爲。事聞。命赴史可法軍前核治。與平伯高傑疏言。自今大勢守江北。以保江南。人人言之。然從曹單渡。則黃河無險。自穎歸入。則鳳泗可虞。猶或曰。有長江天塹在耳。若

何而據上游。若何而防海道。豈止瓜儀浦采爲江南門戶。已乎伏乞和盤打算。定斷速行。中興大業。度有可觀。傑發總兵李朝雲赴泗州。又發叅將蔣應雄許占魁郭茂榮李玉赴徐州防守。寧南侯左良玉報稱副將蘇薦遊擊朱國強斬賊四百餘級。獲僞官江一洪。猷俘京師。又猷賊遣僞將馬科至四川招安保寧一帶。原任兵部主事郇猷珂起兵戰於桃園。賊兵潰。追獲僞將宋朝臣斬之。遺御史陳蓋募兵雲南。廣西巡撫方震孺松江知府陳亨給事中李維樾與兄僉都御史李光泰先後各措餉募兵入衛。而建陽知縣蔣芬捐俸資造火器募勇士朱千劬劉鉄臂等三請勤王。其詞有曰。幸而邀天之幸。迅掃狂氛。指日奏凱。社稷之福。否則惟有斷脰決腹。一瞑而萬世不視。以明國家三百年養士之報。以無負職三十年讀書之志。識者壯之。命總兵官王之綱迎太后於河南郭家寨常守義家。以僉都御史劉之渤巡撫四川。范鏞巡撫貴州。時猷賊在川。陷涪州。再陷瀘州。順流下重慶。破成都。取杜男子去耳鼻及兩臂。驅至各州縣。言兵

至而不下者視此。但殺王府官紳以待。秋毫無犯。由是所至如破竹。巡撫龍文光及舊撫陳士奇。重慶推官王行儉俱死。瑞主蜀主。闔門遇害。總兵趙光遠降賊。士英猶請降。勅獎之。考選游有倫。朱統銓。趙進美。沈宸荃。沈應旦。吳春枝。吳鑄。吳适。林冲霄。劉天斗。左光明。蔣鳴玉。湯來賀。李日池。胡時亨。爲科道部屬官。起補張采禮部儀制司主事。熊汝霖戶科給事中。章正宸吏科給事中。正宸疏言。兩月以來。聞大吏錫鑿矣。不聞獻俘。武臣私鬪矣。不聞公戰。老成引遯矣。不聞敵愾。諸生捲堂矣。不聞請纓。如此而曰。是興朝氣象。臣雖愚。知其未也。臣以進取爲第一義。進取不銳。則守禦必不堅。比者河北山左。忠義響應。各結營寨。多殺僞官。爲朝廷効死力。不及今。電掣星馳。倡義申討。是廓天下之氣而坐失事機也。宜亟檄江北四鎮。分渡河淮。聯絡諸路。齊心協力。互爲聲援。使兩京血脈通而後塞。井陘絕孟津。據武關以攻隴右。恐賊不難且夕殄也。陛下又何不縮素親率六師於淮上。但陛下親征。豈必冒矢石履行陣哉。聲靈所震。人切同。

仇虎豹。猊。勇。憤。百。倍。也。今。都。門。部。院。寺。司。各。署。不。稱。行。在。而。工。作。儀。文。陛。下。赫。然。欲。爲。中。興。令。主。宜。嚴。勅。諸。大。臣。速。簡。爾。車。徒。某。舊。額。某。新。增。水。幾。何。陸。幾。何。速。備。爾。芻。糗。幾。何。本。幾。何。折。主。幾。費。客。幾。費。選。爾。將。帥。某。堪。堅。轟。某。堪。分。關。審。爾。形。勢。某。地。建。鎮。某。地。設。堡。某。處。埋。伏。某。處。出。奇。修。爾。戈。矛。繕。爾。城。塹。進。寸。則。寸。進。尺。則。尺。扼。險。處。舉。大。勢。已。得。天。下。大。矣。不。患。無。人。臣。未。見。張。韓。劉。岳。之。杰。不。應。運。而。出。也。中。旨。傳。陞。吏。部。侍。郎。張。有。譽。爲。戶。部。尙。書。有。譽。清。望。素。著。士。莫。借。以。開。傳。陞。倖。門。也。正。宸。封。還。力。爭。不。聽。魏。國。公。徐。弘。基。東。平。伯。劉。澤。清。廣。昌。伯。劉。良。佐。荐。起。原。任。吏。部。侍。郎。張。捷。御。史。張。孫。振。劉。光。斗。工。部。主。事。鄒。之。麟。正。宸。又。疏。爭。不。聽。封。大。后。弟。鄒。存。義。爲。大。興。伯。福。府。千。戶。嘗。應。俊。爲。襄。衛。伯。補。青。浦。知。縣。陳。燦。爲。中。書。舍。人。予。王。鐸。弟。鏞。子。無。黨。世。錦。衣。指。揮。使。以。兵。部。侍。郎。解。學。龍。疏。荐。內。批。陞。原。任。戶。部。主。事。葉。廷。秀。爲。都。察。院。堂。上。官。監。生。余。仲。吉。生。員。諸。永。明。爲。翰。林。院。待。詔。應。俊。者。本。革。工。值。弘。光。出。亡。應。俊。負。之。履。雪。中。數。十。

里脫於難。與鏞、燠無黨。各翼衛有功者也。廷秀、仲吉、永明者皆先帝時。申救道周。下獄杖戍者也。補陳子龍兵科給事中。子龍疏請廣忠益。謂當黃道周觸忌權倖。搆陷至深。先帝震怒。禍將不測。群工百官相戒結舌。獨涂仲吉以孤童担囊走萬里外。上書比闕。予杖下獄。獄吏希迎。拷掠荼酷。至死不屈。以明道周之冤。此雖王調貫械以訟李固。杜仲毅身以救李雲。亦不過是。幸先帝聖明。得以俱免。憲臣劉宗周。昔以廷諍去國。孝廉祝淵。毅然請留。先帝已輕議罰。迨後奸臣挑激。復徵檻車。雖與仲吉得禍。輕重有殊。然爲國惜賢。舍生取義。其接一也。當仲吉赴戍之時。祝淵被逮之日。臣皆得與接對。仲吉凝靜深遠。絕不以立名自喜。祝淵謙抑溫恭。惟以出位引咎。間有投贈。錙銖不納。若置之臺諫之班。必有以上補袞職。下剔奸邪。又疏請慎名器。謂陛下間關南返。從官幾何。衛士奄尹。寥寥無幾。今天位既登。來者何衆。不遏其流。何所底止。必將人誇翼贊之功。家切從龍之念。傷體害政。非國之福。夫勸功誘善。惟在爵賞。一爲輕濫。後將無

極豐沛。故人文墨小吏。自昔爲嫌。朱紫盈門。貂蟬滿座。尤乖國典。立政之始。惟願陛下慎持之。嗣後果係服勞有功。但當賞之金帛。不應授以爵位。以貽曹風。不稱之譏。犯大易負乘之戒。又疏請用賢。勿二爵人以公。一在憲臣之宣召也。憲臣老成清直。海內盡知。今入國門。寄居蕭寺。不得一望天顏。在陛下以方論大臣和衷共濟。恐憲臣躑直。奏對之際。復生異同。然臣以陛下疑畏。君子之機。從此而生。恐君子有携手同歸之志。黃道周之流。皆躑躅而不前矣。陛下誰與共濟天下哉。一爲計臣之特用也。計臣清端敏練。百僚所服。但古制爵人於朝。與衆共之。墨敕斜封。覆轍可鑒。萬一異日有奸邪乘間。左右先容。銓司不及議。宰輔不及知。而竟以內降出之。臣等不爭。則倖門日開。臣等爭之。則已有前例。立國之始。臣愿陛下寅持之也。疏入。俱不聽。大學士姜曰廣疏言。祖宗會推之典。立法萬世無弊。斜封墨敕。覆輒具在。臣觀先帝之善政。雖多。而以堅持逆案。爲盛美。先帝之害政。亦間出。而以頻出。中旨爲亂階。用閣臣內傳矣。用部臣勛。

臣內傳矣。選大將言官亦內傳矣。他無足數。論其尤者。其所得閣臣。則逢君殃民。奸險刻毒之周延儒。溫體仁。楊嗣昌。偷生從賊之魏藻德等也。其所得部臣。則陰邪貪猾之陳新甲等也。其所得勛臣。則力阻南遷。盡撒守禦。稚狂之李國禎也。其所得大將。則統袴支離之王樸倪。寵輩也。其所得言官。則貪婪無賴之史。堊陳啓新也。凡此皆力排衆議。簡自中旨者也。乃其後效。亦可觀矣。且陛下亦知內傳之故乎。總由鄙夫熱心仕進。一見擯於公論。遂乞哀於內廷。線索關通。中自有竅。門戶摧折。巧爲之詞。內廷但見其可憐之狀。聽其一面之詞。遂不能無聳動。間以其事密聞於上。又得上之意旨。轉而授之。於是平臺召對。片語投機。立談取官。有若登場之戲。臣昔痛心此弊。亦於講藝敷陳。但以未及暢語。至今猶存隱恨。先帝既悞。陛下豈堪再悞哉。天威在上。密勿深嚴。臣安得事事而爭之。但願陛下深宮有暇。溫習經書。間取大學衍義。資治通鑑視之。如周宣漢光之何以竟恢遠烈。晉元宋高之何以終狃偏安。武侯之出師征蠻。何慘慘。

以親君子必遠小人爲說。李綱之受命禦虜。亦何切切以信君子。勿間小人爲言。反覆思維。必能發明聖性。點破邪謀。陛下與其用臣之身。不若行臣之言。不行其言。而但用其身。是猶獸蓄之以供人刀俎也。御史郝彪佳疏論時政。謂洪武初。官民有犯。或收繫錦衣衛。高皇帝因見非法凌虐。二十年遂焚其刑具。移送刑部審理。是祖制原無詔獄也。後乃以鍛鍊爲功。以羅織爲事。雖曰朝廷之爪牙。實爲權奸之鷹狗。口詞從迫勒而來。罪案聽指授而定。卽舉朝盡知其枉。而法司誰雪其冤。酷慘等於來周。平反從無徐杜。此詔獄之弊也。洪武十五年。改儀鑾司爲錦衣衛。耑掌直駕侍衛等事。未嘗有緝事也。迨後東廠設立。始有告密之端。用銀而打事件。得賄而鬻刑章。飛誣多及善良。赤棍立成巨萬。招承皆出於吊拷。怨憤充塞於京畿。欲絕苞苴。而苞苴托之愈盛。欲究奸宄。而奸宄未能稍清。此緝事之弊也。若夫刑不加於大夫。原祖宗忠厚立國之本。及於逆瑾用事。始有去衣受杖者。刑章不歸司敗。撲責多及直臣。本無可殺之罪。乃致

必殺之刑。况乎朝廷徒受拒諫之名。天下反歸忠義之譽。蓋當血濺玉階。肉飛金陸。班行削色。氣短神搖。卽恤錄隨頒。已魂驚骨削矣。是豈明盛之休風。大失君臣之分誼。此廷杖之弊也。伏乞陛下嚴行禁革。馬士英阮大鍼授意建安王府。鎮國中尉。候考吏部朱統鑑。疏誣姜曰廣穢跡。顯有逆謀。詞連史可法張慎言呂大器等。禮科袁彭年據祖制爭之云。中尉有奏請先令長史司具啓親王參詳可否。然後給批。賚奏若候考吏部則與外吏等應從通政司封進。今何徑何竄直達御前。微刺顯攻。捕風捉影。陛下宜加禁戢。臣禮垣也。事涉宗藩。皆得執奏。吏科熊汝霖言。統鑑含血噴人。不顧拔舌。如此不駁。朝廷設立言官何用。通政使劉士禎亦言。曰廣勁骨。懃性守正不阿。居鄉立朝。皆有公論。統鑑何人。揚波噴血。掩耳盜鈴。飛章越奏。不由職司。此真奸險之尤。豈可容於聖世。皆不聽。先是李沾攻呂大器懷二心。劉澤清亦請誅大器。指其誣殺總兵柴時華。起用王重掌選。及比雷縝祚。大器許奏馬士英鬻官賣爵。敗法亂紀諸罪。且言吳

姓鄭三俊輩。豈無一事之失。而清直剛介。輿望攸歸。馬士英阮大鍼等。亦有一技之能。而貪鄙險邪。群情共恨。六器予告去。尋削職。刑部提問。日廣票擬降調。封疆失事。太監孫呈琇。內批予原官。又票擬御史祁彪佳。論詔獄廷杖緝事三大弊。許禁革。發改票。同官王鐸言。吾輩志在報國。若苟且因循。害民悞國。腕可斷。此旨不可擬也。日廣揭稱。臣所守者朝廷之法度。一官之職掌。臣死不敢奉詔。不聽。鐸又疏言。國家新造。人心易渙。當以安靜爲主。厥衛應行禁止。不聽。弘圖票擬。正宸等爭中旨。傳陞有譽事。發改票。再擬再發改。又揭爭統轄糾日廣事。應究治。亦再三發改票。及陳設廠衛。爭用大鍼。請召可法入直。數事。弘光召入。厲聲責弘圖把持。弘圖言。臣死不敢奉詔。不聽。復具疏辨。尋予告去。例轉科道。陸朗爲僉事。黃耳鼎爲副使。內批留用。徐石麒言。朗耳鼎交通內臣。倖留非法。朗耳鼎疏攻。姜日廣。徐石麒。劉宗周。結黨欺君。把持朝政。無人臣體。日廣石麒宗周各予告去。御史游有倫奏。今日國事淆亂。不知禮義廉耻爲何物。明知

君子進退不苟。故以含沙之口。激之速去。甚至常人所不忍道者。瀆於君父之前。科道微有糾劾。則指爲比黨。相戒結舌。眞所謂前有讒而不見。後有賊而不知也。戶科吳适疏言。曰。廣宗周歷事五朝。貞心亮節。久而彌劭。應亟賜留。不聽。吏科熊汝霖奏朝端之士。玄黃交戰。卽一二人之用舍。而始以勛臣。繼以方鎮。固圍恢境之術。全然不講。惟舌鋒筆鏢。是務。以匿帖而逐舊臣矣。俄又以踈藩而參宰輔矣。繼又喧傳復廠衛。而人心皇皇矣。輔臣曰。廣。忠誠正直。海內共欽。乃么麼小臣。爲誰驅除。聽誰主使。且聞上章。不由通政。納結當在何途。內外交通。神叢互借。飛章告密。墨敕斜封。端自此始。事不嚴行詰究。用杜將來。必至廠衛之害。橫者。借以樹威。黠者。因以侖利。人人可爲叛逆。事事可作營求。縉紳慘禍。所不必言。小民鷄犬。亦無寧日。先帝十七年憂勤。曾無失德。而一旦受此奇慘。止有廠衛一節。未免府怨。臣民今日締造之初。如育嬰孩。調護爲難。豈可便行摧折。陛下試思先朝之何以失。卽知今日之何以得。始先帝篤念宗藩。而聞

寇先逃。誰死社稷。保舉換授。盡是殃民。則今何以使躡治不萌。而維城有賴。先帝隆重武臣而死。綏敵愾十無一二。叛降跋扈。肩背相踵。則今何以使賞罰必當。而惠威易行。先帝委任勛臣。而官舍選練。一任飽颺。京營銳卒。徒爲寇藉。則今何以使父書有用。客氣是屏。先帝簡任內臣。而小忠小信。原無足用。開門延敵。且噪傳聞。則今何以使柄無旁操。而恩有餘地。先帝不次擢用文臣。而邊才督撫。誰爲捍禦。超遷宰執。羅拜賊廷。則今何以使用者必賢。而賢者必用。疏入內批。重處陞。祁彪佳爲僉都御史。巡撫蘇松。戶科倪嘉慶。追論兵部尙書張鳳翼。楊嗣昌。陳新甲。調度乖方。又論戶部尙書李待問。加餉殃民。致貽寇患。命削待問官。以爲聚斂者戒。又用御史鄭友玄言。削故大學士周延儒。薛國觀。溫體仁。總督熊文燦。官銜廢典。國觀尋以兵科戴英訟寃。下部議復。予湖廣巡按劉熙祚諡忠毅。宣大總督盧象昇諡忠烈。復御史毛羽健原官。贈吏部侍郎葉盛爲吏部尙書。史稱盛博學宏才。文武並濟。憲宗朝名臣也。戶科錢增疏請修水

利言蘇松常鎮杭嘉湖七郡之水以太湖爲腹以大海爲尾閭以三江入海爲血脈蓋自吳淞淹塞東江微細獨存婁江一派而婁江之委七十里曰劉家河乃婁江入海之道東南諸水全恃此以歸墟不至橫溢泛濫者則帶水靈長之利也勝國時劉河深厝運艘市舶走集於此近日漲沙淤塞於是東流之水逆而向西涓涓不入灌溉無資兼之歲歲苦魘平疇龜拆人牛立稿雖復拮据如林何從乞靈海若而救此涸轍之民乎然此猶就旱嘆言耳萬一大浸稽天七郡洪流傾河倒峽震澤不能受散漫橫潰勢必以七郡之田廬爲壑而城郭人民益不可問東南數百萬財賦盡委逝波其如國計何哉蘇松巡按周元泰亦言劉家河急宜開濬工部主事葉國華又疏請濬吳淞俱下該撫察議先是馬士英疎請誅逆言從逆諸臣強半素是正人君子之流禮科袁彭年駁之言從逆姓名傳播不一在樞輔義憤填胸或不覺言之偶激然恐僉人乘間陽爲正人口寔陰爲逆黨解嘲甚且借今日討逆之微詞爲異日翻逆之轉語不至濬

國是而傾善類。不已。則其害有不可勝言者。夫從來善類所歸。間雜匪德。往往有之。東京盛名。豈無逆死之張儉。元祐錮籍。亦有巧免之元章。三士作朋。官業分席。七賢寄命。山王可托。豈因鄴官一姝之惡。遂毀銅台全部之音。惟是溫公一信蔡京。而紹述之禍旋起。唐室一進逢吉。而興復之業不終。孔子曰。君子而不仁者有矣夫。未有小人而仁者也。歷觀往事。斯言誠千古定案也。今日何獨疑之。八月命錦衣都督馮可宗。遣役緝事。禮科袁彭年疏言。高皇帝時不聞有廠。相傳文皇帝十八年。始立東廠。命內官主之。此不見正史。惟大學士萬安行之。亦不聞特以緝事著。嗣後一盛於成化。然西廠汪直。躡年輒罷。東廠尙銘。有罪輒斥。當時不得稱純治矣。再盛於正德。丘聚谷大用等。相繼用事。皆倚逆瑾。煽虐釀十六年之禍。天下騷然。三盛於天啓。逆魏之禍。幾危社稷。近事之明鑑也。自此而外。列聖無聞。夫卽廠衛之興廢。而世運之治亂。因之。頃先帝朝。亦嘗任廠衛訪緝矣。乃當世決無不營而得之官。中外自有不脛而走之賄。故逆綱

之方。卽從密網之地。而布作奸之事。又資發奸之人。以行始猶。帕儀交際。爲人情所有之常。後乃賍賄萬千。成極重莫返之勢。豈非以輿援之途。愈秘而專。傳送之關。愈曲而費乎。究竟刁風所煽。官長不能行法于胥吏。徒隸可以迫脇其尊上。不可不革。疏入。謫浙江按察司照磨。時太妃來自河南。弘光諭戶工部限三日內。搜括萬金。以給賞賜。太監諸朝進請給工科錢糧。約數十萬。工部尙書何應瑞。侍郎高倬。苦點金無術。懇祈崇儉。工科李清亦疏請節省。不聽。又詔選內員。選宮女。閹巷騷然。科道李維樾。陳子龍。朱國昌。各疏諫。亦不聽。加翼戴。恩史可法少保。馬士英太子太師。高弘圖。姜日廣。王鐸。太子太保。徐弘基。劉孔昭。朱國弼。柳祚昌。太監韓贊周。廬九德。各陞賞世廕。又加南臨恩。可法少傅。士英少保。弘圖。日廣。鐸。太子太傅。特陞李沾都察院左都御史。晉國弼保國公。張文光。太常少卿。以定策功多也。換授朱統鑣爲行人。以自陳。逐日廣。故赦從。逆來歸。兵科時敏。開屯大瞿山。中允衛胤文。兼兵科給事中。監興平伯軍。以原未從。

逆南來。遼薊總督王永吉。經畧山東河北。兵部尙書張縉彥代。丁啓睿。總督河南勸農。永吉別歷中外。曉暢兵機。山左感其德義。卽東平亦聽其約束。而縉彥夙饒經濟。初國破卽自縊。死復甦。賊使牛金星說降。縉彥罵不從賊。乃命權將軍張能加刑拷。制將軍王愛臣施羈縲。降賊內官王德化加叱辱。備極荼毒。賊猶未已。挾之西行。縉彥潛結義人張一方蔡元吉。刼之於途。脫身走龍泉關。及太原。賊欲得而甘心。縉彥與一方謀。冀弭賊洩怨。一方許可。與元吉夜至。曰。殺賊易耳。非郵符不能出虎口。兩人乃投僞將軍陳永福。永福差往河南。兩人喜報。縉彥蓄弔太原之小店待賊。賊疑。越小店而走晉祠。事雖未成。而倉卒中。未嘗須臾忘仇也。縉彥計脫奔豐谷山。著黃冠。走盤陀。其時賊騎追捕甚急。盤陀皆土黠。炙人肝而食。縉彥困甚。聞馬蹄聲起。視則一方元吉也。遂脫於難。走其城。聞弘光立。遂南渡。爲賊尉馮國寧盤獲於芝蔴口。申報賊渠李自成。差僞錦衣楊英姚濟聖。七月十七日。拘縉彥於新鄉。縉彥召族姓姻友。誓以大義曰。吾

所忍死以待者爲儲君耳。散家財。一日而盡。潛結太行諸雄。八月六日。義旅集矣。而僞將勒馬貫矢出門。縉彥疑其有變。迺命一方刺一人。奪其馬射斃數人。前突之。盡殺其黨。擒府縣諸僞。長隨軍縞素登城。歃血。迺舉義兵於合河吉蘭。同時舉事者。有都司蘇見樂。秦衍祉等。聞風來歸者。有輝縣吉士式鄧鄧。修武李之煥。都攀桂。獲嘉李青。夏時亨。原任推官解居易。知縣李昇。郁英。總兵魯宗孔。一日不期而會者萬人。其遙爲聲援。有河南許定國。山東張大翼等。僞都尉黃來襲。斬其多級。有白旗賊精騎數千。爲賊援。命秦衍祉先登陣亡。又有劉皂旗引兵東犯。假平西兵設計走之。遇賊營王都尉。摧其先鋒。賊勢却。迺保叙山寨。廣布爪牙。以圖大舉。南連汝穎。北盡行山。河朔之勢成矣。檄告中外。凡山谷城寨。無不知有大司馬義旅者。殺賊後渡河而南。上舉義復仇。恢復三城。聯絡河朔。疏畀以原官。力辭不受。惟願盡殺賊。以報先帝。至麻城山。居金剛臺。所經營諸寨。如霍山之羊山。桓山等寨。斬水之白雲。大旗等寨。英六之司空。張山主。

簿等寨。六安之麻埠。三尖。四柱等寨。汝息之任家。張庄。龐家等寨。光山之皂旗。烏龍。鷄冠等寨。信陽之紅旗等寨。黃陽。天台等寨。麻城之獲生。紫雲。五腦等寨。商城之牛氏。上庄等寨。四百八十九處。運籌決勝。心血爲枯。瘡痍飢寒。濱死者數。祖死母死。妻妾俱死。奮不顧家。拮据無成。君子惜之。以浮海來歸。順天巡撫楊鶚爲兵部侍郎。兼僉都御史。總督川湖雲貴廣西。罷浙江巡撫黃鳴俊。降浙江巡按任天成。以許都餘黨復叛。處分未定。故也。并議前任巡按左光先罪。令在朝浙臣具奏情形。光先在浙。風裁清卓。以光斗弟。故與阮大鍼有世讐。又首劾士英。大鍼故借事陷之。朝右無敢爲直言者。蘇松巡撫祁彪佳。獨言許都之變。突發于東陽。義烏。浦江。皆無堅城。光先事竣出境。聞變。過還。撫軍懸闕。一切調兵措餉。皆其宵旦拮据。變起不一月。元兇授首。兩浙危而復安。乃今奉旨推求。夫弄兵揭竿。至於破城據邑。其罪豈不當死。當日兵威所迫。賊已窮蹙。而後乞命。與陣擒無異。非誘降也。設誅鋤不力。養虎貽患。後來國難方張。又不知作

何舉動矣。豈可反以激變罪之乎。于是大鉞并切齒。彪佳陞解學龍刑部尙書。改兵部主事凌駟爲御史。巡按山東。便宜聯絡河南等處。起丁魁楚巡撫承襄。陞王灤巡撫登萊。越其傑巡撫河南。各僉都御史其傑鄉科罷閒。以士英妹夫故起之。啓睿旣觀望。改推杰變。永吉赴任。無地皆不行。以保國例。晉東平伯劉澤清侯爵。又晉誠意伯劉孔昭侯爵。孔昭不受。又封福建總兵官鄭芝龍南安伯。賜蟒衣。國弼薦用欽案楊維垣爲通政使。起蔡奕琛吏部右侍郎。內批補張捷吏部左侍郎。尋進尙書。補張孫振爲御史。掌河南道印。孫振論劾蘇松巡撫郝彪佳貪奸。且定策有異議。詞連吳姓鄭三俊劉宗周等。彪佳罷去。以易應昌爲都察院副都御史。郭維經爲僉都御史。起葛寅亮太常寺卿。成勇福建道御史。文安之詹事府詹事。劉同升翰林院侍講。趙士春翰林院編修。寅亮安之清望素著。勇以諫言獲罪。直聲振天下。同升士春忠孝世傳。皆以劾楊嗣昌奪情。與黃道周昌言去國者也。陞賀世壽戶部督倉尙書。起王志道戶部侍郎。申紹

芳督餉侍郎。志道。佐憲。以監視內臣。越俎。參官。廷諍。革職。紹芳。居官清慎。因溫體仁。欲傾文震孟。許譽卿。文致遣戍。至是。雪之。以禮部尙書顧錫疇祀海行。命侍郎管紹寧署部事。加大學士王應熊太子太保。兵部尙書總督川湖雲貴。賜蟒劍。開籓遵義。陞張鳳翔兵部尙書。兼副都御史。巡撫蘇松。盧若騰僉都御史。巡撫鳳陽。若騰以海道著績。擢不赴。鳳翔因殺賊官。薦至京者。也。九月。予北京殉難諸臣謚。大學士范景文謚文貞。戶部尙書倪元璐謚文正。左都御史李邦華謚忠文。副都御史施邦曜謚忠介。戎政侍郎王家彥謚忠端。刑部侍郎孟兆祥謚忠貞。大理寺卿凌義渠謚忠清。太常寺卿吳麟徵謚忠節。庶子周鳳翔謚文節。諭德馬世奇謚文忠。中允劉理順謚文正。簡討汪偉謚文烈。太僕寺丞申佳胤謚節愍。給事中吳甘來謚忠節。御史陳良謨謚恭愍。陳純德謚恭節。王章謚忠烈。吏部員外許直謚忠節。兵部主事成德謚忠毅。金鉉謚忠節。觀政進士孟章明。謚節愍。立祠。賜名旌。忠。贈理順妻萬氏。妾李氏。德母張氏。淑人。鉉母。

章氏妾王氏偉妻耿氏恭人。世奇妾朱氏李氏良謨妾時氏孺人。建坊旌表。又予勲戚惠安伯張慶臻諡忠武。襄城伯李國禎諡貞武。新樂侯劉文炳諡忠壯。左都督劉文耀諡忠果。駙馬都尉鞏永固諡貞愍。太監王承恩王之心諡忠愍。李鳳翔諡恭壯。鳳翔以降賊被殺者大同巡撫衛景瑗諡忠毅。宣府巡撫朱之馮諡忠壯。總兵官吳襄諡忠壯。特贈遼國公周遇吉諡忠武。工部主事王鎮彥經歷施溥中書舍人宋天顯。各予祭葬。贈刑部郎中李逢申太僕寺少卿。諸生許琰翰林院五經博士。布衣湯文瓊中書舍人。又先後補予開國諸臣。諡郢國公馮國用諡武翼。濟國公丁德興諡武襄。德慶侯廖永忠諡武勇。定遠侯王弼諡武威。長興侯耿炳文諡忠愍。潁國公傅友德諡武靖。宋國公馮勝諡武壯。永義侯桑世傑諡忠烈。河間公俞廷玉諡武烈。東勝侯汪興祖諡武愍。東海公茅成諡武烈。濟陽侯丁普郎諡武節。高陽郡侯韓成諡忠壯。東丘郡侯花雲諡忠毅。丹陽縣男孫炎諡忠愍。當塗縣子王愷諡壯愍。高陽郡侯許瑗諡忠節。縉雲

伯胡深諡襄節。御史中丞章溢諡莊敏。晉府長史桂彥良諡敬裕。詹事唐鐸諡敬安。祭酒劉崧諡恭介。東莞伯何真諡恭清。平遙訓導葉居昇諡忠愍。姑熟郡公陶安學士詹同俱諡文獻。又補予正德朝死諫諸臣諡。御史蔣欽諡忠烈。兵部員外陸震諡忠定。工部主事何遵諡忠節。刑部主事劉較諡孝毅。大理評事林公黼諡忠恪。行人孟陽諡忠介。李紹賢諡忠端。俞廷瓚諡忠愍。李翰臣諡忠毅。詹軾諡忠潔。劉平甫諡忠質。給事中周璽諡忠愍。指揮張英諡忠壯。又補予天啟朝死。稽難諸臣諡。副都御史左光斗。給事中周朝瑞。御史周宗建。袁化中。李應昇。俱諡忠毅。黃尊素諡忠端。工部主事萬燦諡忠貞。副使顧大章諡忠愍。蘇松巡撫周起元諡忠惠。又補予建文朝死。難諸臣諡。文學博士方孝孺諡文正。兵部尚書齊泰。太常寺卿黃子澄。刑部侍郎張昺。太常寺少卿盧原質。給事中葉福。俱諡節愍。禮部尚書陳迪。御史大夫景清。大理少卿胡閏。俱諡忠烈。兵部尚書鐵鉉諡忠襄。修撰王叔英諡文忠。禮部侍郎黃觀諡文貞。戶部侍郎卓

敬。御史大夫練子寧。俱諡忠貞。衡府紀善周是修。按察使王良。俱諡貞毅。編修王良。太常少卿廖升。俱諡文節。刑部尙書暴昭。左贊善連楹。俱諡剛烈。都御史茅大方。御史高翔。教授陳思賢。燕府伴讀俞逢辰。俱諡忠愍。給事中黃鉞。諡忠獻。御史曾鳳韶。叅軍斷事高巍。俱諡忠毅。左拾遺戴德彝。御史魏冕。俱諡毅直。知府姚善。知縣顏伯瑋。俱諡忠惠。大理寺丞鄒瑾。兵部侍郎譚翬。俱諡忠愍。都御史陳性善。諡忠節。燕府長史葛誠。諡果愍。刑部侍郎胡子昭。諡介愍。谷府長史劉瓌。諡剛節。御史林英。諡毅節。魏國公徐輝祖。諡忠貞。越寓候俞通淵。都指揮瞿能。俱諡襄烈。衛卒儲福。諡貞義。都指揮謝貴莊。得。俱諡勇愍。馬宣。諡貞壯。朱鑑。諡壯烈。皆允給事中。李清。請也。又先後補予右都御史沈子木。諡恭靖。工部尙書沈做。炳。諡襄敏。副都御史張璋。諡清惠。禮部尙書董其昌。諡文敏。大學士何如寵。諡文端。孫承宗。諡文忠。太常少卿鹿善繼。諡忠節。禮科沈胤培。疏請立中宮。舉經筵。定朝儀。謂今永巷無脫簪之儆。崆峒鮮問道之謨。嘖笑或假借。

於從龍而廉遠堂高之義不著。是非或混淆於市虎。而陰陽消長之關可虞。陛下誠思此身爲祖宗付托之身。先帝之大仇。一日未復。卽九廟之神靈。一日怨恫。而正朝廷以正百官。正萬民先自官闈始。則選立中宮爲第一義。經筵業奉明旨。尤祈汲汲舉行。或召詞臣詢經史。或召部臣考政治。而時令臺諫之臣。陳得失。宮中萬幾之暇。披覽資治通鑑及本朝寶訓等書。以知前代興亡之迹。祖宗致治之由。至於朝儀多闕。大典未光。如朝門不應奏樂而奏樂。各衙門應奏事而不奏事。凡若此類。並宜申飭戶科吳适疏請憂勤節愛。言國耻未雪。陵寢成墟。豫東之收復無期。楚蜀之摧殘彌甚。舊都草創。一事未舉。萬孔千瘡。憂危叢集。又况畿南各省。是處旱災。兼之臣鄰消長多虞。將帥立黃構釁。伏惟陛下始終兢惕。兼倣祖制。早午晚三朝。勤御經筵。面諮時政。親近儒臣。朝期無更傳免。而又躬崇儉約。尙茅茨而省工作。嚴爵賞而重名器。錙銖必恤。俾佐軍輿。諸凡無執之征。一槩報罷。被災之地。確覈酌緩。墨吏必懲。蠹胥必殛。根本之計。孰

大乎此。大理寺卿鄭璫。疏荐蘇松兵備程琦。會琦與鄉宦彭歌祥妾杜氏通情。事敗互訐。聞於士英。卽於疏批重處。杜贈珣詩有云。爲憐貴客芳心醉。欲訪仙郎帆影遙。時共傳之。中旨拔福建副使郭之奇爲詹事府詹事。內批補梁應奇爲給事中。王懷鄭瑜爲御史。召賄降猷賊錦衣都督劉僑至京。仍補原官。初。左良玉恢復斬黃僑。送馬士英赤金三千兩。女樂十二人。士英笑曰。此一物足以釋西伯。遂誑先帝復職。至是用之。以陳盟謝德溥爲禮部右侍郎兼詹事府詹事。余颺吏部文選司主事。晉何騰蛟兵部侍郎兼僉都御史。巡撫湖廣。追奪川撫張論平奢酋變功。加淮撫田仰兵部尙書。世廕錦衣指揮使。仰屢疏請餉。弘光以東南餉額不滿五百萬。江北已給三百六十萬。豈能以有限之財。供無已之求。命仰與劉澤清通融措辦。時澤清大興土木。造宅淮安。極其壯麗。四時之室俱備。僭擬皇居。休卒淮上。無意往北。仰與其事。但知請餉。不知餉之所用。仰故馬士英私人也。士英請免府州縣童生應試。上戶納銀六兩。中戶四兩。下戶

三兩。得赴院試。又詔行納貢例。廩生納銀三百兩。增六百兩。附七百兩。又立開納助工例。武英殿中書納銀九百兩。文華中書一千五百兩。內閣中書二千兩。待詔三千兩。拔貢一千兩。推知銜一千兩。監紀職方萬千不等。皆以助軍興也。時爲之語曰。中書隨地。有都督。滿街走。監紀多如羊。職方賤似狗。廢起千年塵。拔貢一呈首。掃盡江南錢。填塞馬家口。奉化布衣方翼明抗疏上言政祈克終。着送刑部問罪。又有布衣何光顯疏請誅馬士英劉孔昭。詔戮於市。籍其家。遠近爲訟冤云。

明季南北遺聞卷三 南都

江左鄒 漪流綺緝

十月朔。命鑄弘光錢。時廟門災。戶科吳适疏。陳昭事之寔。一日日講。宜行請勅。定期。俾博聞有道之臣。朝夕左右。稽詢經史。虛衷延納。更取祖訓大誥諸書。時時省覽。以爲著鑑。一日午朝。宜舉。俾閣部大臣。以及臺垣散秩。咸得躬膺清問。卽於披對之餘。採疾苦以疏民隱。覈功罪以勸疆臣。明是非以黜邪佞。疏入不省。清朝攝政王。遣副將唐起龍。招撫江南。致書史可法云。予向在瀋京。卽知燕山物望。咸推司馬。及入關破賊。與都人士相接見。識介弟於清班。曾托其手。勒平安。拳期衷緒。何時得達。比聞道路紛紛。多謂金陵有自立主者。夫君父之仇。不共戴天。春秋之義。有賊不討。則故君不得安葬。新君不得卽位。所以防亂。臣賊子法至嚴也。闖賊李自成。稱兵犯闕。手毒君親。中國臣民。不聞加遣一矢。平西親王吳三桂。介在東陲。獨效包胥之哭。朝廷感其忠義。念累世之夙好。棄

近日之小嫌。嚴整貔貅。驅虜梟獍。入京之日。首崇懷宗帝后諡號。卜葬山陵。悉如典禮。親郡王將軍以下。仍故封號。不加改削。勛戚文臣。咸在朝列。恩典有加。耕市不驚。科毫無犯。方擬天氣秋爽。遣將西征。傳檄江南。聯兵河朔。陳師鞠旅。戮力同心。以報爾君父之仇。彰我朝廷之德。豈意南州諸君子。苟安旦夕。不審事機。聊慕虛名。頓忘寔害。予甚惑之。夫國家之定燕都。乃得之於闖賊。而非得之於明朝也。賊毀明朝之廟主。辱及先王。國家不憚征繕之勞。悉索敝賦。代爲雪耻萬世。仁人君子。何以報德耶。乃乘寇稽誅。王師暫息。卽欲雄據江南。坐享漁人之樂。豈可謂江淮以爲天塹之憑。遂不能飛渡也。況闖賊但爲明朝寇讎。未嘗得罪於國家。徒以薄海同仇。特伸大義。今若擁稱尊號。便是天有二日。復爲勦敵。予將簡西征之銳卒。轉旆東征。且擬釋彼重誅。命爲前導。夫以中華全力。受制潢池。而欲以江左一隅。兼支大國勝負之數。無待蓍龜矣。予聞君子之愛人也。以德。小人則以姑息。諸君子果識時知命。切念故主。厚愛賢王。宜勸令

削號歸籓。永綏福位。朝廷當待以虔賓。盛承禮物。帶礪山河。位在諸侯王上。庶不負朝廷伸義討賊。興滅繼絕之初心也。至於南州諸君子。賁然來儀。則爾公爾侯。列爵分土。有平西王之典例在。惟執事寔圖維之。晚近士大夫好高樹名。不顧國家之急。每有大事。輒相築舍。昔宋人議論未定。兵已渡河。可爲殷鑒。先生領袖名流。主持至計。必能貫察始終。寧忍隨俗浮沉。取舍從違。應早審定。兵行在即。可東可西。南國安危。在此一舉。願諸君子同以討賊爲心。無貪瞬息之榮。致令故國有無窮之禍。爲亂臣賊子所笑。予尙有厚望焉。記有之。惟善人能受盡言。故敢布腹心。佇聞名教。江天在望。延跂爲勞。書不盡言。可法答書云。南中自接好音。隨遣使誛吳大將軍。未敢遽通左右。非委隆誼於草莽也。誠以大。夫無私交。春秋之義。今倥傯之際。捧琬琰之章。真不啻從天而降也。諷讀再三。慙慙致意。若以逆成尙稽天討。爲貴國憂。法且感且愧。懼左右不察。謂南國臣民。偷安江左。頓忘君父之仇。故爲殿下一詳陳之。我大行皇帝。敬天法祖。勤政。

愛民。眞堯舜之主也。以庸臣悞國。有三月十九日之事。法待罪南樞。救援無及。師次江上。凶信突來。地拆天崩。川枯海竭。嗟乎。人孰無君。雖肆法於市朝。以爲泄泄者。戒奚足慰先帝於地下哉。爾時南中臣民。哀慟如喪考妣。無不拊膺切齒。愿悉東南之甲。立剪凶仇。而二三老臣。謂國破君亡。宗社爲重。相與迎立。今上。以繫中外人心。今上非他神宗之孫。光宗猶子。大行皇帝兒也。名正言順。天與人歸。五月朔日。駕臨南都。萬姓夾道歡呼。聲聞數里。群臣勸進。今上退然不自勝。謙讓再三。僮允監國。迨臣民伏闕屢請。始於十五日。進位南都。從前鳳集河清。瑞應非一。卽告廟之日。紫氣如蓋。祝文升霄。萬目共瞻。欣傳盛事。大江湧出神梓數萬。助修宮殿。是豈非天意哉。越數日。遂命法視師江北。刻日西征。忽傳我大將軍吳三桂。借兵貴國。破走逆成。殿下入都。爲我先帝后發喪成禮。掃清宮殿。撫輯群黎。且免薙髮之令。亦不忘本朝。此舉動也。振古鑠今。凡爲大明臣子。無不長跪地面。頂禮加額。豈但如明諭所云。感恩圖報已哉。謹於八月。薄

黃金幣。遣使犒師。請命鴻裁。連兵西討。是以王師既發。復次江淮。乃辱明諭。引
春秋大義。來相詰責。善哉。推而言之。此又爲列國君薨。世子應立。有賊未討。不
忍死其君者之說耳。若夫天下共主。身殉社稷。青宮皇子。慘變非常。而拘牽不
卽位之說。坐昧大一統之義。中原鼎沸。倉卒出師。將何以維繫人心。號召忠義。
紫陽綱目。踵事春秋。其間特書。秦移漢祚。光武中興。丕廢山陽。昭烈踐祚。懷愍
亡國。晉元嗣基。徽欽蒙塵。宋高繼統。是皆於國仇未報之日。亟正位號。綱目未
嘗斥爲自立。卒以正統與之。至於玄宗幸蜀。太子卽位。靈武議者察之。亦未嘗
不許以行權。幸其光復舊物也。本朝傳世十六。正統相承。自治冠帶之屬。繼絕
存亡。仁恩遐被。貴國夙膺封號。載在盟府。殿下豈不聞乎。今痛心本朝之難。而
驅除亂逆。可謂大義復著。春秋昔契丹和宋。多輸以金。綰回紇助唐。原不利土
地。况貴國篤念世好。兵以義動。萬代瞻仰。在此一舉。若夫手足膺難。并同秦越。
規此幅員。爲德不卒。是以義始而以利終。貽賊人竊笑。貴國豈其然乎。先帝軫

念潢池。不忍盡戮。勦撫並用。貽誤至今。今上天縱聰明。刻刻以復仇爲念。廟堂之上。和衷體國。介冑之士。擊楫枕戈。忠義民兵。愿爲國死。竊以爲闖賊之滅。當不越於斯時矣。語有云。樹德務滋。除惡務盡。今賊未伏天誅。捲土西秦。方圖報復。此不獨本朝不共戴天之仇。抑亦貴國除惡未盡之憂。伏惟堅同仇之誼。全始終之德。合師進討。問罪秦中。共梟逆成之頭。以洩敷天之恨。則貴國義聞千秋。本朝固惟力是視。從此兩國世通盟好。傳之不窮。不亦千載一時哉。若夫牛耳之盟。封本朝使臣。久已戴道。不日抵燕。奉盤盂以從事矣。法北望陵廟。無涕可揮。身陷大戮。罪應萬死。所以不卽從先帝者。寔爲社稷之故也。傳曰。竭股肱之力。加之以忠貞。法處今日。鞠躬致命。克盡臣節。所以報也。殿下伏賜垂鑒。可法。又上疏言。三月以來。陵廟荒蕪。山河鼎沸。臣備員督師。而河上之防。百未料理。復仇之師。不及於關陝。討賊之約。不達於北廷。一似君父之仇。置之膜外者。夫我卽卑宮菲食。嘗膽臥薪。聚才智之精神。而枕戈待旦。合方升之物力。而破

釜沉舟。尙恐無救於事。以臣覩廟堂之作用。百執事之精神。殊未盡然。憶北變初傳。人心震駭。臣等恭迎聖駕。臨藩南都。億萬之歡聲動地。陛下初見臣等。言及先帝。則淚下沾襟。次謁孝陵。暨及高皇帝高皇后。則淚痕滿袖。皇天后土。寔式鑒臨。曾幾何時。可忘前事。先帝以聖明罹慘禍。此千古未有之變也。先帝崩於賊。恭皇帝亦崩於賊。此千古未有之仇也。先帝待臣以禮。馭將以恩。一旦大故。在北諸臣。死節者寥寥。在南諸臣。討賊者寥寥。此千古以來未有之耻也。庶民之家。父兄被殺。尙思穴胸斷脰。得而甘心。朝廷顧可漠置。今宜速行討賊之詔。嚴責臣與四鎮。悉簡精銳。直抵秦關。懸上賞以待有功。假便宜而責成效。絲綸之布。痛切淋漓。庶海內忠臣義士。聞而感奮也。國家遭此大變。陛下嗣承大統。原與前代不同。諸臣但有罪之當誅。寔無功之足錄。今恩外加恩。紛紛未已。武臣腰玉。直等尋常。名器濫觴。於斯爲極。以后似宜慎重。端待真正戰功。庶行間猛將勁兵。有所激厲也。至兵行討賊。最苦無糧。似宜將內庫木枿。槩行催解。

湊濟軍需。其餘不急工役。可已。繁費一切。報罷。朝夕宴衍。左右獻諛。一切謝絕。卽事。關典禮。萬不容廢。亦宜槩從儉約。乞陛下念念思祖宗之鴻業。刻刻憤先帝之深仇。振舉朝之精神。萃四海之物力。以併於選將練兵一事。庶乎人心猶可救。天意尙可回耳。疏人不省。時災異疊見。二十九日。東方長庚星。較昔大異。光芒閃爍。有四角或五角。中有刀劍旂幟馬影。似鬪象。且倏大倏小。倏長倏縮。又廟門告災。鳳陽祖陵。疊火。地一日三震。有聲如吼。自秋至冬。烈日如夏。在在赤地。而弘光深居禁中。惟漁幼女。飲火酒。雜伶宦演戲爲樂。修興寧宮。建慈禧殿。大工繁費。宴樂賞賜。皆不以節。國用匱乏。搜括殆盡。佃練湖。放洋船。瓜儀製鹽。蘆洲升課。甚至沽酒之家。每觔定稅錢一文。蓋馬士英濁亂國政。內則田成兩宦。外則楊阮諸奸。兼有興平東平。遙制內權。忻城撫寧。侵撓吏事。邊警日偪。而主不知。小人乘時射利。識者已知不堪旦夕矣。可法統兵抵白洋河。十一月十二日。清兵入宿遷。可法救之。隨拔營去。十三日。高傑抵徐州。先是河南

巡按陳潛夫探得。清朝于十月二十五日發兵。一往山西。一往徐州。一往河南。豫王將從孟縣過河。傑與劉澤清書云。清朝發一王子領兵號二十萬。寧七八千。齊駐濟寧。近日河南撫鎮接踵告警。一夕數至。開封上下北岸。俱是兵衆。間渡甚急。惟恐彼一越渡。則天塹失恃。長江迤北。盡爲戰場。時事到此。令人應接不暇。惟有殫心竭力。直前無二于萬難之中。求其可濟。以報國恩而已。澤清以聞。澤清又言。清朝總河楊方興屯兵宿遷。鑄造鉄條爲紮筏用。大學士王鏊疏請視師江北。以復國仇。不允。士英疏稱。清兵雖屯河北。然賊勢尙張。不無後慮。豈遂投鞭問渡乎。況強弱何常。赤壁三萬。淝水八千。一戰而江左以定。況國家全盛。兵力萬倍於前。廓清底定。愿諸臣刻厲之也。傑遣清肅王書云。逆闖犯關。危及君父。痛憤於心。大仇未復。山川俱蒙羞色。豈獨臣子義不共天。關東大兵。能復我神州。葬我先帝。雪我深怨。救我黎民。前有朝使謹資金幣。稍抒微忱。獨念區區一介。未足答高厚萬一。茲逆闖跳梁西晉。未及授首。凡係

臣子及一時豪傑忠義之士。無不西望泣血。欲食其肉。而寢其皮。晝夜臥薪嘗膽。惟以殺闖逆。報國仇爲汲汲。貴國原有莫大之恩。銘佩不暇。豈敢苟萌異念。自干負義之衍。傑俛以菲劣。奉旨堵河。不揣綿力。急欲會合勁旅。分道入秦。殲闖賊之首。哭奠先帝。則傑之血忠已盡。能事已畢。便當披髮入山。不與世間事。一意額祝。復我大仇者。茲咫尺光耀。可勝忻仰。一腔積懷。無由面質。若傑本念千言萬語。總欲會師勦闖。始終成貴國恤隣之名。且逆闖凶悖。貴國所甚惡也。本朝抵死欲報大仇。亦貴國念其忠義所必許也。本朝列聖相承。原無失德。正朔承統。天意有在。三百年豢養士民。淪肌浹髓。忠君報國。未盡泯滅。亦祈貴國之垂鑒也。清朝報書云。肅王致書高大將軍。果能棄暗投明。擇主而事。決意躬來。過河面會。將軍功名不在尋常中矣。若第欲合兵勦闖。其事不與予言。或差官北來。予令人引奏。先是。清朝副將唐起龍。其父唐虞時。致書傑。勸其早斷速行。有大者王。小者侯。不失如帶如礪。世世茅土之語。傑皆不聽。身先士卒。

沿河築牆。竭力備禦。時有徐州遺賊程維孔。斬木編筏。引兵渡河。僞投傑降。傑誘斬之。取其衆。加傑太子太傅。可法太傅。內外文武爵賞有差。清兵至夏鎮。別由濟寧南下。又從雒陽渡河。攻海州。圍邳州。史可法傑澤清等各告急。不應。十二月十八日。都督陳洪範南還。先是洪範與左懋第等至德州。清朝撫臣方大猷。示以攝政王令。有來使不必敬語。止許百人赴京朝見。十月初一日。至張家灣。懋第欲先謁陵。後進見。攝政王不許。乃遙祭先帝。于十二日入京。館鴻臚寺。越二日。內院剛林來登堂上。責懋第等。江南不應更立天子。懋第不屈。洪範降。懋第請祭告諸陵。改葬先帝。皆不許。乃陳太牢于寺堂。哭祭之。二十七日。放歸。十一月初四日。至滄州。復遣兵追執懋第等北去。改禁太醫院。放洪範。至是歸稱。清兵萬分緊急。旦夕南下。馬士英惡之。曰。有四鎮在。何慮焉。時賊窺突禹州襄城等處。各鎮擁兵不進。惟興平伯高傑提兵二萬。與張縉彥直抵關雒之間。縉彥聯絡寨勇。鼓勵進取。乃分寧陵以東。至歸德。屬王之綱。寧陵以西。

至蘭陽。屬許定國。祥符以西至汜水。屬劉洪起。河洛屬李際遇。摠兵王之綱。斬賊都司虞世傑。巡按陳潛夫。獲太康僞知縣安中等。副將劉鉉。郭從寬等。殺賊六百餘級。擒鄆陵僞知縣王度。許州僞巡捕王法唐。總兵劉洪起。獲汝寧府僞官祝永苞。上蔡僞知縣馮世遇。斬三百七十級。又于襄城斬賊二千二百七十六級。擒賊二百三十一名。總兵許定國。獲陳州僞官惠在公等。以洪起斬獲獨多。仍加二級。晉丁啟睿太子太保。丁魁楚兵部尙書。仍總督兩廣軍務。洪範又請加恩使北勞臣。兵科戴英劾止之。言洪範出使無功。正使身陷異域。下。群聚。晉爵。天下聞之。恐。然。竊笑也。晉陳國事兵部尙書。白貽清太子太保。戶部尙書。贈尙寶司卿許士柔。詹事兼侍讀學士。士柔正色立朝。與溫體仁不合。因摘其舊撰高攀龍誥語降調。朝論不服。至是賜卹。命李永茂巡撫南贛。張秉貞巡撫浙江。各僉都御史。加左良玉太子太傅。予世廕。指揮使。開籓武昌。子夢庚都督僉事。掛平賊將軍印。授楚宗朱盛。濃池州府推官。先是盛濃疏。誣監軍。

御史黃澍。毀制辱宗。貪賦激變。士英喜。特擢之。內批刑部提問。澍不至。贈故舉人歸子慕。張世璋。顧雲鴻。翰林院待詔。山東巡按御史宋學朱。大理寺卿。學朱。戊寅死。節。卹典。爲楊嗣昌所抑。至是。給之。予大學士孔貞運。諡文忠。薊遼總督吳阿衡。諡忠毅。簡討胡守恒。諡文節。貞運以國變痛哭不食死。守恒。阿衡皆死難者。又予修撰沈懋學。諡文節。諭德焦竑。諡文端。祭酒陳仁錫。諡文莊。禮部侍郎張邦紀。諡文懿。仁錫初以忤璫削奪。尋得賜環。典較掄才。橫經造士。生平究心錢穀。邊屯河漕。律曆諸書。著述幾千卷。皆千秋金鏡。子濟生。官太僕主簿。命致祭。故兵部尙書于謙。封謙爲臨安伯。謙奠安宗社有大功。爲奸邪構禍。吏禮部以卹不酬。寃爲之請。卹復左都御史陳于庭。原官。贈少保。二十日。刑部尙書解學龍。上從逆諸臣六等罪。除在北京何瑞徵等二十二。人。俟三年後定奪。一等應礫。宋企郊等十一人。二等應斬。擬長繫秋決。光時亨等四人。三等應絞。擬贖。陳名夏等七人。四等應戍。擬贖。王孫蕙等十五人。五等應徙。擬贖。沈元龍等

十人。六等應杖擬贖。潘同春等八人。存疑另徙。翁元益等二十八人。保國公朱國弼等。合疏糾刑官六失。御史張孫振。又言刑官賣法侮文。革學龍職。以高俸爲刑部尙書。吏科張希夏。吳适抄叅忻城伯趙之龍。荐用人。才疏。謂陳爾翼。頌逆有據。且荐崔呈秀爲本兵。不可復用。忻城再疏爭之。适特疏言祖制。惟科臣專封駁之權。未聞勳爵而叅駁正之司。勳臣黨邪求勝。將部科俱可不設。不幾胥門旨而蔑祖制乎。是時張捷。秉銓部務。皆阮大鍼一手握定。而選郎以貪黷濟之。吏道龐雜已甚。适辦事垣中。抄駁侃侃。不憚權貴。若安遠侯柳祚昌。薦授程士達。督理京營。科叅士達。不過積分監生。非屬舉貢正途。勳臣乃提督大漢。非有標營之責。何得侵樞戎職。掌以奪銓部權衡。慶遠知府郭儀鳳。疏言掛冠勤王。且誣巡撫方震孺貪狀。科叅郡守無勤王之例。掛冠非入援之名。儀鳳不候憲檄。非奉明綸。擅離職守。飾詞妄瀆。察撫臣清執有素。儀鳳穢跡著聞。必懼題叅。先行反噬。自應嚴究。以杜刁風。光祿署丞張星。疏求考選。科叅張星。初以

縣令躁進降虜。又掛察典。不惟望斷清華之夢。亦已身絕仕進之階。乃無端幻想。僥倖上賞。欺君孰甚。若不一爲點破。關門大典。不幾爲燃灰之地。向躍之門耶。保定侯勳衛梁世烈。請襲祖爵。科叅國難以來。雖王侯戚里。咸餒虎狼。華胄重臣。悉罹鋒刃。而其間脫身圖存。埋名溷俗者。固亦不乏。該勳何以逆料其家之必殲。而忍以子嗣乎。萬一本宗匹馬來歸。將奪諸該勳以授乎。抑姑仍之。且兩封之乎。恐無此法紀也。該勳世受國恩。誠恢復有志。何難倡諸勳。舊破家從軍。自當直搗燕雲。上爲先帝復仇。次爲諸勳雪耻。爾時訪問本支。有無存否。然後請諸朝命。光復祖爵。不亦休乎。昔李晟收復長安。下令軍中曰。五日內無得輒通家信。今長安未復。殊非諸臣問家之日也。遂安伯勳衛陳濬疏請襲爵。科叅自都邑變遷。河山阻絕。世次無憑。單詞莫信。業奉明旨嚴覈。該勳一請再請。若不能待。直視五等之封。祇同土塊之乞。亦與菜傭都督。一醉告身。爲可乘時拾芥而攘取乎。况遂安勳衛。今或遯跡閭閻。或從容歸國。安可懸坐鬼錄。使後

來鞍馬遺裔執途人而可稱攀髯孤忠裂本支而他續也中書舍人張鍾齡請給部銜科參職方何官監軍何事妄行陳請若果報國有心何官不可自效而藉口贊畫輒請部銜躁進尤甚他若革職司務朱濟之參議陳之伸勸農知縣夏萬亨計處吏部聶慎行副使曾應瑞知府郭正中躡躑營陞或疏劾或抄索不少假借無奈人心日競啟事日雜雖經封駁銓部竟置高閣旋駁旋用使職掌掃地而宵小盈廷矣除夕弘光在興寧宮色忽不怡韓贊周言新宮宜權弘光曰梨園殊少佳者贊周泣曰臣以陛下令節或思皇考或念先帝乃作此想耶明年乙酉稱弘光元年寔清朝順治二年也元日日有蝕之吳适上言維新五事一曰信詔旨朝廷之有絲綸所以彰示臣民俾知遵守適因事變錯出前後懸殊用人之途始慎而繼以雜誅逆之典初嚴而終以寬禁陳乞矣而於功誦冤者章日上重爵賞矣而請贖乞封者望日奢鎮帥屢責進取而邊巡不前軍需頻督轉輸而庚癸如故欲期畫一宜重王言今後凡奉明旨務俾上作

下應內外永遵。毋致游移。一曰核人才。人才爲治道所從出。將爲其終。先謹其始。頃者典籍無稽。錢神有徑。人思躍冶。初仕輒冀清華。官多借題。行間每增監組。羶逐之謀愈巧。卸担之術偏工。起廢而薰蕕並進。懸缺則暮夜是求。以至薦牘日廣。啟事日勤。今後求才務寬。而用人務覈。寧重嚴於始進。毋追恨於憤輟。一曰儲邊才。將帥之畧。豈必盡出武途。如唐之節度文武兼用。而內外互遷。蓋儲之者素耳。請飭中外蓬華之彥。非韜鈴之畧。勿講。辟舉之選。非軍旅之才。勿登。技勇騎射。日日講求。共激同仇。以振積懦。一曰伸國法。陷北諸臣。已有定案。但恐此輩輦金圖翻。旣以寬其不死者。昭皇仁之浩蕩。尤當以絕其覬用者。明臣子之大防。一曰明言責。祖宗設立六垣。與六部相表裏。是故糾彈之外。復有抄叅。補闕拾遺。務期殫慮。倘掖垣僅取充位。則白簡止貴空懸。則抄發本章。一胥吏事。豈先王設官意哉。望陛下亟進讜言。見諸施行。毋致批答徒勤。而寔效罔著。所裨非淺。疏人不省。都督李際遇降。清。高傑冒雪防河。疏請重兵駐歸。

德。東西兼顧。聯絡河南總兵許定國。以奠中原。定國在睢。傑遺定國銀千兩。幣百疋。初十日。傑抵睢州。明日定國享傑。夜半伏兵起殺之。親兵遇害者過半。餘衆潰還。定國奔清。加監軍衛胤文兵部侍郎。總督傑軍。傑妻邢氏。率子元爵。請卹。弘光命所部將士。仍聽邢氏統轄。史可法請以傑部將李本身爲提督。弘光以興平有子。朕豈以兵馬信地。遽授他人。不允。黃得功復來與傑爭揚州。弘光諭大臣。當先國事。而後私憾。得功若向揚州。致高營兵將棄信東顧。設虜渡河。罪將誰任。命可法鎮撫之。得功回汎。加李本身太子太保。左都督。提督本鎮。赴歸德。中樞總兵揚承祖。赴夏邑。副將劉應虎。赴虞城。苗順甫。赴碭山。後勁總兵季翔雲。赴雙溝。右協總兵胡茂貞。左協總兵郭虎。赴泗州駐防。劉良佐。見傑死。欲併其衆。疏稱潰兵不宜授本身提督。澤清得功。又合奏傑無寸功。加恩太重。臣等不能相安。而寧南侯左良玉。有忠胤將同壓卵之疏。九江總督袁繼咸。亦有興平有可念之勞之疏。贈傑太子太保。許其子襲爵。再陰一子錦衣衛百

戶從優議予祭葬。調湖廣總兵官方國安駐防江浦。授降將狄應奎副總兵官。應奎殺賊。權將軍路應樞挈印來歸者也。南贛巡撫李永茂奏報寇擾汀州。命福建巡撫張肯堂督勦。是時汀州賊閩王豬婆營盤據簾子洞。劫掠橫行。肯堂親征之。寧化知縣于華玉不得於鄉紳。愿撫賊自効。既往。幾不免。遂許以官。與數百人偕來。肯堂給劄。命華玉率之勦。王至浙東。各散去。華玉亦削髮爲僧。進吏部侍郎。蔡奕琛爲東閣大學士。通政使楊維垣疏請重定欽案。吏部尙書張捷又奏請表章三案諸臣。於是劉廷元、呂純如、王德完、黃克纘、王永光、楊所修、章光岳、徐大化、范濟世各予謚。廕祭葬。徐揚先、劉廷宣、許鼎臣、岳駿聲、徐卿伯、姜麟各贈官予祭葬。王紹徽、徐兆魁、喬應甲、陸澄原各復原官。而唐世濟、水佳胤、楊兆升、吳孔嘉、郭如闇、周昌晉、袁洪勳、徐復揚、陳以瑞等先後起用。維垣又請重頒三朝要典。言張差瘋顛。強坐爲刺客者。王之案也。李可灼紅丸謂之行鳩者。孫慎行也。李選侍移官。造以垂簾之謗者。楊漣也。劉鴻訓、文震孟只快驅。

除異已。不顧誣謗君父。此要典必須重頒也。袁洪勳又請追論焚要典諸臣罪。左良玉力言要典治亂所關。勿聽邪言。致興大獄。弘光以此朕家事。不必疑揣。袁繼咸亦言要典不必重陳。弘光云。皇祖妣皇考無妄之誣。豈可不雪。事關青史。非存宿憾。群臣當體朕意。吳孔嘉又奏三朝要典。須備列當日奏議。以存其寔。允之。陞維垣都察院副都御史。監生陸濬源。又備題三案。疏糾光祿少卿許譽卿。譽卿一代正人。疏言當日諸臣以翊戴光廟爲正。今日諸臣以翊戴陛下爲正。俱從倫序起見。光宗母子無間。先帝身殉社稷。何嫌何疑。而小人無端播弄。假手濬源。先帝久任體仁。養寇釀禍。使得生榮死寵。竊謚文忠。陛下追削萬口稱快。濬源滿口頌其平章之功。甚矣若輩之敢於黨奸欺上也。陞阮大鍼兵部尙書。賜蟒服。中書舍人林翹疏稱正月初六日。雷聲自北至西。占在趙晉之野。有兵。日在庚寅。主口角妖言。翹江浦人。善星術。馬士英在戌日。卜其大用。士英荐授中書。尋躋一品武銜。蟒玉趨事。未幾獲妖僧大悲。僧倖齊庶宗。妄稱定

王下法司會審棄市。遣太監李國輔開採雲霧山。給事中吳适疏言雲霧山一名封禁山。縱橫數百里。北通徽池。南連八閩。東抵衢嚴。西界信州。唐宋以來。每爲盜藪。其間深谷窮淵。虎狼接跡。險阻極目。無徑可攀。且地接祖陵龍脉。爲神京右臂。歷朝禁止樵牧。封禁所由名也。英宗初年。遣官採木。於是地方訛棍。互相煽惑。而狐假之輩。因之攘奪小民。招引匪類。大肆劫掠。兼多內外官屬供億之費。數邑坐困。民不聊生。近山良民。遂鳥獸散。大盜鄧茂七等。聚衆數萬。藉以爲窟。攻城殺令。合四省兵力討之。十四年乃戡定。奉旨照舊封禁。往禍蓋可鑿也。臣竊以界通四省。境地相岐。內阻峻嶺。外多絕谷。綿延重疊。羣路崎嶇。厲禁既久。開鑿維艱。不便一。林莽高深。重嶂疊峯。毒蛇猛獸。生育繁滋。一旦開伐。奔突狂噬。傷人必多。不便二。邃深幽奧。迴絕垣區。水不通舟。陸難移運。縱使輪垂。再出。嚙令神輪。不便三。乘傳驛騷。有司困於供億。誰籌正賦。且吏胥假公行私。何所不至。而力田小民。棄本逐末。消磨歲月。土田有荒蕪之困。力役多死亡之

憂不便四。輿朝舉動。天下頤望。以下安危。今以無利有害之事。而特遣重臣。搖動人心。傾危四省。垂之史冊。貽譏後世。不便五。遠邇傳聞。必且蜂屯蟻聚。競營巢穴。居奇召亂。約束無力。是使盜賊復生。而殺僇再見。不便六。况臣訊之父老。僉云此山地連陵寢。自正統初開伐。致傷地脉。遂釀土木之難。洩山川靈氣。不便七。舉此數端。有害無利。伏惟陛下採擇。國輔亦疏請中撤。俱不許。馳視如适。言報罷。國輔係大司禮韓贊周養子。贊周閹寺中正人也。傷心時事。杜門休沐。國輔時在宮中。每有匡救。人以張永目之。馬士英視爲眼中釘。因屬所私。以開採事誑國輔。具疏請往。其寔士英意不在開採也。國輔提督勇衛營。操練禁旅。及奉命往浙。士英竟奪營篆。授其子馬錫。以乳臭兒。縮兵柄。時事可知。适疏出。士英遂切恨之。予吏部侍郎顧起元諡文莊。都督劉源清諡武節。起范鳳翼光祿寺少卿。陳洪謚太僕寺少卿。考選林有本。沈應昌。張社民。韓接祖。錢源。徐方來。莊則敬。爲給事中。王錫袞。劉勳。夏繼虞。郝錦。王大捷。畢十臣。張兆熊。王養。郭

貞一爲御史。陞瞿式耜僉都御史。巡撫廣西。王驥副都御史。巡撫湖廣。馬乾僉都御史。巡撫四川。廣昌伯劉良佐等合詞薦起朱大典爲兵部侍郎。大典久任鳳督。毀家起兵。屢著戰功。御史鄭瑜劾其侵贓百萬。弘光以大典創立軍府。所養士馬。豈容枵腹。詔勿問。戎政兵部尙書張國維予告歸。御史張孫振劾在告禮部尙書顧錫疇。險邪有玷秩宗。以其請削溫體仁諡。而諡文震孟也。命錫疇致仕去。上林監丞賀儒修。奏禮部侍郎管紹寧貪穢寔跡。詔勿問。外轉給事中馬嘉植。御史沈寔荃。吏部余颺。爲司道等官。以與士英不合故也。禁宗室入京。師時自二月以來。日月色甚赤。欽天監占候以聞。朱國弼疏論原任漕撫路振飛。稱鳳陽有天子氣。懷逆謀。弘光詰振飛意屬何人。原任杭州府推官黃端伯。先以無故削髮。奉先帝旨勘問。至是入京。稱姜曰廣逆謀有狀。援引鬼神。士英喜。令與考選。以試卷多西域語。得禮部主事。禮部侍郎管紹寧。諫上先帝太子諡。曰獻愍皇太子。永王曰永悼王。定王曰定哀王。未幾鴻臚寺少卿高夢箕密

奏先帝太子在浙。三月初一日。命大監李繼周密捧札召至。厲僧寺。令內員迎入宮。內員歸報不寔。尋命移寓錦衣衛都督馮可宗家。傳文武官識認。各冠帶往。携吉服朝服備朝賀。見其人南面坐。大學士王鐸指原任講官方拱乾。問曰。此何人。對曰。方先生。而講官劉正宗趨上不識也。正宗拱乾問講讀先後。對曰。忘之矣。又問書做字句。亦曰忘之矣。給事中戴英問先帝親鞫吳昌時於廷。東宮立何地。對曰。誰吳昌時。英乃直詰之曰。汝是詐冒。以寔告。當救汝。卽跪請救。命授以紙筆。供稱高陽人王之明。係駙馬王昺孫。家破南奔。遇高夢箕家人穆虎。教以詐冒東宮。王鐸等面奏狀。弘光流涕曰。朕未有子。東宮若真。卽東宮矣。明自正宗英各具奏王之明僞假太子。非稚年所能辦。必有大奸。挾爲奇貨。宜勅法司根究。中允李景灑亦奏東宮的係假冒。御史陳以瑞又奏愚民觀聽易惑。道路籍籍。皆以諸臣有意傾先帝之血胤。弘光諭將王之明好生護養。勿驟加刑。侯正告天下。愚夫愚婦。皆已明白。然後申法。有內員上密疏。弘光令持

示士英。士英言細閱密疏。其言雖似。疑處寔多。既爲東宮。幸脫虎口。不卽到官說明。却走紹興。可疑一也。東宮厚賀凝重。此人機辨不出。可疑二也。公主現養周奎家。而云已死。可疑三也。臣愚以太子必已死。宜行嚴審。如其假冒。當付法司。與臣民共見而棄之。如眞東宮。則祈取入深宮。留養別院。不可分封於外。以啟奸人之心。越三日。集文武百官舉監生員者。老於午門外。鞠之。夢箕穆虎皆具服。如之明言。下之明刑部獄。傳諭穆虎。若非奸人。豈敢挾王之明。冒認東宮。正月二月。所成何局。往閩往楚。欲幹何事。主使附逆。寔繁有徒。着法司窮治。蓋士英意在姜黃輩。而京師士民。謬以太子爲非僞也。十三日。又有故妃童氏。自越其傑所至。命付錦衣衛監候。初弘光爲郡王。娶妃黃氏。早逝。既爲世子。又娶李氏。洛陽之變。又亡。童氏本周府宮人。逃亂至蔚氏縣。遇弘光於旅邸。相依生一子。已六歲。賊破京師。弘光南奔。各不相顧。太妃與妃各依人自活。太妃之南。陳潛夫奏妃故在弘光弗召。至是自詣其傑所來。弘光弗悅也。劉良佐言童氏

知非假冒。馬士英亦言。苟非至情所關。誰敢與陛下稱敵體。宜迎童氏歸內。密諭河南撫按。迎致皇子。以慰臣民之望。以清奸宄之心。童氏在獄。細書入宮。月日相離。情事甚悉。求馮可宗呈覽。弘光棄去弗視。可宗辭審。尋命屈尙忠。嚴刑酷拷。童號呼詛罵。尋度死獄中。未幾左良玉具疏請保全東宮。以安臣民之心。謂東宮之來。吳三桂寔有符驗。史可法明知之。而不敢言。此豈大臣之道。滿朝諸臣。但知逢君。不惜大體。前者李賊逆亂。尙錫王封。不忍遽加刑害。何至一家反視爲仇。明知窮究。並無別情。必欲轉轉誅求。遂使陛下忘屋烏之德。臣下絕委裘之義。普天同怨。陛下獨與二三奸臣。保守天下。無是理也。親親而仁。民愿陛下省之。有旨東宮果眞。當不失王封。但王之明。被穆虎使冒太子。正在根究奸黨。其吳三桂史可法等語。尤係訛傳。法司將審明畧節。先諭該籓。黃得功言東宮未必假冒。各官逢迎。不知的係何人。辨明何人。定爲奸僞。先帝之子。卽陛下之子。未有不明不白。付之刑獄。人臣之義。謂何。恐在廷諸臣。諂徇者多。抗顏

者少。即使明白識認。誰敢出頭取禍乎。劉良佐言王之明童氏兩案。未協輿論。懇求曲全兩朝彝倫。毋貽天下後世口實。工部侍郎何楷言鎮疏東宮甚明。湖撫何騰蛟言太子到南。何人奏聞。何人物色。取召至京。馬士英何以獨知其僞。既是王昺侄孫。何人舉發。內官公侯。多北來之人。何無一人確認。而泛云自供。高夢箕前後二疏。何以不發抄傳。此事關天下萬世是非。不可不慎。江督袁繼威言太子居移氣養。必非外間兒童所能假襲。王昺原係富族。高陽未聞屠害。豈無父兄群從。何事隻身流轉到南。既走紹興。於朝廷有何關係。遣人踪跡召來。詐冒從何因起。望陛下勿信偏詞。使一人免向隅之恨。則宇宙享蕩平之福。弘光以王之明自供甚明。命法司將審明節畧各諭之。吏部尙書張捷題准郵成國公朱純臣。照張輔例贈王純臣。固先勸進。爲賊所誅者也。琉球國遣使入貢。請襲封。命給事中陳燕翼行人韓元勳。各給一品服色前去。原任中允李明睿泛海南歸。弘光以忠節深嘉之。十九日設壇太平門外。百官素服。望祭先

帝獨阮大鍼後至。哭呼先帝而來曰。致先帝殉社稷者。東林諸臣也。不盡殺東林諸臣。不足以謝先帝。今陳名夏徐汧等。俱北走矣。馬士英急止之曰。徐九一。現有人在。大鍼日與揚維垣謀。必欲盡殺東林復社諸人。大獄將興。尋以上游告警姑緩。或夜半書士英堂中云。闖賊無門。匹馬橫行天下。元兇有耳。一兀直搗中原。求其人不得。倉場尙書賀世壽。僉都御史郭維經。告病去。維經江右正人。群小指爲南昌私黨。大鍼密遣兵於江中。刦之。以應天府丞鄒之麟爲都察院僉都御史。陞何騰蛟兵部侍郎。兼僉都御史。總督川湖雲貴廣西軍務。揚鶚回部管事。時鶚撫湖南。士英慮其人情不調。疏令回部。鶚抗疏言人情極調。且臣與良玉旂鼓相當。英雄本色。丈夫肝腸。青天白日。伏乞以後申飭臣工。收斂精神。用之勤禦。釋此不必然之疑。省此不必然之事。若知之不明。處之不當。聽細人之言。薄勞苦功高之士。識者灰心。人人解體。殆非所以鞏朝廷而鼓忠勇也。戶科吳定亦言鶚與良玉慷慨同仇。共矢夾輔。潛沅數日。酌定營制。經理屯

田業有端緒。不久撤回。大業弗竟。臣恐湖南自此瓦解而楚事不可爲矣。夫大敵在前。屢易大帥。軍法所忌。寧擇而後用。致審於任事之初。無用而後擇。輕更於受命之後。疏入不省。劉良佐奏報許定國引清兵入儀封。李本身劉洪起。馳斬定國先鋒劉道行。清兵入考城。加洪起太子太保。清兵尋破歸。按御史凌嗣死之。侄潤生自縊。駟遣清朝書有云。愿堅盟好。勿輕南下。否則楊子江頭凌御史。卽錢塘江上吳相國也。事此贈駟兵部侍郎。潤生御史。清兵進逼江北。直下徐穎。總兵李成棟南遁。四月初一日。命盡去各衙門印文。南京二字。因禮部管紹寧印被竊。馬士英請改鑄另給也。初四日。寧南侯左良玉舉兵東下。馳疏至云。竊見逆賊馬士英。出自苗種。性本兇頑。臣身在行間。無日不聞其罪狀。無人不恨其奸邪。先帝皇太子至京。道路洵傳。陛下屢發矜慈。士英以真爲假。必欲置之死而後快其謀。臣前兩疏。望陛下從容審處。猶冀士英夜氣稍存。亦當別腸悔過。以存先帝一綫。不意奸謀日甚。一日。臣自此義不與

奸賊共天日矣。臣已提師在途。將士眦目指髮。人人必欲快食其肉。臣恐百萬之衆。發而難收。震驚宮闕。且聳其罪狀。正告陛下。仰祈剛斷。與天下共棄之。自先帝之變。人人號泣。士英利災擅權。事事與先帝爲難。欽案先帝手定者。士英首翻之。要典先帝手焚者。士英修復之。思宗改謚。明示先帝不足思。以絕天下報仇雪耻之心。罪不容於死者一也。國家提衡文武。全恃名器。鼓舞人心。自賊臣竊柄以來。賣官鬻爵。殆無虛刻。都門有職方賤如狗。都督滿街走之謠。如越其傑以貪罪遣戍。不一年而立陞部堂。陳洪謚以賍污狡犯。不數月而貴。縱僕少。袁洪勳與張道濬。皆詔獄論罪者也。借起廢徑復原官。如楊文驄。劉泌。王燧。以及趙書辦等。或行同犬彘。或罪等叛逆。皆用之於當路。凡此之類。直以千計。罄竹難書。罪不容於死者二也。閣臣司票擬。政事歸六部。至於兵柄。又不得兼握。士英已爲首輔。猶復掌樞。是弁髦太祖法度。且又引其腹心阮大鍼。爲添設尙書。以濟其篡弒之謀。兩子梟獍。各操重兵。以爲呼應。司馬昭復生於今日。罪

不容於死者二也。陛下選立中宮。典禮攸關。士英居爲奇貨。先擇其尤者以充下陳。罪通於天。而又私買歌女。寄養阮大鍼家。希圖進選。計亂中宮。陰謀叵測。罪不容於死者四也。陛下卽位之初。恭儉神明。士英百計誰惑。進優童豔女。損傷盛德。每對人言。惡則歸君。罪不容於死者五也。國家遭此大難。須寬仁慈愛。以收人心。士英自引用阮大鍼以來。睚眦殺人。如雷縝。祚周鑣等。煨煉周內。株連蔓引。尤其甚者。借題三案。深埋陷阱。將生平不快意之人。一網打盡。今天下士民。重足解體。罪不容於死者六也。九重秘密。豈臣子所敢言。士英遍布私人。凡陛下一言一動。無不窺視。又募死士。竄伏皇城。詭名禁軍。以觀陛下動靜。曰廢立由我。罪不容於死者七也。率土碎心。痛號者。先帝殉難。皇子猶存。前此定王之事。海內至今傳疑未已。况今皇太子授受分明。臣前疏已悉。士英乃與阮大鍼一手拿定。不畏天道神明。不畏二祖列宗。不畏天下公議。不畏萬古綱常。忍以先帝已立七年之嗣君。爲四海謳歌訟獄所歸者。付之幽囚。天昏地慘。神

人共憤。凡有血氣。皆欲寸磔士英大鉞等。以謝先帝。此非臣之私言。諸將士之言也。非獨臣標將士之言。天下忠臣義士。愚夫愚婦之公言也。伏乞陛下立將士英等肆諸市朝。傳首四方。用抒公憤。臣等束兵計刻以待。不禁大聲疾呼。激切以聞。又傳檄云。蓋聞大義之垂。炳於星日。無禮之逐。嚴於鷹鵠。天地有至公。臣民不可罔也。無臣馬士英。根原赤身。種類藍面。昔冒九死之罪。業已僑妾作奴。屠髮爲僧。重荷三代之恩。徒爾狐窟白門。狼吞泗上。會當國家多難之日。侈言擁戴勸進之功。以今上曆數之歸。爲私家携贈之物。窃弄威福。煬蔽聰明。持兵力以脇人。致天子閉目拱手。張僞旨以蠶俗。俾兵民重足寒心。本爲報仇而立君。乃事事與先帝爲仇。不祇矯誣聖德。初因民願而擇主。乃事事拂兆民之願。何由奠壓民生。幻蜃蔽天。妖霧障日。賣官必先姻婭。試看七十老囚。三木敗類。居然節鉞監軍。漁色罔識君親。托言六宮備選。二八紅顏。變爲桑間濮上。蘇松常鎮橫征之使。肆行攜李會稽。妙選之音。且下江南。無夜安之枕。言馬家倒。

爾殺人。北斗有朝彗之星。謂英名寡應圖讖。除誥令贈廕之餘。無朝政。自私怨。蒼仇而外無功能。類此之爲。何其亟也。而乃永山發饑。鱷水興波。群小充斥於朝端。賢良竄逐於雁谷。同己者性侔豺虎。行列猪狐。如阮大鍼某某等。數千巨。慙皆引之爲羽翼。以張殺人媚人之赤幟。異己者德並蘇黃。才姬房杜。如劉宗周。姜曰廣。高弘圖等。數十大賢。皆誣之爲朋黨。以快虺如蛇如之狼心。道路有。曰空憐職方如狗。都督滿街之謠。神明難欺。最痛立君由我。殺人何妨之句。嗚呼。江漢長流。瀟湘盡竹。罄此之罪。豈有極與。若鮑魚蓄而日羶。若火木重而逾烈。敖崔魏之獍狗。遽敢滅倫。收闖猷之獼猴。教以升木。用腹心出鎮。太尉朱泚之故智。幾幾殆有甚焉。募死士入宮。宇文化及之所爲。人人而知之矣。是誠河山爲之削色。日月條以無光。又况皇嗣幽囚。烈祖怨恫。海內懷忠之臣。誰不願食其肉。敵國响風之士。咸思操盾其家。本藩先帝舊臣。招討重任。頻年痛心疾首。願爲鼎邊鷄犬以無從。此日履地戴天。誓與君側豺狼而併命。在昔陶八州。

靖石頭之難。大義於今炳然。迄乎韓蘄王除苗氏之奸。臣職如斯。乃盡是用礪兵秣馬。討罪興師。當鄭畋討賊之軍。憶裴度閉邪之語。謂朝中奸黨盡去。則諸賊不討自平。倘左右兇惡未除。則河北雖平無用。三軍之士。戮力同仇。申明仁義之聲聞。首嚴焚戮之隱禍。不敢妄殺一人。以傷天心。不敢荒忽一日。以忘王室。義旗所指。正明爲人臣子。不忘君父之心。天意中興。必有間世英靈。矢翼皇明之運。泣告先帝。揭此心肝。願斬賊臣之首。以復九京。還收阮奴之黨。以報四望。倘惑於邪說。誣誤流言。或受奸臣之指揮。或樹義兵之仇敵。本藩一腔熱血。爲輪困離奇。勢必百萬雄兵。化作蛟螭妖孽。玉石俱焚之禍。近在目前。水火無情之時。追維心痛。敬布苦衷。愿言其事。嗚呼。朝無直臣。誰斥李林甫之奸邪。國有同心。尙懷鄭虎臣之素志。我祖宗朝三百年養士之德。豈其決裂於僉壬。大明城十五國忠義之心。正宜暴白於魂魄。速張殪虎之機。勿作逋猿之藪。然董卓之腹。膏溢三旬。籍元載之廚。椒盈八百。國人盡快中外。甘心謹檄。又沿途

遍張告示。稱本藩奉太子密旨。率師赴救。士英等大懼。京師戒嚴。士英揣理部事不入直。江督袁繼咸請赦太子以遏止之。弘光切責。時左兵由九江安慶至建德。順流而下。調黃得功。劉良佐。離汎。遣劉孔昭。阮大鍼。方國安。朱大典。同禦之。陞大典兵部尙書。國安掛鎮南將軍印。劉澤清亦托勤王。率兵大掠南行。揚泗徐碭。勢同鼎沸。史可法連疏告警。弘光曰。上游急則赴上游。北兵急則赴北兵。自是長策可法曰。上游不過欲除君側之奸。原不敢與君父爲難。若北兵一至。宗社可虞。不知輔臣何意。朦蔽至此。乃移書士英。懇其選將添兵。大聲疾呼。士英惟以左兵爲慮。不應。劉洪起又奏。清兵直下。無人敢遏。恐爲南京之憂。王永吉又奏。徐鎮孤危。勢不能存。必保徐州。方保江北。可法又請面朝。處分東宮。以息群囂。弘光諭西警方急。卿專心料理。待奏凱復見。可法嘆曰。奏凱二字。談何容易。誠如上言。面君不知在何日矣。又連上二疏。一劾各鎮擁兵糜餉。一劾李成棟避敵南奔。士英亦不應。弘光惟以選淑女爲急。先是。應天府選三名。

不中。司禮監又選六名。亦不中。特遣內監田壯國往杭州。選陳氏王氏李氏三人。着於十五日進元暉殿。命戶工部各委官一員。採辦中宮珠冠。禮冠三萬兩。常冠一萬兩。殺從逆光時亨。周鍾。武懷。又殺原任武德道僉事雷縉祚。禮部主事周鏞。鏞與鍾從兄弟也。負時譽。與阮大鍼有隙。士英。叅鍾從逆。謂鏞當坐。照磨張明弼。奏鏞險惡。朱統鑽復據鏞他事。論劾提問。縉祚亦與大鍼有怨。澤清疏攻大噐及縉祚。大鍼復奏縉祚不忠不孝。吏科林有本繼之。有旨從逆各犯。及雷縉祚二案。着法司速行訊結。光時亨者。與李明睿不同聲氣。阻駕南遷者也。故與四人同死。改王永吉總河。兼督淮揚鳳應等處。錢繼登巡撫揚州。日仰撤回另用。時清兵已徇徐揚。下亳泗。乘勢渡淮。如入無人之境。十九日召對。馬士英力請亟禦左良玉。大理寺卿姚思孝。尙寶司卿李之椿等。合詞請備淮揚。工科吳希哲等亦言淮揚最急。應亟防禦。弘光諭士英。左良玉雖不該興兵。以逼南京。然看他本上意思。原不曾反叛。如今還該守淮揚。不可撤江防兵。

士英。聲指諸臣對曰。此皆良玉死黨爲遊說。其言不可聽。臣已調得功良佐等渡江矣。寧可君臣皆死於清。不可死於左良玉手。瞋目大呼。有異議者當斬。弘光嘿然。諸臣咸爲咋舌。禮部尙書錢謙益言。陳洪範還該收他。弘光諭國家何嘗不收人。只是收來不得其用。希哲退曰。賈似道棄淮揚矣。給事中吳适疏。叅方國安。牟文綬。言文綬本無寸功。驟列大帥。乃復縱兵譁掠。摧陷建德。東流。大屬非法。國安受國厚恩。乃銅陵西關。南陵城外。聚兵攻擊赤子。何辜遭茲塗炭。益之深。熱其與。叛逆何異。陛下宜加禁戢。蔡奕琛等票旨。文綬久在南康。國安現在勦逆。吳适譎言亂政。爲逆臣出脫。是何肺腸。明日奕琛具疏。特糾逮适下獄。先是左光先按浙。會鞠奕琛一案。這時爲衢州司理。與紹興司理陳子龍共成是獄。及奕琛入相。與阮大鏞同心排擠光先。以致褫逮。并及於适。寔借題以快夙憾。而國事封疆。俱置不問。御史張孫振。又有疏糾适爲東林嫡派。復社渠魁。宜速正兩觀之誅。二十四日。清兵攻揚州。史可法禦之。薄有斬獲。攻

益急。血奏請救。不報。可法開門出戰。清兵破城入。屠揚州。可法死之。原任兵部尙書張伯鯨被執。不順。身被數創。自剄死。妻楊氏。媳郝氏。從之。明日弘光召群臣。問遷都計。錢謙益言不可。馬士英請調黔兵入衛。辦走貴陽。工科吳希哲等力諫。乃止。召黔兵一千二百名入城。命住鷄鳴山房。良玉舉兵不數日。病死。子夢庚。東下至采石。爲黃得功。方國安所敗。尋聞清兵信急。引還。捷聞。封得功靖國公。并晉大鍼。大典。太子太保。總兵張杰等。各加級有差。五月。以巡漕御史霍達。監軍僉事楊文驄。分設蘇松常鎮巡撫。各僉都御史。初五日。百官進賀。弘光以演戲不視。勅馬士英傳令各門下閘。辰開申閉。封鄭鴻逵。靖虜。伯世襲。賜蟒衣金幣。清兵既破揚州。沿江間渡。惟鄭鴻逵一旅。守於京口。初八日夜。清兵編筏。張燈向鎮江。而別由老鸛河渡。初九日。盡抵南岸。鄭兵揚帆東遁。初十日。閉京師各城門。晝晦。大風猛雨。午後。猶集梨園入內演戲。弘光與諸內臣。雜坐酣飲。二鼓出奔。五鼓。士英奉太后。召黔兵護衛走浙。黎明內門不閉。宮

女雜走。於是各官奔竄。十一日忻城伯趙之龍閉各城門以待。清兵居民競殺城內外黔兵。無有逸者。午刻有監生趙某率市人百衆出王之明於獄。擁入宮中。登殿鳴鐘。百官莫有至者。吏部尙書張捷副都御史楊維垣自經死。妾朱氏孔氏從之。王之明粘示皇城。畧云。先皇帝丕承大鼎。惟茲臣庶同共甘苦。胡天不祐。慘罹奇禍。凡有血氣。裂眦痛心。泣予小子。分宜殉國。思以君父大仇。不共戴天。皇祖基業。汗血匪易。忍垢匿避。圖雪國耻。幸文武先生迎立福藩。予惟先帝之哀。奔投南都。寔欲哭陳大義。不意巨奸障蔽。至櫻桎梏。予雖幽獄。無日不痛絕也。福王聞兵遠遁。先爲民望。其如高皇帝之陵寢何。泣予小子。父老人民。圍抱出獄。擁入皇宮。予身負重寃。豈稱尊南面之日乎。謹此布告在京勳舊文武先生士庶人等。念此痛懷。勿惜會議。予當恭聽。共抒皇猷。勿以前日有不識予之嫌。惜爾經綸之教也。十二日。欽天監挈壺官陳于階自經。是日弘光駐太平府二十里外。黃得功阮大鍼朱大典方國安等來見。欲入太平。太平民不

納十三日往蕪湖。總兵官黃斌卿遁。登中軍翁之琪舟。十四日將往浙時。清豫王已薄都城。趙之龍同王之明出降。豫王加之龍與國公。賜金鐙鞍馬貂裘寶帽。設牛酒軍中晏之。十六日豫王入京。百官朝見。百姓家設香案投誠。豫王出示曉諭。大畧云。福王僭稱尊號。沉湎酒色。信任僉壬。民生日瘁。文臣弄權。只知作惡納賄。武臣要君。惟思假威跋扈。上下離。遠近仇恨。時劉孔昭往浙。劉澤清入海。劉良佐降。奉豫王命。引兵追弘光至蕪湖。於十五日及之。且召黃得功。得功不從。良佐伏弩射中得功喉。得功創甚。拔劍自刎。良佐挾弘光去。之琪投水死。弘光見豫王於內守備府。王責其僭位稱尊。荒酒好色。及謀害太子等事。弘光嘿然。隨囚於江寧縣。刑部尙書高倬。戶部郎中劉成治。署中自經。十八日。國子監生吳可箕。鷄鳴山關廟中經死。二十三日。中書舍人龔廷祥。投秦淮河中死。其死不知日者。中書舍人陳燠。及子舉人陳伯僉。戶部主事吳佳胤。死不知名者。投秦淮河中馮小璫。百川橋下乞兒也。小璫以色幸。卒以身殉。乞兒

題詩橋上有云。三百年來養士朝。如何文武盡皆逃。綱常留在卑田院。乞丐羞存命一條。禮部郎中劉萬春。主事黃端伯。以不朝斬之。豫王分兵畧定各屬。而命御史王懷。劉光斗。鴻臚丞黃家鼐等。分往招撫。家鼐至蘇遇害。蘇州諸生願所受。服儒服。哭文廟。投泮池死。原任少詹徐汧。沉虎丘後溪死。玄廟觀前賣麵人。夫婦對經死。常州石生。及賣扇歐姓者。投西廟池中死。又一鄉民賣柴入城。聞安撫使至。棄柴船。躍入文城壩。南龍游河死。五牧有蓄鵝鳥薛叟。以薙髮自縊死。常熟諸生徐懌。以薙髮自經死。諸生項志寧。不食死。武進諸生董元哲。痛哭死。至於各處起兵見殺。則貴池諸生吳應箕。宣城諸生麻三衡。徽州鄉宦金聲。武官陳有功。余元宣。萬會。吳國禎。而蘇州原任遊擊魯之璣。及章武韜俱戰死。嘉定原任通政使侯峒曾。城破。與子諸生侯玄演。侯玄潔被殺。進士黃淳耀。與兄黃淵耀。及舉人張錫眉。龔用圓。俱死。常熟諸生徐守質戰死。崑山貢生朱集璜。城破被執。不順死。故將王公揚。年七十。戰死。諸生陶琰。城破自刎死。原任

狼山總兵王佐才爲亂兵殺死。一家老幼屠戮殆盡。松江原任中書李待問。博羅知縣章簡。城破被殺。吏部主事夏允彞投水死。總兵吳志葵黃蜚。駐兵豆腐浜。被擒。解至南京殺死。華亭教諭陸明永。被執不順死。常州諸生吳福之。徐安遠。入太湖。從黃兵。兵敗。福之投水死。安遠被殺。諸生張龍文。率鄉兵薄郡城殺死。江陰屢攻不下。至三月乃尅。遂屠其城。典史陳明遇闔門投火。閩應元不順。見殺。訓導馮某自縊。明倫堂上。中書戚勳全家焚死。及兵下嘉湖。吏部郎中錢棟戰歿震澤。原任吏部尙書徐石麒自縊。其僕祖敏。徐錦從死。兵至杭州。潞王以城投順。杭州原任行人陸培縊死。錢塘知縣顧咸建不順被殺。某縣知縣梁于湮亦死。其前遣使臣左懋第。在北聞江南陷。七日不食。攝政王召見。麻衣。孝巾。草屨。向上。長揖。南面而坐。攝政王數以僞立福王。勾引土寇。不投國書。擅殺總兵。當廷抗禮。五大罪。懋第抗詞。惟請一死。命雍髮。堅不肯。於閏六月十九日殺之。題絕命詩有云。峽坼巢封。歸路迴片雲。南下意如何。寸丹冷魄消。難盡蕩。

作寒烟。總不磨。叅謀兵部主事陳用極。游擊王一斌。張良佐。王廷佐。劉統等。五人從死。忽沙風四起。捲市棚於雲際。屋瓦皆飛。一時罷市。豫王旣定江浙。尋歸北京。挾弘光王之明去。不知所在。

明季南北遺聞

二百三十一

明季南北遺聞卷四 福建兩廣

江左鄒 漪流綺輯

乙酉五月。清兵渡江。南都弗守。總兵官鄭鴻逵、鄭彩、撤師回閩。會唐王從河南來。奉之俱南。至福州。與福建巡撫張肯堂、巡按御史吳春枝、禮部尙書黃道周、南安伯鄭芝龍等共會議。立唐王爲監國。王大祖後也。封南陽。初以父歿。失愛於祖。兩叔謀奪嫡。未得請名。及祖端王薨。守道陳奇瑜知府王之柱爲之請嗣。後以統兵勤王。擅離南陽。錮高墻。會赦出。性率直。喜詩書。手草傳檄。洒洒數千言。鴻逵請正位。不然。無以壓衆心。而杜後起。芝龍意別有在。固諍以爲不可。諸大臣多言監國名正。出關尺寸。建號未遲。而李長倩有急。出關。緩正位。示監國無富天下心。一疏不報。擁入者艷翊戴功。不數日。卽定議。卽帝位于福州。時閏六月十五日也。是日郊天。大風震起。拔木揚沙。及駕回宮。尙寶司卿坐馬。忽驚躍起。玉璽墜地。損其一角。人咸異之。改福州爲天興府。以布政司爲大內。大

赦。改元隆武。封鄭芝龍爲平虜侯。鄭鴻逵爲定虜侯。鄭芝豹爲澄濟伯。鄭彩爲永勝伯。設六部九卿。以張肯堂爲吏部尙書。李長倩爲戶部尙書。曹學佺爲禮部尙書。吳春枝爲兵部尙書。周應期爲刑部尙書。鄭瑄爲工部尙書。馬思理爲通政使。鄭廣英爲錦衣衛都督。以天建延興四府爲上遊。汀邵漳泉四府爲下游。各設撫按。縣陞府。府陞道。道轉內卿。一命以上。咸與寵錫。於是數求耆碩。起蔣德璟、黃景昉、黃道周、蘇觀生、何楷、陳洪謐、林欲楫、朱繼祚、黃鳴俊、皆爲大學士。改庶吉士爲庶萃士。命觀生主之。以招選賢才。又起曾櫻、何吾騶、郭維經、葉廷桂。以次至。皆入閣辦事。其遠不能至者。如王應熊、楊廷麟等。僅列其名。閣臣至三十餘人。然俱閒無事。不令票旨。皆隆武親爲之。德璟景昉欲楫皆力疏辭。行人以死請。乃至。德璟陸見首以清屯練軍告。然竟築舍不成。時內外文武濟濟然。兵餉戰守機宜。專諉芝龍爲政。芝龍泉州人。泉州郡城南三十里安平鎮。芝龍府故在焉。芝龍幼習海。知海情。凡海盜皆故盟。或出門下。自就撫後。海舶

不得鄭氏令旗。不能往來。每一船例入三千金。歲入千萬計。芝龍以此富敵國。自築城於安平。海梢直通臥內。可泊船。徑達海。其守城兵自給餉。不取於官。旗幟鮮明。戈甲堅利。凡賊遁入海者。檄付芝龍。取之如寄。故入閩以鄭氏爲長城。芝龍有弟芝虎。勇冠軍。昔征劉香。已沒於海。次鴻遠。次芝豹。一門聲勢。烜赫東南。芝龍開府於福州。坐見九卿。入不揖。出不送。集廷臣議戰守兵。定二十萬。自仙霞關而外。宜守者一百七十處。每處守兵多寡不等。計十萬。其十萬令冬精練。明春出關。一枝出浙東。一枝出江西。統二十萬之兵。合八閩兩浙兩粵之餉計之。尙不給。而粵西有靖江王者。八月稱監國。隆武詔至。不服。舉兵將東。廣西巡撫瞿式耜移書總制丁魁楚爲備。又檄思恩參將陳邦傳防梧。再檄星調兵止狼勿靖。應靖遣桂平道井儕促式耜入。式耜不允。未幾。靖提兵至梧。命式耜易朝服朝。式耜不從。且以兵脅之。卒不可奪。靖兵尋爲丁兵戰敗。返桂。時宣國公焦璉爲粵西總鎮。楊國威旗鼓。式耜授計於璉。而邦傳亦應檄統兵至。并受

令隨擒靖江王。及國威與吏科給事中顧奕等械至福州。王與國威奕俱斬於市。以擒靖功封魁楚爲伯。晉式耜兵部侍郎銜兼副都御史。是時浙東亦奉魯藩監國。先是清兵入浙。潞藩以城降。貝勒散布官吏至浙東。且令薙髮。山陰原任蘇松巡撫祁彪佳赴池水死。原任左都御史劉宗周不食死。有絕命詞云。留此旬日死。少存匡濟意。決此一朝死了我。平生事慷慨。與從容。何難亦何易。又示婿秦嗣瞻詩云。信國不可爲。偷生豈能久。止水與疊山。只爭死先後。若云袁夏甫時地皆非偶。得正而斃矣。庶幾全所受。門人會稽諸生王毓蓆聞變。卽遺書宗周。有云。願先生早自決。母爲王炎午所弔。投柳橋河死。儒士潘集奔東渡橋。袖石自沉死。儒士周卜年赴東海死。原任大學士高弘圖流寓紹興。城外迹至野寺不食死。時馬士英亦率所部奉弘光母妃至紹。紹人士猶未知弘光所在。原任九江僉事王思任上疏請斬士英。言戰鬥之氣必發於忠憤之心。忠憤之心又發於廉耻之念。事至今日。人人無耻。在在不憤矣。所以然者。南都定

位以來。從不曾眞眞寡寡。講求報雪也。主上寬仁有餘。而剛斷不足。心惑奸相。馬士英援立之功。將天下大計。盡行交付。而士英公竊太阿。肆無忌憚。窺上之微。而有以中之。上嗜飲。則進醞醪。上悅色。則獻妖淫。上喜音。則貢優鮑。上好玩。則奉古董。以爲君逸臣勞。而以疆場擔子。一肩推與史可法。又必忌其成功。而決不照應之。每一出朝。招集亡賴。賣官鬻爵。攫盡金珠。而四方狐狗輩。願出其門下者。得一望見。費至百金。得一登簿。費至千金。以至文選職方。乘機打劫。巡撫總督。見兌卽題。其餘編頭修脚。服錦橫行者。不在話下矣。所以然者。士英獨掌朝綱。手握樞柄。知利而不知害。知存而不知亡。朝廷篤信之。以至於此也。茲事急矣。政本閣臣。可以走乎。兵部尙書。可以逃乎。不戰不守。而身擁重兵。口稱護太后之駕。則聖駕獨不當護耶。一味欺蒙。滿口謊說。英雄所以解體。豪傑所以灰心也。及今猶可呼號泣召之際。太后宜速趣上照臨出政。斷酒絕色。臥薪嘗胆。立斬士英之頭。傳示各省。以爲誤國欺君之戒。仍下哀痛罪己之詔。以昭

悔悟則四方之人心士氣猶可復振。而戰鼓可厲。苞桑可固也。又上書士英言。閣下文采風流。才情義俠。職素欽慕。卽富國破衆疑之際。援立今上。以定時局。以爲古之郭汾陽。今之于少保也。然而一立之後。閣下氣驕腹滿。政本自由。兵權獨握。從不講戰守之事。而只知貪黷之謀。酒色逢君。門牆固黨。以致人心解體。士氣不揚。叛兵至則束手無策。強敵來而先期以走。致令乘輿播遷。社稷丘墟。閣下謀國至此。卽喙長三尺。亦何以自解也。以職上計。莫若明水。一孟自刎。以謝天下。則忠憤節義之士。尙爾相亮無他。若但求全首領。亦當立解樞權。授之才。能清正。大臣以召英雄。豪傑呼號。惕厲猶可。倖望中興。如或逍遙湖上。潦倒烟霞。仍效買似道之故轍。千古笑齒。已經冷絕。再不然。如伯嚭渡江。吾越乃報仇。雪耻之國。非藏垢納汙之區也。職當先赴胥濤。乞素車白馬。以拒閣下。上干洪怒。死不贖辜。閣下以國法處之。則當束身以候緹騎。私法處之。則當引領以待鉏耨。原任山西僉事鄭之尹子鄭遵遵。殺招撫使於江上。與張國維方逢

年柯夏卿宋之普陳函燁熊汝霖孫嘉績等迎立魯王於台朱大典亦遣孫珏上表勸進魯王監國紹興國維首疏叅馬士英悞國十大罪士英懼不敢入朝時逢年國維之普大典俱爲大學士封方國安荊國公張應翼永豐伯鄭遵謙義興伯王之仁武寧伯國安守嚴州鵬翼守衢州國維督師江上賜上方劍行事子世鳳爲平虜將軍補御史陳潛夫原官加太僕寺少卿命監各藩鎮兵馬七月復富陽八月復于潛時兵馬雲集人治一軍不相統一部曲騷然國維疏請於王謂尅期會戰則彼出此入我有休番之逸而攻堅擣虛人無應接之暇此爲算勝必連諸帥之心化爲一心然後使人人之功罪視爲一人之功罪十月清兵至國安嚴陣當之國維率王國斌趙天祥接應追戰於草橋門爲天大風雨火砲弓矢不得發遂收兵清兵營木城於沿江會閩中頒詔至諸求富貴者爭欲應之監國下令返台士民惶惶國維星馳至紹上疏隆武謂國當大變凡爲高皇帝子孫臣庶所當同心併力成功之后入關者王監國退居藩

服禮誼昭然。若以倫叙叔姪定分。在今日原未假易。且監國當人心奔散之日。鳩集爲勞。一日南拜正朔。鞭長不及。猝然有變。唇亡齒寒。悔莫可追。臣老也。豈若朝秦暮楚之客哉。疏出。議始定。而浙閩成水火矣。閩餉不足。芝龍遣給事中梁應奇入粵督餉。應奇往。叅遲悞者數十人。命提問。亦莫應。潮州知府楊球遂止越界。不敢入。芝龍又令撫按以下。皆捐俸助餉。官助之外。有紳助。紳助之外。有大戶助。又借徵次年錢糧。又察括府縣庫積年存銀未解者。厘毫皆解。又大鬻官爵。部司價銀三百兩。後減至百兩。武劄僅數十兩。或數兩。於是娼優厮隸。盡列冠裳。然無俸無衙。空名而已。其黠者倩軒蓋。僱僕役。拜謁官府。鞭撻里鄰。晉江令金允治蒞訟。兩造皆稱職官。則立而語。互毆於庭。不可制。受害者延頸。清兵謠曰。清行如蟹。曷遲其來也。然猶苦餉不足。所招關門兵。不過疲瘡數百人耳。時廷臣請出關者。章滿公車。隆武亦欲躬履行間。而芝龍以缺餉爲辭。十月。會曾后至。迎入宮。乃暫止。初。隆武孤身南來。鴻逵以所掠美人十二

獻及后至。乃大興將作。擴構宮殿。卮匱之器。悉用黃金。開織造府。造龍袍。后服下體皆織龍鳳形。后性倣敏。頗知書。有賢能聲。每召對奏事。於屏後聽之。共次進止。隆武頗嚴憚之。而隆武未有亂。芝龍乃令子森。賜國姓。改名成功。每隆武意所向。成功輒先得以告芝龍。由是廷臣無敢異同者。宰相半出門下。何楷與芝龍爭朝班不合。乞歸。中途盜截其耳。詔追賊不得。兵科給事中劉中藻亦以忤鄭氏去。或密以攬權告隆武。隆武輒責芝龍。芝龍怒。佯謝事。又卽固留曰。此非朕意。乃某人言也。於是左右無一同心。皆鄭人矣。丙戌元旦早朝。以足板擲蔣德環。幾傷。卽武知府吳爇燿。推官朱健。移眷他駐。坐倡逃。建陽知縣施熿。爲奸胥摘發。坐貪酷。俱斬。市曹龍溪知縣謝泰宗。以貪叅。罰八千金。杭嚴道龔可楷。航海至閩。不用。有嘒爾蹴爾之疏。終被賊殺死。而南來無賴之徒。爭上疏談兵。卽得召對。片言合旨。賚寶錠。賜官爵。久之漸多。部曹幾及千人。所賞芝龍亦不應。然隆武心知芝龍不可恃。卒無以制之。芝龍亦以不出關。無以壓衆心。

乃分兵爲二。聲言萬人。實不滿千人。以鄭鴻逵爲大元帥。出浙東。鄭彩爲副元帥。出江西。隆武做淮陰故事。築壇郊拜而送之。旣出關。疏稱候餉。駐不行。月餘。內催二將檄如雨。而切責鄭彩畏縮不前。自有國法。在不得已。踰關行四五百里而還。仍疏言餉絕。留如故。於是黃道周以帥相請募兵江西。江西多其子弟。願俱效死軍前。芝龍不與一錢。隆武給空劄百函爲行資而已。道周以劄號召門下得百人。居吉安。與楊廷麟萬元吉爲呼應。出兵徽州爲清兵所擒。械送江寧。道周絕粒不食。積十四日不死。內院洪承疇疏救。言道周清節夙學。負有重望。今罪在不赦。而臣察江南人情無不憐憫。痛惜道周者。伏望皇上赦其重罪。待以不死。上不允。尋同中書賴雍蔡繼謹等。駢斬於市。蔣德璟自請行關。確察情形。相機督戰。隆武許之比至。則疲兵弱卒。朽甲鈍戈。一無可爲。德璟告病去。而戶部尙書李長倩。以餉不繼憂死。提學御史毛協恭亦憤卒。泉州知府鄒式金見事不可爲。擢興泉道副使。予告去。吏部郎中趙五成與尙書張肯

堂同籍江南。疏言臣等生長海濱。請以水師千人。從海道直抵君山。襲取金陵。以迎陛下。計陛下陸行期。同會於金陵。隆武大喜。亟催芝龍造船。芝龍笑諾。會有疏水師諸臣。宜留其家眷。以防逃歸者。事不果。隆武乃決意親征。二月。駐建寧。楚撫何騰蛟。江右楊廷麟。皆有疏迎隆武。隆武意欲往江右。猶豫未定。而芝龍固請回省。省中人數萬呼擁。謂絕天下望。因駐蹕劍津。而任兵部尙書吳春枝留守。晉大學士辭不受。留駐浦城。六月。吳炳自江右單騎入關。命以布政提調棘闈。而以編修劉以修爲主考官。取中舉人葉瓚等百餘名。猶雍雍太平象也。皇子誕生。群臣賀表。有日月爲明。止戈爲武語。隆武嗟賞。大赦覃恩。鄭氏廝養。俱得三代誥。撰勅者。織軸者。日不暇給。當是之時。兵羸餉絕。當事無談及兵事者。舉朝如夢如醉。不待識者而知其敗壞矣。清朝招撫江南者。爲內院大學士洪承疇。招撫福建者。爲御史黃熙胤。皆晉江人。與芝龍同里。芝龍密遣使徼行通款。而隆武獨與魯王爲仇。都督陳謙奉魯使。與行人林銓至關。及關。趙

趙未敢入。芝龍以書招之。乃入。陛見。啟函。稱皇叔父而不稱陛下。隆武大怒。下廷議。皆下獄。芝龍疏救。不許。陳謙者。武進人。乙酉春。齎弘光詔。封芝龍爲南安伯。比啓讀券。乃誤書安南。謙謂芝龍曰。安南則兼兩廣。南安僅一邑耳。請留券而易詔。更晉伯爲侯。芝龍大喜。厚贈而別。及半途而南京變。芝龍素德之。有鎮江錢邦芑者。召對中旨。擢爲監察御史。實出芝龍門下。而與隆武親。最蒙信任。密啟隆武。陳謙爲魯心腹。與鄭至交。不急除。恐有內患。或以告芝龍。芝龍謂刑所必經其門。臨期救之。未晚。至夜半。內傳片紙。別移謙斬之。芝龍聞。伏尸哭極哀。以千金百布葬謙。爲文以祭。有我雖不殺伯仁。伯仁由我而死之語。而疏稱海寇狎至。今三關餉取之臣。臣取之海。無海則無家。非過征不可。拜表卽行。中使手勅云。先生稍遲。朕與先生同行。及之河。則飛帆過延平矣。芝龍旣去。守關將施福。盡撤兵還安平。聲言缺餉。蓋微聞錢塘信也。錢塘自丙戌正月。至三月。各營皆西望心碎。王之仁上疏監國。言事起日。人人有直取黃龍之志。乃一敗。

後。遽欲以錢塘爲鴻溝。天下事何忍言。臣今日計惟有萌死一尺。愿以所隸沉船一戰。今日欲死。猶戰而死。他日卽死。恐不能戰也。三月初一日。清兵驅船開堰入江。張國維命之仁統水師從江心襲戰。是日東南風大起。之仁揚帆奮擊之。國維督諸軍渡江。會隆武使陸清源。賚詔至江犒師。馬士英峻國安斬之。且出檄文數隆武過。國維曰。禍在此矣。四月。杭州固守。堅不可克。魯王議抽兵屬國維西征。以禮部尙書余煌兼兵部尙書事。督師江上。清朝貝勒王屯兵北岸。以江涸可試馬。用大砲擊南營。碎方兵中厨鍋灶。國安曰。此天奪吾食也。更念隆武曾以手勅相招。入閩必大用。卽不支。便道可退入滇黔。五月廿七日。遂拔營走至紹。陳兵刼監國南行。廿八日。江上諸師聞報俱潰。鄭遵謙携賞入海。廿九日。惟王之仁一軍尙在。將由江入海。國維與之仁議抽兵五千分守各營。之仁泣曰。壞天下事者。非他人。方荆國也。清兵數十萬屯北岸。倏然而渡。孤軍何以迎敵。之仁有船可入海。公兵無船。速當自爲計。國維乃振旅追扈。

監國禮部尙書余煌。大張碇示。盡啓九門。放兵民出走。畢。正衣冠赴水死。六月初一日。清兵渡江。國維行次至黃石岩。方馬阮兵斷所過橋。橋下刻大字二行。云方馬至此止。阮兵往前行。國安士英決計獻監國。爲投降計。乃遣人守監國。守者忽病。監國得脫。登海船。傳命國維。遏防四邑。遂過東陽。治兵再舉。時六月十八日也。二十五日。清兵破義烏。衆勸國維入山。國維曰。誤天下事者。文山。疊山也。一死而已。二十六日。清兵至七里寺。國維具衣冠。南向再拜曰。臣力竭矣。作絕命詩三章。自述曰。艱難百戰。戴吾君拒敵。辭唐氣厲雲。時去仍爲朱氏鬼。精靈當傍孝陵。坟念母曰。一瞑纖塵不掛胸。惟哀臺母暮途窮。仁人錫類能無意。存歿啣恩結草同。訓子曰。夙訓詩書。暫鼓鉦。而今絕口莫談兵。蒼蒼若肯施存恤。兼求全身答所生。從容具衣冠。赴園池死。興國公王之仁。載其妻妾。并兩子。婦幼女。諸孫。盡沉於蛟門下。捧所封勅印。北面再拜投之水。獨至松江。峨冠登陸。百姓駭愕。聚觀之。仁從容入見。內院洪承疇。自稱仁係前朝大帥。

不肯身泛波濤。願來投見。死於明處。承疇優接以禮。命薙髮不從。八月二十四日。就戮西市。兵部侍郎陳函輝。哭入雲峯山中。作絕命詞八首云。生爲大明之人。死作大明之鬼。笑指白雲深處。蕭然一無所累。子房始終爲韓。木叔生死爲魯。赤松千古成名。黃蘗寸心獨苦。父母恩無可報。妻兒面不能視。落日樵夫湖上。應憐故國孤臣。臣年五十有七。回頭萬事已畢。徒慙赤手擎天。惟見白虹貫日。去夏六月廿七。虛度一年世法。但嚴心內春秋。莫問人間花甲。斬盡一生情種。獨留性地靈光。古衲共紮文佛。麻衣泣拜高皇。手著遺文千卷。尙存副在名山。正學焚書亦出。所南心史難刪。慧業降生文人。此去不留隻字。惟將子孝臣忠。貽與世間同志。又作自祭文一。埋骨記一。從容笑語。扃戶自經死。禮部侍郎王思任。不食死。太僕少卿陳潛夫。偕妻孟氏。妾孟氏。夫妻姊妹。聯臂共沉河死。兵部主事葉汝積。與妻王氏同溺死。兵部主事高岱。絕食死。子諸生高朗。沉水死。通政使吳從魯。不薙髮死。原任山西僉事鄭之尹。沉水死。諸暨諸生方燭。山

陰諸生朱璋。赴水死。蕭山諸生楊雪門。自縊死。醫生倪舜年。正襟危坐。磁缸內。命人掩覆。朗聲誦佛死。清兵至金華。大學士朱大典。固守。攻月餘不下。用紅衣大砲破之。大典闔門縱火焚死。其子師鄭邠。武進人。亦死。總兵張鵬翼。守衢州。標下副將秦應科等。內應城破。鵬翼及樂安王。楚王。晉平王。皆被殺。督學御史王景亮。被執不順。遇害。馬士英。阮大鍼等。猶擁殘兵。數請入關。隆武以其罪大不許。士英遁至台州山寺爲僧。隨爲清將搜獲。阮大鍼迎降。貝勒隨令內院辦事。方逢年。方國安。及刑部尙書蘇壯等。俱剃髮投順。是時舊撫田兵。及方兵。鄭兵。號三家兵。或離或合。逶迤而南。所至刦掠。或挾婦女坐山頭。呼盧浮白。漫衍嶺界者四五日。後關門無一守兵。亦無一敵兵。寂如也。又數日。清騎數十。從容過嶺。然清兵入閩。或由建。或由汀。或由福寧。俱走山谷間。道出不意。不必仙霞也。潰兵先奔者。焚掠爲食。至建寧。科臣黃大鵬。按臣鄭爲虹。閉城發倉米庫銀。以犒驩呼而去。一郡獨全。八月十七日。清兵至浦。百姓請出降。爲

虹不可再請行。爲虹又不可未幾。清兵至。擁見貝勒。衆迫跪。爲虹不屈。貝勒嘉其節。不忍殺。且勸剃髮。爲虹曰。負國不忠。辱先不孝。忠孝俱虧。我生何用。寧求速死。髮不可斷也。明日復召見。責輸餉。爲虹謂清白吏何處得金。百姓爭欲代輸。贖以不死。爲虹以民窮財盡。特不可噴血大罵。貝勒下令斬之。爲虹大喊奮躍。奪刀自刺胸不死。遂見殺。大鵬同日殉難。爲虹義僕陳龍。輿標下中軍游擊原任浦城千戶張萬明。及子都司張翹鸞。都督洪祖烈從死。百姓爲之祠焉。隆武自芝龍去後。乃定計幸贛。八月二十一日啓行。猶載書十車。以從。二十四日抵順昌。聞清兵已及劍津。且踵至。倉皇騎而奔。從行者止何吾騁。郭維經。朱繼祚。黃鳴俊。數人已而何與郭亦散去。清兵至順昌。搜龍扛得馬士英阮大鍼。方國安父子。方遊山。連名請駕出關。爲內應。疏在已降後。大鍼方游山自投崖死。仍戮尸。士英等四人。駢斬延平城下。家眷百餘口。悉給賜兵丁。清兵過延平而東。獨陳謙之子帥數騎追駕。爲其父報仇。及至贛州。時隆武將入贛。

因停一日。曝龍鳳衣。是以及於難。并擒曾后。及從駕官朱繼祚。黃鳴俊。械至福州。貝勒斬隆武。及后於市。繼祚勒致仕。旋爲亂兵所殺。鳴俊許授五品官。以老疾辭免。禮部尙書曹學佺。通政使馬思理。俱縊死。別遣李成棟。韓固山。畧定興。泉州。汀。邵。漳州等處。九月初八日。入泉州。德化知縣陳元青迎降。大學士蔣德璟。絕食死之。十五日。至汀州。十月十九日。入漳州。漳州道傅從龍。知府金麗澤。以城降。皆仍舊職任事。不三日。鄉兵起。殺從龍。麗澤。初。清兵未至泉州。鄭芝豹。先至。閉城門。大索餉。皆計鄉紳家財。勒取不應。卽梟首。至縛親家母於庭。抵暮。得數萬。又具火手五百。將盡焚城中宮室。以餉未足。遲至明日。俄報固山兵將至。乃奔安平。芝龍。保安平。軍容烜赫。戰艦齊備。砲聲不絕。震天地。以前遣洪黃之信未通。猶豫未敢迎師。又自恃先撤關兵。無一矢相加。有大功。而兩廣素屬部下。若招兩廣。以自效。閩廣總督。可得。猶南面王也。貝勒令泉紳郭必昌。與芝龍最厚者。招之。芝龍曰。我非不忠於清。恐以立王爲罪耳。會固山兵逼安平。

芝龍怒曰。既招我。何相逼也。貝勒聞。乃切責固山。令離安平三十里。勿駐軍。而遣內院二人持書至安平。書畧曰。吾所以重將軍者。以將軍能立唐藩也。人臣事主。苟有可爲。必竭其力。力盡不勝。天則投明。而事乘時。建不世之功。此豪傑事也。若將軍不輔立。吾何用將軍哉。且兩粵未平。今鑄閩粵總督印。以相待。吾所以欲將軍來見者。欲商地方人才故也。芝龍得書大悅。其子弟皆勸芝龍入海。魚不可脫於淵。不願降。而芝龍田園遍閩廣。秉政以來。增置庄倉五百餘所。駑馬戀棧。遂進降表。過泉州。大張播告。誇投誠之勳。猶持貝勒書。招搖得官者。就議價。十一月十五日。至福州朝見。貝勒握手甚歡。折箭爲誓。遂命酒痛飲。三日夜半。忽拔營起。遂挾之而北矣。從者五百人。皆別營。不得見。亦不許通家信。芝龍對面作家書數封。皆囑無忘。清朝大恩語。而謂貝勒曰。北上面君。乃龍本愿。但子弟多不肖。今擁兵海上。倘有不測。奈何。貝勒曰。此與爾無與。亦非吾所慮也。芝龍既行。鄭彩。鄭鴻逵。鄭成功。皆率所部入海。張肯堂。沈猶龍等亦

往舟山依魯王。芝豹獨奉母居安平。芝龍至京。陛見奉朝請。秋。鄭彩。鄭成功。復又殺掠漳泉諸縣。皆破之。汀邵並亂。據建寧。閩郵爲阻。戊子夏。清兵再入閩。破建寧。屠之。直抵漳泉。鄭兵皆遁入海。至今沿海諸郡。猶未得寧。先是福州既失。兩廣總督丁魁楚。與廣西巡撫瞿式耜。會議監國。而閣學兵部尙書呂大器。自閩至。原任兵部尙書李永茂。以守制并至。式耜首言。監國永明王賢。且爲神宗嫡孫。應立。永明王。諱由榔。桂王之子。初封衡陽。以寇亂。徙寓梧州。會桂王已薨。永明猶在衰絰中也。於十月十四日。監國改元永歷。以肇慶府署爲行宮。推置僚署有差。魁楚。大器。俱爲大學士。式耜以吏部右侍郎。兼閣學掌銓事。魁楚兼戎政。大器兼中樞。永茂請終制。而福建舊相蘇觀生。何吾騫。俱遁回廣東。與布政使顧元鏡。於十一月。擁立隆武弟唐王聿錕。監國。年號紹武。以都司署爲行宮。會贛州敗。書至。司禮太監王坤。趣永曆移梧避之。式耜謂今日之立。爲祖宗雪仇恥。正宜奮大勇。以號遠近。東人復不靖。苟自懦。外棄門戶。內費蕭牆。國何

以立爭之不得。遂移梧。尋還肇慶。故大學士陳子壯書達式耜。請力馘蘇而趣兵東。永曆遣兵科給事彭耀往諭之。耀粵東人。舊爲秦令。有能聲。譬曉倫序。監國先後。國家仇讐利害。觀生等殺耀於市。日集兵向肇慶。右司馬林佳鼎督兵靖東郊。東將詐降。陷佳鼎。沒於水。東人益獷。式耜疏言草昧之初。惟養聖德。修紀綱。慎政教。挽人心。布威武。起用人。望招徠賢俊爲首務。王坤者。固北闔。自南都失而入閩。隆武遣出。茲用司禮秉筆。有戶部郎中周鼎瀚。內批改給事中。瞿式耜力言不可不聽。以粵巡使王化澄陞粵督。尋代佳鼎。晉小司馬。掌中樞。大器先以病去矣。內批陞化澄爲大司馬。式耜疏言化澄誠賢。有廷論。斜封。墨敕。何可爲例。請補部疏。尙得體。蓋汲汲爲閩。預慮也。晉永茂大學士。茂守制。僉請專知經筵。不入直。茂疏荐十五人。爲十五省鄉望。疏上。王坤啟視。殊不悅。未幾十四人皆磔之。山西道御史劉湘客。一斥。永茂怫然曰。朝廷方以經筵責茂。茂以十五省人進。非私也。斥湘客者。斥茂也。卽日解舟去。式耜疏言大臣論薦。新

朝盛事。司禮輒去取其間。無以服御史。何以安大臣。王坤復疏薦海內碩卿數十人。式耜又言。司禮抑人。不可薦人。更不可吏部都給事中劉鼐等疏論。坤內臣不得薦人。永曆怒。叱逐鼐等。式耜力持之。得復用。御史董琳。叅都御史周光夏。越資序。題差用。私亂臺規。非法。命廷杖琳。式耜力救得免。陞翰林院檢討。方以智爲中允。改御史劉湘客爲編修。充經筵講官。坤不悅。湘客且疑劉鼐疏出以智手。以智放舟去。時十二月十五日。清朝總兵李成棟兵薄廣州。命前鋒數十人。以紅布裹頭。扮作廣軍。直至城下。奪門而入。副將杜永和擒紹武。并周王。益王。遼王等。盡斬之。蘇觀生伏誅。顧元鏡。何吾騶。皆投誠。百姓薙髮歸順。時有石馬。徐鄭四姓。聯鯨海上花山。楊光林亦擁衆數萬。水陸交訐。民不聊生。成棟相機勦撫。於二十三日。發兵往南韶。而親下肇慶。二十五日。聞報。式耜請視師。督戰士駐峽口。王坤復請永曆西避之。式耜爭之不聽。遂駕小艇。上西峽。丁亥正月朔。至梧州。時丁魁楚惑於奸弁蘇聘。從梧西走岑溪。王化澄走潯州。隨

行者止。式耜一人。是月十六日。成棟克定肇慶。隨發副將楊文甫、張月領兵克取高雷廉三郡。即於二十九日。一鼓而入梧州。廣西巡撫曹燁出降。梧屬俱遍令納印。及南雄韶州二府報捷。別遣副將閻可義等前赴瓊州。二月。永曆抵桂林。式耜肅殿陛。勅守禦。誕告楚蜀各鎮。粵西居山川上游。桂誠可都。疏請道里之可達桂林者。王錫袞、文安之爲相。周堪、賡、郭都賢、劉遠爲生。六卿時給事中丁時魁。疏論新政。煇煇石劃。召掌禮科給事中金堡。素有清直聲。終制。勅召還。何騰蛟。晉閣學督師。而丁魁楚在岑溪。屯兵千餘。清朝招之不服。乃水陸設伏。大戰籐江。丁兵敗。魁楚中箭死之。隰江平樂。相繼投順。高雷廉三府俱報捷。四月。清兵渡海。克定瓊州。方警報之叠至也。王坤又趣永曆往楚。式耜上疏言勝敗存亡。山川要害甚激切。畧曰。駕不幸楚。楚師得以展布。自有出楚之期。茲半年之內。三四播遷。民心兵心。狐疑局促。如飛瓦翻手散而覆手合。又曰。在粵而粵在。去粵而粵危。我進一步。則人亦進一步。我去速一日。則人來亦速一

日。又曰。楚不可遽往。粵不可輕棄。今日勿遽往。則往也易。今日若輕棄。則更入也難。又曰。海內幅幘止此一隅。以全盛視西粵。則一隅似小而就粵。西恢中原。則一隅甚大。若棄而不守。愚者亦知其拱手送矣。擊跪涕泣不可挽。無已。請身留桂。乃命式耜留守桂林。各路悉秉節制。式耜仍疏請暫駐全州。以扼楚粵之中。當平樂之不守也。清兵直薄桂林。三月十一日。衝入文昌門。城中大恐。時焦璉自全甫歸。從數人控弦提刀。與清兵接戰。稍却之。清兵屯陽朔。遍野俱靡髮。式耜與璉危城孤守。疏詣全。徵安國公劉承胤兵。承胤初從武崗入護。猶持正守法。遂司禮王坤爲弄權。面叱周鼎瀚爲奉寺鼻息。故雅重式耜。發兵數千援桂。未幾承胤請金吾郭承昊。馬吉翔。嚴雲從封伯。御史毛壽登。駁祭金吾無矢石功。何得援邊鎮例。晉五等。吉翔等疑疏出湘客指。鼎瀚遂造蜚語。爲董卓濯汜之議。激承胤怒。偪永曆立命廷杖。而縛壽登。湘客及御史吳德操。給事中萬六吉。於午門外。會諸臣申救得免。壽登等俱落職。承胤益橫。脅劫永曆。

幸武崗。式耜疏留全陽。曰。聞郊社禮成。卽圖移駕。不知移駕將回桂林耶。抑幸武崗辰沅耶。今日原以恢復兩粵爲心。則不徒西粵未恢。不可移動。卽東粵未恢。亦且當駐全也。故承胤等嗾杖湘客等。以湘主還蹕桂林之議也。承胤諸部至桂。挾餉不出兵。式耜搜括庫藏而外。捐囊萬金。夫人邵亦捐簪珥數百。兵卒不肯出。與焦兵主客不和。譁變擊擣。掠市而去。爲五月十四日。永曆竟駐武崗。五月廿五日。清兵偵兵變。積雨城壞。環攻桂城。吏士皆無人色。璉負創奮臂呼。督師撫按。肘羽腹石。分門嬰守。用西洋銃擊中馬騎。尋出城戰。奮勇擊殺。自辰抵午。不及餐。式耜括署中米。蒸飯分哺之。士卒俱樂用命。明日復出戰。清兵旋去。式耜先令路將馬之驥。伏于隔江。犄角接應。固圉倍慎。是三月之內。危於清亂於兵。式耜一手指揮。璉乃得底安。璉久將桂。得桂人心。式耜國士遇之。故獨得璉死力。以保桂功。晉式耜兼太子太師。臨桂世伯。式耜辭不拜。疏上不允。復請告自劾。言自二月十五。以迄五月二十九。此百六日中。遇變者三。皆

極危險。變故當前。總辦一死字。亦遂不生。恐怖不起。愁煩惟是。臣之病不獨在身。而在心。不徒在形。而在神。身與形之病。可療也。心與神之病。不可醫也。又疏再請返蹕全陽。卒不聽。乃督璉恢朔下平。邦傳由賓柳亦及潯。并復梧。至八月。具疏上言粵西全定。請還桂林。昭告興陵。時巡道嚴起恒。以儀表魁梧。拜大學士。督師何騰蛟。駐衡州。堵胤錫。駐長沙。詎清朝三王平定長沙。而衡州相繼盡失。總兵黃朝選。楊國棟等被執。尸幾斷流。八月二十四日。武崗復敗。永曆又播越入粵。次柳州。式耜屢疏。極言不可他移一步。滇黔地荒勢隔。忠義心渙。三百年之土地。僅存粵西一綫。且山川形勝。兵馬糗糧。俱有可恃。時督師何騰蛟。新輔嚴起恒。及劉湘客。咸至桂。南安侯郝永忠。率兵驟至。宜章伯盧鼎。亦至自楚。式耜復疏。極言柳州。猺獞雜處。地瘠民貧。不可久駐。慶遠壤鄰黔粵。南寧地偏交爨。不可遠幸。時騰蛟與永忠。鼎等。俱分防任汎。會上司覃裕。春子鳴珂。與道臣龍文明。搆兵。永曆復次象州。式耜與騰蛟。起恒。湘客等。籌畫調和。主客。

集永忠璉誓於神。刻期出師。宜章鼎與滇鎮總兵趙印選。遂各分路駐全。全州戰勝。諸帥連營而軍。清兵因次楚。十一月，永曆自象州抵桂。式耜與起恒並相。司禮龐天壽七月請催兵下梧。久在粵。舊司禮王坤被承胤逐者。復入自武崗。至柳。至象。票擬皆金吾吉翔手也。式耜疏請永曆攬大權。明賞罰。嚴好惡。親正人。聞正言。威德兼行。以服遠近。時謂名言。騰蛟再督師出全。兵益不睦。璉下平樂。永忠壁興安。未幾永忠營被襲。疾至闕。欲撤兵。左右禁近。刻期欲永曆遷式耜。持不可。言督師警報未至。營夜驚。無大恐。二百里外風塵。而遽使主露處耶。播遷無寧日。國勢愈弱。兵氣愈難。振民心。皇皇復何依。潮迴波逝。雖長年三老能逆挽其馭。杖哉。左右禁近。周憶不能止。式耜又請曰。無己。候督師歸。果急甲士正山立。觀兵督戰。咫尺威嚴。勸激將士。背城借一。勝敗未知。若以走爲策。桂城危。柳益危。若今日可到桂。明日亦可到南大。反覆數百言。淚下沾衣。嚴起恒曰。遲至厥明五鼓。甫夜半。而永曆已行矣。是戊子二月二十二日也。時潰兵

肆掠蹂躪公署。職官無一得免。式耜被逼登舟。黎明刑部侍郎遠生給事中丁時魁萬六吉及湘客俱至。蓋湘客奉命安撫亂亡及勸餉糈而遠生時魁以召將入也。遇式耜於樟木港。式耜集遠生等入民屋立草檄分路四發。暫駐陽朔。催隸兵上援。桂鎮周金湯熊兆佐亦入桂。又檄翰林簡討蔡之俊大理寺評事朱盛瀛先入桂。宣式耜令。檄按察司僉事邵之驛部隸兵定人心。式耜於初一日復入桂署。督師騰蛟自永寧至。滇鎮胡一青統兵至。隸自平樂統兵至。清兵疑桂城空虛直抵桂北門。三月二十二日騰蛟督兵三面禦之。清兵渡甘棠去。督師列營榕江。永曆詔旌式耜賜銀幣。又賜精忠貫日金圖書一枚。式耜念主宵衣。南寧蠻鄉不可久駐。日爲永曆清道。前日所憂在內者。今更在外。督勳鎮將士直取全州。促巡撫魯可藻下梧。會東人有反歸信。令可藻繕兵以待。會可藻銜自署兩廣。舊例東撫稱制兼粵西。西撫稱撫。式耜曰。方今武人多自署。撫軍帥一面。帝制輒自命。貽遠人笑。予代疏請銜。曷不可。周鼎瀚以閣部擢。

式耜亦疏正之。當武崗之亂。言官彈鼎瀚以附承胤入直。式耜司票擬獨不苟。王沂公曰。進賢退不肖。皆有體。瀚係大臣。應聽自謝免。不謝免而復擅假。毋乃不可乎。邦傳稱粵西世守。牒四飛。式耜疏駁之。今日功。晉五等。尙未裂土。海宇剗削。止粵西一隅。爲駐蹕之地。楚滇數萬之師。日需食。輒曰。世守。豈老成憂國所隱料。式耜身雖在外。在廷大紀綱。極言力請。疏曰。臣與陛下患難相隨。休戚與共。原自不同於諸臣。一切大政。自得與聞。廟議可否。象指所關。本亂而求未治。馬陔終古耳。永曆駐南寧。四月初一日。世子生。册爲太子。赦天下。詔曰。萬喜式耜念無講官。經筵不御。石室塵封。何由聞得失。手書八箴於扇。進之。督師騰蛟復全陽。是五月二十七日事也。督師報功疏。不肯自爲功。有曰。爲陛下。以信臣用臣者。式耜一人也。六月。粵東李成棟。有反向明朝報至。先是成棟下廣。收繳印信。凡五十餘顆。於中獨取總督印藏之。有愛妾某。松江妓也。揣知其意。因朝夕慫恿。成棟撫几曰。憐此雲間眷屬也。妾曰。我獨敢富貴乎。先死尊前。以成。

君子之志。遂自刎頸。成棟抱尸大哭。明日卽衣冠將總督印具疏迎駕。又江右金聲桓據南昌。藏表疏於佛經部面中。遣使賫奏亦至。兩粵俱稱全土。式耜疏請往桂。又請永曆勿遽東。又言事權宜專。號令宜一。茲軍功爵賞文武署置。決於成棟。若歸之朝廷。則中擾閩外不能專制。聽之朝廷。徒虛拱且楚黔雄師百萬。騰蛟翹首。威靈如望雲霓。駕既東。軍中將帥謂朝廷樂新復之土。成棟亦有邀駕之嫌。號令既遠。則人心渙散。請一見東諸侯。俾共瞻至尊音容。面爲慰勞。指屬然後責其盡意於東。刻期出戰。咸決於外。不中擾也。又疏令簡討蔡之俊。入迎。再疏令給事中蒙正發迎。永曆竟由梧入肇。先後諸疏俱不報。式耜聞淚簌簌下。再疏謂前日粵東未復。宜住桂以視楚。今日江廣反正。則宜住桂。以圖出楚。事機所在。毫釐千里。吏部侍郎吳貞毓疏請永曆往廣城。式耜乃促遠生入阻。永曆適成棟自嶺還師。修行宮。且迓駕。永曆命遠生詣廣勞師。遠生謂成棟曰。今駕駐此。爵賞征伐。人疑有私。不可不嫌。成棟然之。遂罷修行宮。止迓駕。

成棟具疏言式耜擁戴元臣。粵西扼禦。定毋容久於外。應亟召還。綸扉永曆。專命遣官三四召。式耜曰。前日在南寧。桂林危。桂林危。則天下去矣。其機在外不在內也。今江廣悉定。何公督師下星沙。朝臣且輻至。予不敢忍危而卽安。具疏乞骸。再上。不允。己丑正月。清兵破湘潭。何騰蛟被執。初。騰蛟檄各處兵馬齊集湘潭。而命馬進忠等由益陽抄出長沙下。邀截上下舟船。焚掠湘陽。斷絕水道。一隻虎率大隊復至長沙。絡繹攻圍。值清朝援兵合至。戰勝於湘潭。騰蛟被擒。斬之。二月。清兵破信豐。李成棟歿於陣。南昌敗。書復再出。先是。聲桓踞南昌。清兵晝夜攻擊。破之。王得仁伏誅。聲桓赴水死。於是先後贈騰蛟中湘王。成棟寧夏王。聲桓南昌王。永曆設壇掛帛。皆拔淚親祭。專命式耜留守督師。兼江楚各省兵馬。永州兵再退。式耜疏請兵科給事中吳其濼監各營軍。再出。當永曆駐肇慶。疏奏諄諄。以歲月稍暇。財賦優裕。用心盡力。修內治。以自固。嚴外備。以自強。且積弊之後。易致中興也。一才一藝之士。靡不收羅。幕府每慨人才。

凋零殆盡。凡跣足而至者，非懷忠抱義之人，亦亂世取功名之士。人之歲月，精神不用之於正，則用之於邪。安可驅爲他人用？故人咸以桂林爲稷下。四月，雲南張獻忠養子孫可望，遣龔彝之弟龔鼎，獻南金二十兩，馬四匹，移書求封親王名號。給事中金堡固諍，以爲祖制無有，而廣西南寧府與雲南廣南府錯趾，可望來書，有不允封號，卽提兵出戰等語。陳邦傳恐甚，先封秦王，尋封爲荊郡王。可望不受後封。時楚制堵胤錫，以楚敗達肇慶，滇營自永全還桂，與焦兵猜疑生隙。忠貞營自蜀轉戰，由楚至梧，休息甲士。清朝遣使貽書，招式耜。式耜不從。永州再報失利，興寧侯胡一青兵還榕江，式耜復辦糧械，趨出兵屯於全。民力窮竭，誅割無術，槁悴萬狀。永曆聞爲廢食，召廷臣議於慈寧宮，發東餉一萬兩。是時，清兵圍困曾慶于平和，尋出降殺之，而韶安等處一時俱歸。清朝鄭芝鵬踞石榴城，清兵至，隨遁去。劉中藻在福寧，勢窮自縊。福建盡失，惟延漳汀三府界連江右，而延平所屬皆處萬山中。清兵旣回，遂立德化王朱

慈燁踞將軍寨。先陷大用。繼破龍溪。攻順昌將樂。至十一月。清兵討平之。王被獲。兵部尙書羅南生等降。庚寅正月。南雄報不守。寶豐伯羅成耀棄韶州。永曆震恐。戒舟西上。戎政遠生奏自請行清遠。給事中金堡特奏請留。爭之不得。適式耜疏至。曰粵東水多於山。雖良騎不能野合。自成棟歸順。始有寧宇。財賦繁盛。廿倍於粵西。衣甲糧餉。內可自強。外可備敵。林官兵士。南北相維。制勝致王。可操券而求。難得而易失。莫此云急。且韶去肇數百里。強弩乘城。堅營固守。亦可待勤王兵四至。何乃朝聞警而夕登舟。疏再上。而永曆移德慶。抵梧州矣。盖自成棟首疏文武各還事權。言官正氣宜獎。鹵簿不得干機務。失權者意。故急欲永曆移舟。棄東如歷。時詞諫諸臣。正綱紀。慎名器。多失人意。而御史程源輩。以擢官不得。伺權者指攻其所必去。變惑永曆聽。下給事中丁時魁。金堡蒙正發。及侍郎劉湘客。詔獄。式耜聞報。疏上申救。謂中興之初。宜保元氣。勿濫刑。再疏爭之。曰。詔獄追賊。乃熹廟朝魏忠賢弄權。鍛鍊楊左事。何可祖而行之。頒

勅布四人罪狀。非永曆意。勅出忌者之手。式耜封還。謂法者天下之至公也。不可以蜚語飲章。橫加考案。開天下之疑。且四人得罪各有本末。臣在政府若不。言恐失遠近人望。其何辭於後世。凡七疏。遣孫昌文入見梧州。陳說粵西民貧。食盡軍田折。時昌文子身由海上來也。閣試授昌文翰林簡討。清兵再薄全州。衛國一青兵。撤守榕江。時勳帥威進公。次者侯與伯。桂林牙門相望。號令紛出。十一月初五日晨報。清兵大舉入嚴門。印選一青永祚。俱以分餉入桂。榕江空壁。武陵侯楊國棟。寧武伯馬養麟。方馳出小路軍。榕江兵未戰而四潰。發使趨印選。印選已出城。城中大亂。沿道驅掠。式耜令戢不得。城外潰兵雲飛鳥散。一青永祚從城外去。式耜衣冠危坐署中。適總督張同敞自靈川回。過江東。不入寓。過式耜署。曰。事迫矣。公將奈何。式耜曰。封疆之臣。知有封疆。封疆既失。身將安往。同敞曰。公言是矣。君恩師義。敞當共之。遂笑與式耜飲。家人泣請身出危城。號召諸勳。再圖恢復。式耜揮去不從。厥明被執。見清朝定南王孔有

德。式耜以死自誓。不復一言。命幽式耜同儉於別所。式耜賦詩。日與同儉廣利。至閏十一月十七日斬之。其絕命詩有云。從容待死與城亡。千古忠臣自主張。三百年來恩澤久。頭絲猶帶滿天香。死之日。冬雷電大發。遠近皆爲稱異。時給事中金堡。已削髮爲僧。上書定南王。請葬式耜同儉。而吳江有楊旻。爲具衣冠棺殮。并同儉瘞於北門之園。永曆上南寧。入土虜。嚴起恒。王化澄。馬吉翔。龐天壽。皆隨去。後未詳云。

明季南北遺聞終



光緒三十四年六月初版
光緒三十四年六月發行

明季南北遺聞
（定價大洋四角）

原著者 江 左 鄒 漪

評點者 日本黑川玄通

校正者 日本豬飼敬所

留學東京張仲

發行者 上海均益圖書公司

各 省 書 局



